

萬 有 文 庫

第 二 集 七 百 種

王 雲 五 主 編

讀 史 方 輿 紀 要

(五 十 二)

顧 祖 禹 輯 著

商 務 印 書 館 發 行

讀史方輿紀要

(五十二)

顧祖禹輯著

國學基本叢書

讀史方輿紀要

卷七十二

四川七

嘉定州。東至成都府內江縣二百六十里。東南至叙州府四百五十里。西至雅州二百三十里。北至眉州百七十里。自州治至布政司三百六十里。至京師九千八百四十五里。

禹貢梁州地。漢爲犍爲郡地。後漢因之。晉仍屬犍爲郡。宋齊因之。梁屬齊通郡。後周析置平羌郡。隋開

皇初。郡廢屬嘉州。

時州治廣通縣。廣通。今眉州治也。或曰隋移嘉州治此。大業二年。又改眉州。

大業三年。改置眉山郡於此。唐復爲嘉州。天寶曰犍

爲郡。乾元初。仍曰嘉州。

舊唐書。是年劍南節度使盧元裕請升州爲中都督府。尋罷。

宋因之。

亦曰犍爲郡。

慶元二年。升嘉定府。

以寧宗潛邸也。開禧初。又賜軍號曰嘉慶節度。

元曰嘉定府路。明洪武四年。復爲嘉定府。九年。降爲州。以州治龍遊縣省入。

編戶十里。

直隸布政司。領縣六。

今仍曰嘉定州。

州倚三峽。而帶二江。

唐杜佑曰。州在大江。青衣。二水之會。宋鮮于繪曰。州背負三峽。襟帶二江。

山川之勝。爲蜀冠冕。且北去成都。不過五驛。東指江

陽易於一葦。從來繇外水而指成都。犍爲、武陽，其必爭之道也。宋牟子才言：嘉定爲鎮西之根本，以州據黎雅上游也。然津途便利，密邇叙瀘，詎非成都之噤吭乎？

龍遊廢縣

今州治。漢南安縣地，屬犍爲郡。後周置峨眉縣，平羌郡治焉。隋初郡廢，縣屬嘉州。開皇九年，改縣曰青衣。平陳日，有龍見水中，隨軍而進。十年，因改曰龍遊。大業初，爲眉山郡治。唐爲嘉州治。宋因之。宣和初，改曰嘉祥縣。尋復故。明初省城。

邑考：州城宋開禧中故址，西北依山，東南臨江。江水鑿城，城輒壞。明正統中，障以木柵。成化中，復擇以石堤。正德中，於城東南兩面掘地，鑿石深厚，皆八尺餘，高倍之，復編柏爲柵，以附石，始稱堅完。嘉靖二年，復改築西北一隅，又於水城增崇雉堞，自是皆以時脩葺。城周十二里有奇。

平羌廢縣

州北四十里。後周置平羌縣，屬平羌郡。志云：本漢時平羌戍也。後周保定間，因故址置縣。隋因之，屬嘉州。大業初，屬眉山郡。唐仍屬嘉州。宋初因之。熙寧五年，廢爲平羌鎮，屬龍遊縣。一統志：平羌故城在州南十八里，似誤。○廢豐遠監在

州界。宋志：嘉州有豐遠監，掌鑄鐵錢。元廢。

九頂山

州治東一里。隔江山有九峯，曰鳳集，曰棲鸞，曰靈寶，曰就日，曰丹霞，曰祝融，曰擁翠，曰望雲，曰兌說。山下有凌雲寺。唐開元間，僧海通者於濱江，沫水蒙水之會，悍流怒浪之濱，鑿山爲彌勒大像，高三百六十尺，建七層閣覆之。咸通十年，南詔蠻陷犍爲，掠陵、榮二州。既而大集於凌雲寺，與嘉州對岸。州刺史楊志等勒兵拒之。蠻潛遣奇兵自東津濟，夾擊官軍。官軍潰，遂陷嘉州。志云：寺在州城東南，又烏尤山在九頂山之東，舊名烏牛，突出水中，作犀牛狀。黃庭堅改爲烏尤，亦名烏龍山。俗仍呼爲烏牛。

山。明初明玉珍據重慶。元將完者都將攻之。屯嘉定之大佛寺。明玉珍遣兵劫烏牛山岩。擄嘉定。是也。大佛寺見犍爲縣山之左。又有馬鞍山。唐志嘉州有二十四鎮兵。一曰馬鞍鎮。蓋置於此。一云在州南八里。又有聖岡山。在州治東南。山岡與凌雲寺相連。因名一。

名東山。

高標山

州治西半里。一名高望山。巍然高峙。萬象在前。舊有層樓。江山千里。一目可盡。其相接者有楊雄山。有洞深邃。州傳子雲所居。志云在治西一里。又城西門外有古像山。有石鑄佛像。如凌雲大佛而略小。俗云初作此爲式也。又茶山在州西二里。產

茶。

三龜山

州治東。以形似名。中間一峯。循其趾而上。彎環有九洞。宋德祐初。元將汪德臣攻嘉定。守將咎萬壽戰敗。籍境內三龜。九頂。紫雲。諸城以降。卽此紫雲城。見犍爲縣。又州治南有洛都山。俗名龜子山。郭璞所云將州對洛都者也。

青衣山

在州東南大江中。屹然迥秀。崖壁蒼峭。周廣七里。長波四匝。又九龍山。在州東二里。俯臨大江。○錦江山在州北四十里。大江自成都環流至此。登山下瞰。縈繞如帶。又白崖山。在州北八十里。山有清風。白雲朝霞。三洞稱佳勝。

大江

在州城東。俗名通江。自眉州流入界。又南經烏尤山下。爲三江會流處。中有洲曰黑水尾。舊爲茶商批驗之所。又東南流入犍爲縣界。志云大江經州東。青水沫水。從西南來注之。謂之合水。晉永和三年。桓溫討李勢。循外水西上。勢遣李福拒溫。自山陽

趨合水山陽。峨眉山陽也。又唐咸通十年。南詔陷犍爲。薄嘉州。刺史楊恣與變夾江而軍。

變陰自上游濟。背擊王師。恣走嘉州陷。江蓋州之襟要也。餘詳大川。岷江及川濱異同。

陽江

州西南九十里。亦曰陽山江。陽一作羊。卽大渡河也。源出雅州羌界。下流自越窺衛境。流入州界。逕峨眉縣南。至州西。又東逕州城南。入大江。通典謂之青衣江。以與青衣水合流也。或謂之犍水。以犍眉山水流入也。自蜀以西之水。交會於此。詳見大川

大渡河。

青衣江。

州西十五里。其上流自青神縣流入夾江縣界。至此會於陽江。而東入大江。圖經。青衣。沫水。合流處。有觀音灘。自灘而上。曰魚村。曰浮橋口。路出雅州之道也。郡志。州境有瀆江。發源成都府溫江縣。逕雙流縣界。又逕眉州丹稜縣。青神縣。入州境。至

州城東。而入大江。蓋卽青衣水。譌爲瀆江耳。詳見大川青衣水。

泥溪河。

州東北五里。源出平羌縣山谷中。每歲泛漲。水色甚渾。泥凝於岸。因曰泥溪。西南流。會於大江。又臨江溪。在州西二十里。源出二峩山。流合青衣江。而入大江。志云。州治北有竹公溪。又平羌縣界有三溪。今皆湮。○明月湖。舊在州治南。今爲平陸。又

西湖在城西

方廣十里。

呂公堤。

在城東。志云。州城三江門。當二水之會。岸被水齧。易於決圯。宋守呂由誠築堤。連延不斷。以禦衝波。郡人德之。號曰呂公堤。

平羌關。

在州西北。唐志。平羌縣有平羌關。州志云。白崖山南有臨江關。今廢。卽平羌之譌也。又嘉禾關。亦在州北。又有紫石關。當嘉眉兩州分界處。山石皆赤。因名。二關皆近代所增置。○嘉慶關。在州城東大江東岸。志云。凌雲寺之西。卽嘉慶關。

二石關。

在州西南舊市鎮。郡國志。龍遊縣有二石關。漢武使唐蒙下夜郎置。輿地碑目云。舊市鎮石關。上有唐李德裕領重兵過此九字。晏殊類要。誤作二石關。近志皆從之。宜辯。又州志云。關在州東。亦誤。

凌雲驛。

州治東水驛也。又州北四十里有平羌水驛。卽故平羌縣。皆大江所經也。志云。州東南四十里有金石井。巡司。萬歷中革。

峩眉縣。州西八十里。西北至洪雅縣八十里。漢南安縣地。後周爲峩眉縣地。隋開皇九年改峩眉曰青衣。十三年復置峩眉縣於此。屬嘉州。大業中屬眉山郡。唐仍屬嘉州。宋因之。今城周八里。編戶六里。

綏山廢縣。縣西四十里。劉昫曰。本名榮樂城。隋招致生獠置縣於此。因山爲名也。唐屬嘉州。宋乾德四年省入峩眉縣。

羅目廢縣。縣西南九十里。唐麟德二年開生獠置縣。并置洮州治焉。上元三年州廢。縣亦省。儀鳳三年復置。屬嘉州。劉昫曰。縣初治峩眉縣界內。隨和城。如意初移於今治。距舊縣三十餘里。宋乾德四年廢爲羅目寨。屬峩眉縣。

三峩山。志云。大峩山在縣西百里。所謂峩眉山也。中峩山在縣南二十里。一名覆蓬山。一名綏山。小峩山在縣南三十里。一名鐮刃山。三山相連。謂之三峩。詳見前名山峩眉。

龍門山。縣西十里。兩崖峭峙。仰觀青天。僅露一罅。巖壑奇勝。不一而足。又羅蒙山在縣南三十里。一名羅目山。亦高廣。二山蓋卽峩眉之別阜。

陽江。縣西南百里。卽大渡河也。自越窩界流入境。經廢羅目縣南。羅目江流入焉。亦謂之峩水。又東入州界。

羅目江。在縣西。出峩眉山麓。右溪自小天池以東。左溪自黃茅平以北。至羅目廢縣。合二溪之委爲江。水石甚奇險。下流入於陽江。寰宇記。羅目縣西南五里有小銅梁。蓋在羅目江之上。○符文水在縣西三十里。出峩眉山洞中。北則白水。南則黑水。過雙

飛橋下。而瀉流爲一。下流亦注於陽江。

犍惜水。縣東南五十里。又天津水。在縣西南百五十里。皆出越窩界。東北流入縣境。注於陽江。○秦水在縣西南二十里。亦出峩眉山麓。下流瀉於陽江。志云。秦惠王克蜀。移秦人萬家以實之。秦人思秦之涇水。遂於此水側置戍。謂之涇口。唐天寶六載改

曰秦水名勝志。今夾江縣治名涇上。涇水疑在其地。又種玉溪。在縣四十里。出龍門山。亦曰龍門溪。流合於秦水。

土地關

縣西南四十里。邊略縣地。西南二邊。鄰松坪。木瓜。大小赤口等處。自縣三十里至高橋。又十里至土地關。二十里至龍池場。二十里至大圍關。五里至鐵索橋。五里至射箭下坪。三里至射箭上坪。此縣之舊界也。坪外八里至黑龍溪。四里至虎皮岡。

始分兩歧。右路由上馬勝溪至金口廠。爲邛部司新附之民。名歸化鄉。有陽化堡設焉。由金口廠二十里至木圍。五十里至天池。八十里至萬家石。三十里至松坪。則黎州境內矣。左路由下馬勝溪至古金寺。渡中鎮河。有中鎮巡箭戍之。又十七里而至太平坪。墩有兩歧。右路過陽村行百里。乃至羅猶羅。亦新附蠻種也。左路上變鬼岡。岡勢險峻。樹木叢雜。入冬徂春。煙霧不收。雨雪層積。卽蠻人亦鮮踪跡。又十五里至空木。卽永靈墩。八里乃至栖雞坪。今築平桑堡。處城池。候館咸備焉。由栖雞五里至冷溪。二十里至熱水河。十里至四百圍。又二十五里而至西河。設有鎮遠墩。過墩四十里爲殺馬溪。懸崖峭壁。中逼河流。人過此者。兩頭牽索。緣索而步。至下山處。名爲溜馬槽。又五十里。則木瓜壩種菓穴也。栖雞一作齒雞。

靖彝堡

在縣西南。志云。萬歷初。猓彝猖獗。增設此堡以備之。又中鎮亦在縣西南。臨中鎮河。明初置巡司於此。又隨和鎮。在縣西南。後周時置戍於此。唐儀鳳中。爲羅目縣治。尋改置隨和鎮兵於此。宋廢。○峩眉驛。在縣西南。唐置峩眉鎮於此。尋改爲驛。明初傅友德於大渡河造航。以達建昌。曹震言。建昌驛道經大渡河。多瘴癘。峩眉至建昌。有古道。平易可行。乞以時開通。移溫江至建昌。各驛馬置。峩眉新驛。爲便從之。尋廢。

夾江縣

州西北八十里。東北至青神縣六十里。本龍遊。平羌。二縣地。隋開皇三年。析置夾江縣。屬嘉州。唐宋因之。今城周五里有奇。編戶一十五里。

南安廢縣

縣西北二十五里。漢縣。高帝封功臣宣成爲侯邑。武帝時。屬犍爲郡。後漢因之。自晉以後。皆屬犍爲郡。梁屬齊通郡。後周屬平羌郡。尋廢。今爲南安鎮。亦曰南安鄉。○夾江舊城。劉昫曰。本夾江廢戍也。在今縣北八十里。地名涇上。隋於此置夾

江縣唐武德
初移於今治

萬松山

縣東北三十里。山有三峯。中峯尤爲峻聳。環山皆松也。其南曰天馬山。山勢高聳。一名馬鞍山。相近者曰伏龜山。岡巒綿亘。盤曲有九。又有葛藤山。以形如葛藤也。濱江又有簾鈞山。志云。以兩山夾江。狀若簾鈞。而名自天馬以下。俱在縣東三十里。

○丈人山在縣東十里。亦曰九盤山。上有石。峭拔如人立。俗謂之丈人峯。相近者曰虎履山。上多虎跡。因名。

平羌山

縣西十五里。山高廣。下瞰平羌江。後周以此山名縣。又鳳凰山。在縣南十里。岡巒攢列。飛翥若鳳。又縣西三里。有雲吟山。亦聳秀。○千佛崖在縣西八里。數峯巖然。崖石峭拔。崖旁多鑄佛像。因名。西崖瀑布懸流。響震林壑。

青衣水

縣西九里。自眉州青神縣流經縣界。洪雅川亦自縣西流合焉。因有夾江之名。或曰非也。大江經縣東。青衣經縣西。故云夾江。舊志。青衣水經南安故城。亦謂之南安峽口。蜀漢章武三年。漢嘉太守黃元叛。楊洪度其必乘水東下。勅諸將陳留等。於南安峽口邀擊。果得元。是也。青衣水又東南流。至州城西。而入於陽江。

洪雅川

縣西三十里。自洪雅縣流入界。東西曲流百三十里。與青衣水合。亦謂之雅江。○至川溪在縣西三十五里。源出峩眉山麓。流入縣界。合青衣水而注大江。又龍鼻溪。在縣西南十五里。其地有龍鼻山。溪流遶其下。因名。又飛水溪。在縣西十里。狀如

素練。一名瀑布泉。皆流注於大江。志云。江西去縣三十里也。又天水溪。亦在

縣西。有天生橋。在依鳳岡東。其橋天成。澗水出其下。流而爲溪。灌田千頃。

向君堤

在縣西南。延袤數里。志云。蒙江齧岸。縣令向君捍之。鍤沙濘。中得白金一篋。資以就堤。亦名白金堤。蒙江卽青衣江也。

弱瀉鎮。在縣東南。有弱瀉渡。蓋青衣水渡口。後漢志。縣有魚涪津。蜀都賦注。津在縣北三十里。或以爲卽今武陽縣之魚符津也。

洪雅縣。

州西北百三十里。東北至眉州丹稜縣六十里。漢南安縣地。後周爲齊樂縣。隋開皇十三年。改置縣。屬嘉州。唐武德初。置犍州治此。貞觀初。州廢。改屬眉州。開元七年。復置義州於此。明年。州廢。仍屬眉州。宋初。因之。淳化四年。改隸嘉州。元至元

二十年。廢入夾江縣。明成化十八年。復置。今縣城周六里有奇。編戶三里。

南安廢縣。

在縣東南。賈耽曰。後周廢南安縣。隋義寧初。改置南安縣於廢縣西。屬嘉州。唐武德二年。改屬眉州。五年。省入洪雅縣。開元八年。復以獠戶置南安。平鄉二縣。屬義州。明年。州廢。二縣俱併入洪雅。是也。州志。縣西四十五里有洪雅故縣。縣初置

於此。後移今治。

九勝山。

縣北一里。九峯屹立。近如屏闌。遠如戶闔。爲縣之勝。又八面山。在縣南三十里。峯巒高峻。黛色參差。八面如一。因名。又縣東南二十五里有金釜山。岡隴回環。草木叢鬱。一名主簿山。下有金釜渡。洪雅水所經也。或以爲卽丹稜縣之金釜山。恐誤。

竹箐山。

縣西三十里。上多竹。藁苳茂密。昔人以石鑿梯磴。盤折而上。宋嘗置關於其巖。設巡簡司。後廢。嘉靖中。復設竹箐山巡司。又雲占山。在縣西七十里。高出諸峯之上。四時雲氣籠罩。譬半縣。西百里。又有阿吒山。岩石雄峻。其東岩瀑布千仞。響撼山谷。

志云。縣西又有思經山。與雅州分界。其北有廢嚴道縣址。

雲坡。

在縣南。卽峨眉山麓也。胡氏以爲雪嶺之坡。今夾江縣西有雪嶺。一名寶子山。坡蓋在其西。唐咸通十年。南詔入寇。與官軍相持於大渡河。蠻密分兵開道逾雪坡。奄至沐源川。渡江陷犍。爲沐源川。今在犍爲縣界。

青衣水。縣西北七十里。自雅州名山縣東南流入縣界。又東南入眉州丹稜縣境。亦曰平羌江。下流入夾江縣。○洪雅川在縣西七十里。一云源出阿叻山。逶流縣界而入夾江縣境。縣以此名。唐武德九年。益州將郭行方擊破眉州叛獠於洪雅川。是也。

花溪。縣西六十里。其上流爲雅州之周公水。流入縣界。東北流入青衣水。又有龍溪。在縣西南六十里。分流爲二。左流爲大龍溪。右流爲小龍溪。盤曲圍抱。如游龍然。下流皆注於洪雅川。

犍爲縣。州南百里。東南至叙州府三百里。漢南安縣地。後周置武陽縣。隋初改名屬戎州。唐初因之。上元初。改屬嘉州。宋元因之。今城周二里有奇。編戶八里。

沈犀城。縣南十五里。志云。後周保定初。置沉犀郡治此。隋開皇初廢。或曰。即犍爲縣治。宋志。大中祥符四年。徙縣於懲非鎮。即今治云。○紫雲城在縣東南十五里。亦曰子雲城。相傳揚子雲曾居此。宋寶祐中兵亂。築城置戍於此。德祐初。咎萬壽以紫雲

城降元是也。今其地爲水月市。

玉津廢縣。縣西北三十九里。志云。隋大業中置。唐初屬嘉州。宋乾德四年。廢入犍爲。

犍爲山。縣南十五里。相傳漢以此名縣。又南五里曰沉犀山。近大江。亦曰沉犀灘。沉犀城以此名。○四望山在縣東北百里。山高聳。可以四望。

大江。在縣城東。自嘉定州南流經此。又東南入叙州府宜賓縣界。唐咸通十年。南詔攻黎州。分兵東出。詭服漢衣。濟江襲陷犍爲。遂焚掠。築二州間。州志。縣北十里有慕頤灘。大江所經也。湍流峻急。爲行舟患。近鑿而平之。公私便利。

沐源川。縣西南百里。自馬湖府沐川長官司流入界。經縣南入於大江。今縣南有清水溪。源出馬湖界。流入境。下流至孝女渡入江。曰清溪口。即故沐源川矣。唐咸通中。南詔蠻自雪坡奄至沐源川。尋陷犍爲。即此。又四望溪。在縣東北百里。發源三江鎮。下

流入岷江。○漢水志云。在縣東北百八十里。漢成帝時。得古磬十六枚於水濱。名寶磬川。其下流東入資江。

鴛鴦碕

在縣東北臨大江。晉永和三年。桓溫伐蜀。李勢將督堅拒溫。至合水。諸將欲設伏於江南。以待晉兵。堅不從。引兵自江北鴛鴦碕渡。向犍爲。溫軍至青衣。從彭模直指成都。堅至犍爲。知與溫異道。還自沙頭津濟。軍遂潰。合水。今州東陽江合大江之

口也。彭模及沙頭津。

俱見眉州彭山縣。

沐源鎮

在縣西南。以近沐源川而名。唐嘉川二十四鎮兵之一也。乾符初。高駘築沐源川城。蓋卽故鎮。築以禦蠻寇。新唐書。縣又有犍爲市。莊牛徑等鎮。

石馬灘鎮

縣北四十里有巡司。又縣東北百里有四望溪口巡司。其相近者。又有永通鹽課司。又稅課局。在縣西十里。○沈犀驛在縣城南。水驛也。又南四十里爲下壩驛。又六十里接叙州府境之月波驛。縣北五十里。又三聖驛。又北六十里。達於凌雲

驛。

大佛寺

縣東南四十里。唐所建。元末完者都以明玉珍據重慶。屯兵大佛寺。將攻之。明王珍遣兵搆嘉定。遂攻破大佛寺。

榮縣

州東二百里。西北至成都府井研縣百五十里。漢南安縣地。隋大牢縣地。屬資州。唐武德初。置榮縣。治大牢。貞觀初。析置旭川縣。永徽二年。移州治焉。天寶初。曰和義郡。乾元初。復曰榮州。繼又增置威遠軍於城內。宋因之。亦曰和義郡。治平四年。改旭川縣曰

榮德。紹熙中。又升州爲紹熙府。以光宗潛邸也。端平以後。廢徙不一。元亦曰榮州。以州治榮德縣。省入明初。因之。洪武九年。降州爲縣。今城周五里有奇。編戶七里。

大牢廢縣。縣西南五十里。宋白曰：蕭齊置南安郡，治南安縣，即此地也。後周廢，隋置大牢鎮。開皇十三年，改置縣，屬資州。仁壽初，山獠作亂，以衛文昇爲資州刺史，到官獠方攻大牢鎮，文昇單騎諭降之，即此。唐初析置榮州，尋治大牢，永徽中州移治旭

川。大牢屬焉。天寶初改曰應靈郡，宋仍屬榮州。明初省。○羅水廢縣在縣南。唐初置。新唐書景龍二年省雲州及羅水、雲川、湖連三縣入大牢，其地皆與大牢相接也。

公井廢縣。縣東三十五里。劉昫曰：唐武德元年，割資州之大牢、威遠二縣地於公井，鎮置榮州，以界內榮德山爲名。是年改鎮爲公井縣。六年州移治大牢，公井屬焉。宋初因之。熙寧四年省爲公井鎮，入榮德縣。宋志：公井有鹽場一端，平三年廢。

資官廢縣。縣西南百二十里。本南安縣地。晉義熙十年置治官縣，屬犍爲郡。宋齊因之。後周省。隋末復置，改曰資官。唐武德初屬嘉州。六年改屬資州。縣有鹽，有鐵，故曰資官也。宋仍屬榮州。元省。邑志：縣治西一里有榮王城。宋寶慶初榮以封弟與芮，周

一里有奇。
元末隳。

鳳鳴山。縣治西北。志云：自縣治北至縣治西南之浮圖崖有五山相連，亦曰五山。

榮德山。縣東北四十一里。唐因以名州。志云：山在羣山中，峭拔突起，高五百餘丈，有小徑至山頂，以木爲梯，上有石室二十四，相傳皆仙真幽棲之所。一名老君山。又有榮隱山，在縣北三十里，亦幽勝。一名石筍山。又榮黎山，在縣東十五里，上有龍池。縣有

三榮之
名以此。

榮川。在縣東，亦曰榮溪。自成都府仁壽縣界流入，又東南與雙溪合流，東南入叙州府富順縣，合金川注於大江。志云：榮川亦名遜水，又有東川在縣北，亦自仁壽縣山谷中出，東南流經城下，會於榮川。○雙溪在縣北，其水一自西來，流濁，一自東來，流清，二

水相合流經城下會榮川東川而入富順縣界

新羅鎮

縣南八十里有鹽課司或曰司蓋與富順縣接界

威遠縣

州東三百里東南至叙州府富順縣百三十里亦漢南安縣地隋開皇初置屬資州唐初改屬榮州宋因之元省後復置明洪武四年省入榮縣九年復置改今屬城周二里有奇編戶四里縣今省

義和廢縣

在縣東南百里隋末置唐初屬瀘州貞觀八年改屬榮州宋乾德五年并入威遠縣又至如廢縣亦在縣東南唐貞觀初置婆日至如二縣屬榮州二年又割瀘州之隆越縣來屬八年俱并入威遠縣

中峯山

縣北百里山峯高聳與資縣分界又兩母山在縣西北百三十里二峯並聳皆有石崖下垂望之如乳又佛頂山在縣西北三十里懸崖百尺上鑄佛像因名志云縣東十五里有葛仙山亦高秀

獻寶溪

縣西北七十里志云溪源一出仁壽縣界羅泉山下一出兩母山合流而東南入富順縣界注於金川又有中溪在縣南下流合於榮縣之榮川○龍會河在縣東曲流如盤龍合於獻寶溪又疏黃川在縣北四十里溪自山壑中來旁有一竅疏黃

隨泉而出

瀘州

東北至重慶府五百七十里南至永寧宣撫司三百四十里西至叙州府三百五十里北至重慶府合州五百五十里西北至嘉定州六百五十里自州治至布政司一千五百五十里至京師九千二百里

禹貢梁州地春秋時巴國地漢屬犍爲郡後漢因之建安十八年析置江陽郡三國漢及晉因之宋齊

仍曰江陽郡。

按沈約志江陽郡晉安帝時亂失本土乃僑置於武陽。宋時始復舊土因爲東江陽郡。蕭齊志亦曰東江陽郡。

梁兼置瀘州。隋郡廢州存。

仁壽中置總管府。大業初廢。

大業初

改曰瀘川郡。唐初復爲瀘州。

武德初置總管府。尋曰都督府。劉昫曰州督縣廢十州。天寶初督十四州。

天寶初曰瀘川郡。乾元初復故。宋仍曰瀘州。

亦曰瀘川郡。宣和元年賜軍額曰瀘川節度。乾道六年移瀘川路安撫司於此。宋志瀘州領縣廢州十八。

景定初沒於蒙古。尋復取之。改曰江安州。元仍曰瀘州。以州

治瀘川縣省入隸重慶路。明初改直隸布政使司。仍曰瀘州。

編戶七十

領縣二。今仍舊。

州西連夔道。東接巴渝。地兼彝漢。江帶梓夔。控制邊隅。最爲重地。今自州而北。一軍出中水。可以徑達廣漢。自州而東。江水兼衆水之流。浩瀚洋溢。吳楚百石大舟。可方行而至。自州以西。水陸兼濟。不十日可抵成都。瀘州驚則兩川盡城守矣。宋紹定中。魏了翁知瀘州。時瀘爲大藩。控邊面二千餘里。了翁乃脩武備。治城郭。爲捍禦之計。旣而叛將劉整以州降蒙古。教之侵宋。瀘州失而蜀益不可爲。宋之亡亦日迫矣。瀘實當東西腰膂之地。謀蜀者所當先也。

瀘川廢縣。

今州治。漢置江陽縣。屬巴郡。景帝六年封趙相蘇嘉爲侯邑。武帝改屬犍爲郡。後漢因之。建安中爲江陽郡治。三國時諸葛武侯嘗屯兵於此。晉仍爲江陽郡治。宋齊因之。梁爲瀘州治。或曰州治馬湖江口。誤也。隋瀘州亦治此。大業初改

縣曰瀘川。仍爲郡治。唐因之。宋淳祐三年徙治於江南崖神臂山。謂之鐵瀘城。元還舊治。至元二十年省縣入州。城邑考。州舊爲土城。宋政和間舊址也。元燬。明初因故址脩築。甃石爲圍。宏治初增脩。嘉靖中又復營治。隆慶三年復增拓之。有門四。城周七里。

奇有

涇南廢縣

州西南四十五里。在涇水之南。唐貞觀八年。析瀘川縣置涇南縣。屬瀘州。尋復省入瀘川縣。

九支城

州西南百餘里。本南廣蠻地。宋大觀二年內附。因置純州。領九支、安溪、二縣。宣和二年州廢。改縣為九支城。屬瀘州。州志。九支城在州西五十里。似誤。○武都城在州西南境。亦南廣蠻地。宋大觀三年內附。建滋州。領承流、仁懷、兩縣。宣和三年廢州。

為武都城。以仁懷為堡。

承流縣并入焉。元初廢。

思義廢州

亦在州西南境。唐天授二年。所置羈縻州也。領多溪、洛溪、二縣。屬瀘州都督府。宋因之。熙寧八年內附。政和中。屬長寧軍。又羈縻順州。亦在州境。唐載初二年置。領曲水、順山等五縣。屬瀘州都督府。宋因之。後俱廢。今州有思義洞。或云州

蓋因洞而名。

神臂山

州東八十里。亦曰神臂崖。北臨江渚。險固可憑。宋淳熙三年。余玠遷州城於山上。所謂鐵瀘城也。○方山在州西南三十五里。志云。山分八面。有九十九峯。下瞰江流。深窅無際。頂有巖池。周圍一里。唐時嘗改名曰回峯山。又水經注。綿水至江陽縣

方山下入江。謂之綿水口。綿水即資江也。

南去方山猶十餘里。蓋逕山北東入江耳。

寶山

在州城西。初名堡子山。宋陳損之。易今名。兩江合流。下瞰城郭。為郡之勝。一名瀘峯山。又三華山。在治北一里。有三峯。聳秀。州東三里曰歸子山。下臨江濱。○南壽山在州南十里。初名博望山。宋政和中。晏州叛。桑平定。守臣繪圖以進。詔改今名。又州南

五里有瑞鹿山亦高秀

思義洞

州西南二百里初入稍隘已乃宏廣相傳爲故思義州地也又龍女洞在州東北二十里崖壁高峻有二洞甚幽邃人不能到又州南十里南田鎮有飛雲洞亦幽勝

瀘江

在州城東即大江也自叙州府南溪縣流逕江安納溪縣過州城南又東北出而會鑿江今州治東隅即爲江滸夏潦水漲兩江環合瀾漫浩渺如大海然州人謂之海觀並流而東入合江縣境志云瀘江中有大石闕亦曰黃龍堆春水漲則堆沒闕平

水涸時常爲舟楫患餘詳

大川大江及川瀆異同

資江

在州城北即中江也自叙州府榮昌縣東南流至州城東合於瀘江水經注江陽縣枕帶雙流據江鑿會是矣詳見前大川鑿水

支江

州城西北大江分流也自叙州府南谿縣鴛鴦圻而東入州界經安流鎮又東入於資江又有赤水自隆昌縣界流入州境合於支江○九曲溪在州東北十里蜿蜒九曲可通小舟引流灌溉爲利甚溥又有澄溪在州治南源出寶山下流常澄潔下流

俱入於

大江

龍透關

州南七里相傳諸葛武侯所立又州南二十里有熨道營志云東漢征南蠻嘗屯軍於此○博望營在州南十里宋政和七年置亦曰南壽營以營在綏壽山下也又綏遠寨在州西南宋大觀中置隸滋州宣和三年改隸瀘州宋末俱廢

板橋堡

在州西南相近有政和堡俱宋政和初置宋志州境有羊瓶寨治平四年廢又有白芳營皇祐初知益州田玘發白芳子弟討叛彝是也元豐二年廢又有大嗣寨元豐三年廢○石門堡在州境宋李濂知瀘州首葺石門堡以扼夷人是也或曰即

今州南

石棚鐘

石棚鐘

州南二十里有巡司。又有李市鎮巡司。在州北百里。○瀘川水驛。在州治東。又東六十里有黃巖水驛。又立市馬驛。在州治北。蓋州當水陸津塗也。

納谿縣

州西南四十里。西南至叙州府長寧縣二百二十里。本瀘川縣地。宋爲納谿堡。皇祐二年。增置軍寨巡簡。紹定五年。升爲納谿縣。屬瀘州。舊有土城。今廢。城址不及三里。編戶三里。

舊縣城

縣北十里。元大德中。移縣於江北。以避水害。卽此城也。至大初。復還今治。今亦謂之舊縣壩。

樓子山

縣治東一里。層峯疊嶂。巖若樓閣。又縣東四里有撥旂山。相傳武侯樹旂於此。以警蠻人。又舞鳳山。在縣西南十五里。山勢起伏。橫開如鳳舞。

大江

在縣城北。自江安縣流入界。又東南出瀘州城南。輿程記。自縣至州。江道凡七十里。蓋水流盤曲也。又有撥旂灘。在縣東二里。江濱相傳亦以武侯名。

納溪

縣治西。縣境大川也。永寧宣撫及瀘州衛以北之水。匯流經江門峽口大洲。而北至縣西門。入於大江。亦謂之納江。舊志云。源出阿永番部。卽永寧屬彝也。今縣有納溪河口巡司。

倒馬關

縣南百三十里。明初置。路通雲南。交趾。因倒馬坎爲名。又石虎關。在縣南百五十里。明初置。通雲貴之道。關前有石如虎。因名。○保子岩志云。在縣西十里。相傳武侯南征。嘗駐兵於此。

江門砦

在縣西南。宋元豐四年。置江門砦。屬樂共城。後城廢。寨屬納溪縣。今爲江門堡。南去永寧一百三十五里。江門水馬驛亦置於此。輿程記。由江門水道而北。逕峽口水驛。至納溪縣。共二百四十里。是也。○大洲堡在縣南百四十里。亦宋元豐中置。屬

樂共城。今爲大洲水驛。又改大洲驛爲通郵驛。屬江安縣。輿程記。縣南七十里至渠壩驛。又七十里至大洲水驛。又南六十五里爲峽口水驛。與永寧接界。州志。渠壩驛在瀘州治南。大洲驛在江安縣治東。似皆誤。

江安縣

州西南百二十里。西至叙州府南谿縣百二十里。漢江陽縣地。後漢置漢安縣。屬犍爲郡。晉屬江陽郡。劉宋爲東江陽郡。治齊梁因之。隋開皇初。仍曰漢安縣。屬瀘州。十八年。改縣曰江安。唐仍屬瀘州。宋因之。今城周六里。編戶二十里。

綿水廢縣

在縣西綿水溪口。汶江中洲上。晉太元中置縣。屬江陽郡。劉宋屬東江陽郡。齊梁因之。隋仍曰綿水縣。屬瀘州。唐仍舊。宋乾德五年。廢入江安縣。○施陽廢縣。在縣西。唐貞觀初。以夷獠戶置施陽縣。又置思隸。思達。二縣。屬瀘州。八年。省施陽縣。

入江安十三年。又省思隸。思達。入焉。又廢南井監。志云。在縣東北。宋南渡後置監。有鳳凰山。山有鷹塔。元初置戍。今爲南井舖。

柯陰廢縣

在縣西南。唐羅縻晏州所領縣也。宋熙寧七年。熊本降。滅犵柯陰酋不下。本合晏州十九姓之衆。發黔南軍討敗之。於黃葛下。追奔深入。柯陰乞降。本受之。以其酋箇怒知歸徠州。於是清井。長寧。烏蠻。羅氏鬼主。諸蠻。皆願內附。黃葛。或曰山名。

也在縣南。歸徠州。即柯陰縣改置。

樂共城

在縣南百里小龜山上。宋元豐四年。置城於此。後并入江安縣。宋史。元豐元年。命韓存寶經制瀘州。納谿蠻。存寶破其後城。二年。羅荷蠻叛。犯納谿。議者言羅荷不加誅。則烏蠻觀望。爲害不細。存寶檄歸徠酋乞弟擊平之。旣而乞弟率兵至江安城。

下責賞。尋益桀。敷官軍擊之。敗沒。四年。改命林廣討之。廣敗乞弟於納谿。破樂共城。進至斗滿村。又次落婆圍。乞弟遁。廣率兵深入。自發納江。卽入叢箐。無日不雨雪。士卒死者不可勝計。過老人山。山形劍立。度黑崖。歷鴉飛不到山。進抵歸徠州。竟不得乞弟。師還。樂共等城爲戍守。政和五年。晏州彝卜漏反。攻樂共城。官軍拒却之。是也。納江卽納溪。

漢陽山。縣南四里。孤高突起。爲南境之望。又縣南四十里有照山。峯巒岩壑。爲一邑之勝。○連天山。在縣南七十里。回旋曲折。高聳連天。又南三十里。即小龜山矣。樂共城舊置於山上。

大江。在縣北。自南溪懸流入境。又東接納溪縣界。志云。縣西舊有三江。噴控江爲險。宋嘉熙三年。築城於此。以禦蒙古。或曰。三江。噴即綿水口也。

綿水。在縣治西。源出連天山。北流經廢綿水縣。入於大江。謂之綿水口。或曰。綿水合於清溪諸水。同入大江也。○清溪。在縣南。源出叙州府長寧縣。流入縣界。入大江。又安樂溪。宋鄧綰云。在縣東北。自合江縣南境上接蠻界。西北流至縣境。入江。一云。即納溪

分流也。時未建納溪縣。故云。自合江境流入耳。○涇灘。在縣南三十里。灘上有山。插天瀑布。懸流側有臥石。下流會於綿水。

安遠寨。縣南七十里。世傳諸葛武侯征蠻於此屯駐。宋志。元豐三年。廢平彝堡於羅池。改築安遠寨。屬瀘州。後廢入江安縣。又有西寧等寨。亦元豐中置。後廢。

梅嶺堡。縣西南百二十里。相傳亦諸葛武侯屯兵處。又南有鎮溪寨。宋志。元豐四年。置樂共城。領江門寨。鎮溪堡。梅嶺堡。大洲堡。是也。政和中。晏州蠻卜漏反。攻破梅嶺砦。尋討平之。元廢江門。大洲。見上。納溪縣。○席帽溪。砦亦在縣境。宋史。元豐五年。林廣入歸徠州。師還。築樂共江門。梅嶺。及席帽溪等砦。

西達清井。東到納谿。皆控制要害。是也。砦旋廢。

江安驛。在縣西。水驛也。輿程記。自南溪縣之龍騰驛。東六十里。至江安驛。又六十五里。爲董霸驛。自此而東六十里。即納溪縣之納谿驛。會典。有通郵驛。即納溪之大洲驛。改今屬。

合江縣。州東百二十里。東北至重慶府江津縣二百七十里。漢犍爲郡符縣地。後漢爲符節縣。晉仍曰符縣。屬江陽郡。縣尋廢。永和中。改置安樂縣。宋齊因之。梁時亦曰安樂。後周置合江縣。屬瀘州。隋因之。今城周不及二里。編戶七里。

廢符縣

在縣南。漢置縣於此。水經注。漢建元六年。以唐蒙爲中郎將。從萬人出巴符關。卽此。元鼎三年。始置符縣。後周時。置合江縣。於今治。隋以後因之。宋嘉熙三年。兵亂。移縣治於榕山。四年。又移縣治於安樂山。皆築城爲守。元復還今治。明天順中。始築

土城。成化中。毀以石。安治。正德中。皆增葺之。

安溪廢縣

縣西南百里。本蠻地。宋大觀中。置純州。并置安溪縣。隸焉。又南爲美利城。亦屬純州。宣和二年。州廢。縣及美利城皆降爲砦。屬合江縣。元俱廢。

榕山

縣南五里。山高秀。上有芙蓉池。卽宋嘉熙中築城處也。俗亦名容子山。其相近者曰月臺山。孤峯突立。之溪環繞其麓。如新月然。○安樂山在縣西五里。三峯奇秀。中有八洞及泉石諸勝。亦宋嘉熙中築城處。志云。唐天寶中。嘗改山名曰合江山。俗亦謂

之筆

架山

大江

在縣北。自州東流入縣界。縣西北二十里有白龍灘。卽大江所經也。至縣治東。有之溪流合焉。因謂之合江。又東北入重慶府江津縣界。

之溪

在縣治西南。一名小溪。源出遵義府仁懷縣境。環遶如之字。逕縣南十里之丁山及安樂山之麓。復遶流而東北出。合於大江。

遙壩砦

在縣南。宋大觀中。置屬合江縣。宣和二年廢。四年復置。志云。縣境又有安溪。小溪。青山等砦。皆宋皇祐以後置。元初俱廢。

岡門鎮

在縣南。路通遵義。萬歷中。楊應龍之亂。合江募兵扼岡門以拒之。是也。○牛腦水驛。在縣治北。縣西六十里。又有神山水驛。西去瀘州黃巖水驛六十里。又史霸驛。在縣東六十里。又東七十里。爲漢東驛。卽江津縣界也。

附見

瀘州衛

州西南二百九十里。志云：衛地東西廣二十里，南北袤九十里。東至永寧衛界，西至九姓長官司界各十里。南至十平長官司界五十里。北至納溪縣界四十里。洪武二十五年，陝西長衛軍征雲南還，命駐守州城，改爲瀘州衛，分立左右中前後五

所隸焉。正統中，調前所於利州衛，後所於青川所。成化四年，都掌種大壩蠻叛，事平，因遷衛於宋江渡。其地本名渡舡舖，增置官軍，并調重慶衛前所充之，卽今衛也。衛城卽成化初築，甃以石，周四里有奇，有門四。宏治間，復於東城外築土城，周一里有奇，控

制蕃藩，爲西南之要害。

腰營山

衛北二十里。明初命將南征，師出州境，營屯駐於此。又有仙洞，在衛治南半里，深一里，中有池，水常不竭。

宋江

在衛治東。志云：源出大壩兒北洞，卽今叙州府興文縣界也。又悅江在衛東北，源出興文縣之濬武箐。志云：以流經廢羈縻悅州而名。又有思晏江，在衛西四里，源亦出興文縣界，以逕故羈縻思晏縣而名。皆北流逕江門驛，至納谿而注於大江。

洞掃堡

衛南三十里。本蠻砦，成化四年，官軍攻都掌蠻，破其洞掃、海納、龍背、豹尾等砦，事平，改爲堡，屬瀘州衛。又定遠堡，在衛南五十里。太平堡，在衛南九十里。水峽堡，在衛東南一百里。亦曰水流崖堡，俱成化四年所置也。○江門堡，在衛北五十里，卽納

溪縣之江門砦也。又大洲堡，在衛北百三十里，卽納溪縣之大洲驛。渠壩堡，在衛西北百八十里，卽納溪縣之渠壩驛也。又三層堡，在衛西北百六十里，俱成化四年置，俱分撥衛兵戍守。

瀘州驛

衛西五里。馬驛也。又有來節驛，亦在衛境，或云本在州北，近隆昌縣之玉蟾山，萬歷初移於此。

雅州。東至嘉定州二百三十里。西南至黎州所二百四十里。西至天全六番招討司百里。北至邛州二百里。東北至眉州二百四十里。自州治至布政司四百五十里。至京師一萬一千一百里。

禹貢梁州地。秦屬蜀郡。漢爲蜀郡西部。後漢延光初。置蜀郡屬國。三國漢改漢嘉郡。晉因之。宋屬晉原郡。齊梁仍舊。西魏置蒙山郡。隋開皇初郡廢。屬邛州。仁壽四年。置雅州。大業初。改曰臨邛郡。唐初復爲

雅州。

開元三年。置都督府於此。督羈縻十九州。天寶以後。多至五十。七州。劉昫曰。羈縻州並生獠生羌。但有州名。無屬縣。亦無實土。

天寶初。曰盧山郡。乾元初。復曰雅州。

督羈縻州如故。

五代

因之。

五代史。王建時以雅州爲永平軍。一云後唐清泰初。孟知祥置。誤。

宋仍曰雅州。

亦曰盧山郡。宋志。雅州領羈縻州凡四十有四。

元亦爲雅州。

初屬嘉定路。尋屬吐蕃等處宣慰司。

明初仍曰

雅州。以州治嚴道縣省入。

今編戶四里。

直隸布政司。領縣三。今因之。

州襟帶西川。咽喉彝落。唐韋臯。李德裕。由此以撻伐吐蕃。鞭弭南詔。所謂邛崃。大度之險也。寰宇記。州西和川路。去吐蕃松城四日程。羌蠻混雜。連山接野。鳥路沿空。不知里數。今州之西徼。迫近番戎。山高谷深。天險陡絕。靈關。礪門。始陽。向稱三路。而礪門要害。尤爲巨防也。

嚴道廢縣。

今州治。秦縣。屬蜀郡。華陽國志云。始皇滅楚。徙嚴王之族以實其地。因名嚴道。後往往徙罪人於此。漢文帝六年。詔徙淮南厲王長於嚴道邛邰。即此縣。亦屬蜀郡。後漢延光初。屬蜀郡屬國。三國漢屬漢嘉郡。晉因之。宋省入漢嘉縣。杜佑曰。永

嘉以後李雄據蜀此地蕪廢是也齊亦爲漢嘉縣地梁因之西魏置始陽縣并置蒙山郡治焉隋開皇十三年改縣曰蒙山尋爲雅州治大業初復曰嚴道縣自是州郡皆治此明洪武四年省縣入州城邑考州城明初因舊址脩築壘石爲固有門四城周五里。

徒陽廢縣

在州西漢縣屬蜀郡徒音斯或曰徒榆變也亦曰榆漢紀元狩中發使者出驪出冉出徒出邛變指求身毒即此徒也又西南華傳自邛以東北君長以十數徒邛都最大又西域傳建元中司馬相如使西犂邛邛冉駹斯榆之君皆請爲內臣元鼎中治置徒縣即斯榆地也後漢改屬蜀郡屬國都尉晉曰徒陽縣屬漢嘉郡大寧初越瀾斯臯攻成將任回斯臯即徒之遺種也宋屬晉原郡齊因之後廢

蒙陽廢縣

在州西北新唐書唐初析州界置蒙陽長松靈關陽啓嘉良大利六縣屬雅州武德六年俱省入嚴道縣

羅巖廢州

州西四百八十里寰宇記雅州管和川路夏陽路羅巖州凡四十有六羅巖其首也諸州去雅州近者四百餘里遠者六百餘里和川路有羅巖以上三十七州夏陽路有讓川州以下九州宋史雅州西山巖有部落四十六是也○會野廢縣通典云在州西北五百七十里貞元中吐蕃會野首領高萬唐等來降又有東西二嘉梁州在州西五百六十餘里貞元中其首領亦來降又欠馬白坡等州亦在州西五百餘里宋時諸州仍在四十六州之列按新唐志雅州羅巖有欠馬州而無白坡惟黎

州羅巖有

柏坡州

晏山城

在州西界唐置新唐書雅州有和川始陽靈關安國四鎮又有晏山邊臨統塞集重伐謀制勝龍遊尼陽等八城蓋皆置兵以控扼蠻部處○邏租城在州西徼外又西北境有木波城唐貞元中章阜使雅州將路惟明趨吐番遭租偏松等城既而

臯敗吐番於雅州。克木波城是也。又有鬼龍城及業城。俱唐時吐番所置。近雅州西界。

蔡山

州東五里。禹貢蔡旅平。卽此蔡山也。岩巒高聳。爲州之望。州東十里。有地名旅平。卽大禹旅祭處。俗呼爲落平。又諸葛武侯祀周公於蔡山。今亦名周公山。○雅安山在州治西。由沅黎而來。一名月心山。州舊治山上。宋大中祥符間。州守何昌言以地

多嵐瘴。徙

治於山麓。

嚴道山

州南五里。本名鹿角山。唐天寶六載。改今名。又懸空山。在州南二十里。層巒聳翠。稱爲奇勝。○金雞山在州北二十里。上有金雞關。又北十里有鳳飛山。峯巒起伏。如鳳飛然。又翠屏山。在州西二十里。山峯環列。因名。

萬勝岡

在州西山。勢起伏。環繞州治。相傳諸葛武侯擒孟獲。還師至此岡。下人聚觀之。因名。

青衣江

州西六十里。源出廬山。東南流至州境。合沐水。經名山縣南。又東入嘉定州。洪雅界。詳見大川。

平羌江

在州城北。源出徼外。流入境。繞州城西北郭。下流合於青衣江。故青衣亦兼平羌之名。舊傳羌獠入寇。諸葛武侯擊平之於水上。故曰平羌。又長濱江。在州東南二里。一名邛水。其源自邛崃山。潰湧而出。繞城東北。入於平羌江。

沫水

州西五十里。源亦出廬山。東流至此。會於青衣江。故青衣江又有沫水之稱。又有周公水。在州東四里。源出榮經縣瓦屋山。流經周公山。因名。下流入嘉定州。洪雅縣界。卽花溪也。志云。周公山下有麒麟渡。卽周公水。津濟處。相傳麒麟嘗遊此。

和水

州西南四十里。源出蕃界。流入境。合於平羌江。禹貢和夷底績。唐有和川路。皆以此水名。

金雞關。在州北金雞山上。一名山雞棟關。又金沙關。在州東北二十里。○雅安驛。在州治東馬驛也。志云。州城內。舊有茶場。宋熙寧中置城南。又有阜民司。明洪武九年置收買番馬。後罷爲民居。今州治北有稅課司。

繩橋。在州西北平羌江上。所謂多功路之繩橋也。舊名高橋。以繩架棧。下瞰峽江。爲險要處。志云。州西北一里曰清源橋。東北十里曰龍門橋。三十五里曰道遠壩橋。五十里曰魚喜河橋。州西七里曰銅頭河橋。其近多功路者曰大繩橋。皆索橋也。

名山縣

州東北四十里。東至邛州蒲江縣百二十里。漢蜀郡青衣縣地。後漢爲漢嘉縣地。晉以後因之。西魏置蒙山縣。屬蒙山郡。隋初屬邛州。開皇十三年改始陽縣曰蒙山。因改縣曰名山。尋屬雅州。唐宋元因之。明洪武十年省入州。十三年復爲縣。土城周二

里。編戶三里。

漢嘉廢縣

在縣西。本青衣羌地。漢高六年置青衣縣。屬蜀郡。十一年廢。梁王彭越爲庶人。傳處蜀青衣。是也。武帝天漢四年。廢沈黎郡。分置西部都尉治青衣。後漢延光元年置蜀郡屬國都尉。陽嘉二年改青衣曰漢嘉。三國漢爲漢嘉郡治。章武二年漢

嘉太守黃元以漢嘉叛。尋討平之。晉仍爲漢嘉郡治。尋廢。宋以縣屬晉原郡。蕭齊因之。後廢。水經注。漢嘉縣。故青衣羌國。竹書紀年。梁惠成王十年。瑕陽人自秦道岷山。青衣水來歸。漢武置西部都尉。主青衣。公孫述有蜀。青衣不服。世祖嘉之。建武十九年。嘗

置青衣

郡云。

百丈廢縣

縣東北六十里。劉陶曰。在臨邛縣南百二十里。唐初置百丈鎮。以百丈山爲名。貞觀八年。改置縣。屬雅州。宋初因之。熙寧五年。省入名山縣。元祐二年復置。元因之。明初廢。今爲百丈驛。有百丈橋。又廢土城。邑志云。在縣東北三十四里。周七十

二丈。相傳武侯征蠻時所築。遺址猶存。

蒙山。縣西十五里。山有五峯。前一峯最高。曰上清峯。有甘露井。禹貢蔡蒙旅平。此卽蒙山也。水經注。青衣水出於蒙山。宋人謂梁州之山。西山皆岷。北山皆嶓。南山皆蒙。峩眉在禹貢。則蒙山之首云。○蓮花山在縣北十五里。山有五峯。聳列如蓮花。

百丈山。縣東北六十里。上有穴。圓百尺。深百丈。唐以此名縣。又泉池山。寰宇記云。在百丈縣東四十里。其山四面懸絕。上有泉池。邑志云。百丈縣近南五里有銅鼓山。爲漢唐戍守之地。○鷄棟山在縣西南十七里。一名鷄鳴山。王象之曰。鷄鳴山卽古之名

山。因爲名山戍。隋以此名。

縣蓋卽州北之金雞山矣。

大暮山。縣東四十里。南接河羅戍。北入邛州。高七十里。上聳天際。寰宇記。縣西又有羅繩山。自蒙山西北入。盧山縣界。東北接邛州。火井縣界。皆山之高大者。

青衣江。在縣南。自州界流入。又東南流。逕嘉定州。洪雅縣。北入眉州。丹稜縣境。亦謂之邛水。又名平羌水。○百丈河。在縣東北六十里。源出蓮花山。逕百丈廢縣。東下流入邛州蒲江縣界。爲鐵溪河。一名千尺潭。以水源遠而深也。

雞棟關。縣西南雞棟山上。卽金雞關也。唐志。名山縣有雞棟關。○百丈馬驛。在縣東北。卽故百丈縣治。

榮經縣。州西南百二十里。南至黎州所百三十里。本嚴道縣。後廢。唐武德三年。改置榮經縣。屬雅州。宋因之。元末省入嚴道縣。設巡司焉。明洪武十三年。復置。今縣土城周三里。編戶二里。

鄧通城。在縣東三十里。相傳漢文帝賜通嚴道銅山鑄錢於此。旁有餓死坑。亦以通名。又古城在縣西五里。相傳諸葛武侯征南時屯兵處也。唐李德裕增築之。置兵戍守。

禦侮城。在縣西。唐太和。中李德裕帥西川。作仗義城。以制大度。清溪關之阻。作禦侮城。以控榮經犄角之勢。作柔遠城。以扼西山吐蕃。復邛崃關。又於雅州築伐謀。制勝。等八城。是也。仗義城。今見黎州所。○靜寇城。在縣西境。唐乾符二年。於雅州置金湯軍。

井置靜寇軍是也新唐書靜寇軍故延賈地

邛崃山

縣東四十里一名邛笮山亦曰邛躡山山峻阻凝冰夏結冬則劇寒產竹高節而中實所謂邛竹杖也有九折坂亦曰邛崃坂李吉甫曰邛崃山自沉黎直走千里至臨邛環抱爲鎮山云詳附見前重險臨關

銅山

縣東北三十里山產銅相傳卽漢文帝賜鄧通鑄錢處蕭齊永明八年議更錢法益州行事劉俊上言蒙山下有嚴道銅山舊鑄錢處可以經略不果宋初平蜀其故將全師雄等復叛討平之餘黨據銅山推謝行本爲主復擊敗之卽此○自由山在縣

東二十里志云山深遠連亘黎州界上出羣山之表又有孟山亦在縣東二十里俗傳孔明擒孟獲處其下有七縱橋蓋傳謬也

大關山

縣西八十里山極險隘當西南彝要路或曰山卽邛崃之西麓邛崃關置於此因名又曬經山在縣北二十里山高峻俗傳唐三藏晒經處○瓦屋山在縣南百二十里山多靈異上有雷洞又石狗山在縣南六十里以石形似狗而名寰宇記縣東

西皆連接大山巖樹阻絕不辨疆界

雞止崖

縣西二十五里本名棲止其崖西臨險路由大關山而東至此方坦平肩擔背負者悉棲止於此因名寰宇記謂之雞心山傳謬也又大相公嶺在縣西百里相傳諸葛征南時經此因名志云大相公嶺有虛關險崖明洪武二十四年景川侯曹震

嘗脩治之以通行旅

滎經水

在城東滎水出大相公嶺流至城北經水出瓦屋山流經城南會流而東北入於平羌江隋時置滎經口戍唐因置縣○菩薩溪在縣南六十里源出瓦屋山東北流入州界注於平羌江

邛崃關

縣西北八十里。今日大關。隋大業十年。置爲控扼番戎之要隘。詳附見重險臨關。○天險關在縣東北四十里。據邛崃九折坂之險。至爲要害。又紫眼關。在縣西北三十里。昔有紫眼番人。流寓於此。因名。十嶽考。紫眼彙編。氓殆半里。其地紫眼關與西

番相接。廣可四十里。袤百里。自靈溪。飛水。小路直透冷磧。番皆爲紫眼關地。又飛水關。亦在縣西北路出西番。

礪門砦

縣西北五十里。卽和川鎮。雅州西通巒路也。元至元初。置礪門等處安撫司於此。二年。安撫司高保四言。礪門舊有城邑。中統初。爲宋所廢。衆依山爲柵。去礪門半舍。欲復戍。故城便於守。但敕秦蜀行省相度。行止。明初亦設礪門百戶。所有石城

足以控禦。蓋州之靈關。礪門。始陽。皆通番之道。而礪門最爲要害。兩山壁立。一水中通。特設禁門。以限中外。礪門以外。卽天全境。所謂萬里乾河。直達礪門者也。○鹽宿川在縣西境。亦唐時招納吐蕃之道。又有夏陽路。俱近天全。招討司界。

雄邊寨

在縣西北。中有講武堂。宋淳熙間。創屯營於此。○太平堡在縣西北二十五里。又有黃土堡。在縣西五十里。俱明初置。屬大渡河千戶所。官軍戍守。大渡河所。今見黎州所。

箐口驛

縣東三十里。縣南三十里。又有新店驛。○大通橋在縣西三十里。洪武五年。因征雲南。置爲窄橋。往建昌。雲南之要路也。

蘆山縣

州西北百里。東至名山縣九十里。本嚴道縣地。隋初置蘆山鎮。仁壽末。改爲蘆山縣。屬雅州。唐宋因之。元末省入嚴道。設巡檢司。明初復置。今縣土城周五里。編戶三里。

大渡廢縣

縣西北五十里。唐儀鳳二年。析蘆山縣置。屬雅州。長安二年。復省入蘆山縣。又故靈關道。在縣西北六十里。漢置。屬越巂郡。後漢因之。晉廢。卽今臨關也。○姜維城在縣治南。志云。姜維置城於此。以拒西羌。隋開復此地。卽故城置縣。又開明城。

在縣西七里。相傳

蜀王開明所築。

盧山

縣東九里。接黎州所界。附以此名縣。或謂之盧奴山。其相接者。曰始陽山。俗呼爲羅繩山。在縣東十里。西魏以此置始陽縣。蓋字記。盧山高八里。東道控川。橫亘入邛州大井縣界。青衣水出焉。○百步山在縣北四十里。路接蠻界。僅百步許。險隘難行。

靈山

縣西北五十里。峯巒竦峻。林木深阻。爲蜀西之襟要。劉昫曰。縣西北六十里有盧山。下有峽口。濶三丈。長二百步。俗呼爲盧關。關外卽生猿。蓋卽靈山矣。又龍頭山在縣西南。綿亘四十里。遶縣前後。天矯如龍。連接番部。實爲要害。又有崖鉢山。在縣西百

里。上聳雲漢。莫測其高。崖上有石。其狀如鉢。因名。

大渡河

縣北四十里。從生羌界流入境。邛雅西道往來者。必渡此水。又南入黎州界。詳見大川。○青衣江在縣東南。源出盧山。流入州界。詳見大川。青衣水。

龍門河

縣東北五十里。有二源。一自邛州界九子山西流。一自徽外東流。經冷砧河。南流會於金雞峽口。過魚喜河。八步關。青源河南流入於青衣江。○浮圖水在縣西北五里。亦從生羌界來。中有孤崖如浮圖。因名。流合於大渡河。

聖水

縣東十里。連筒引之。行里許。伏流二三里。復湧出。分爲五。因以聖名。又老君溪。在縣南六十里。相傳以老聃曾經此。而名下流皆入青衣水。

石波堰

縣東三里。源出始陽山。用木槽接水。溉田。又湧泉。在縣東北五里。泉水湧出。爲居民灌溉之利。○三江渡在縣南十里。路通天全。六番志云。三江渡水注多功。峽入平羌江。又多功河。上有飛仙閣。爲木棧道。卽古瀾閣也。

臨關

縣西北六十里。本日靈關。亦稱零關。正統初。改今名。有巡司戍守。詳見前重險。○八步關在縣東北五十里。

飛仙關

縣南五十里。亦曰飛仙閣。卽古瀾閣也。梁益記。大小瀾天。在雅州西北。山谷高深。沈晦多雨。而黎州常多風。故謂黎風雅雨。宋宇文普新路賦。惟天下之至險。有嚴道之瀾閣焉。孤峯上絕於青天。湍波下走於長川。斷崖橫壁立之岸。飛溜濺千丈之

泉蓋
謂此。

附見

雅州守禦千戶所。

在州治南。洪武四年
建直隸四川都司。

讀史方輿紀要

卷七十三

四川八

龍安府。

東北至陝西沔縣五百里。南至成都府綿州三百五十里。西北至松潘衛三百三十里。北至陝西文縣三百三十里。東至保寧府劍州二百九十里。西南至成都府茂州三百二十里。自府治至布政司四百八十里。至京師一萬二千二百四十里。

禹貢梁州之境。周秦時爲氐羌地。漢屬廣漢郡。

武帝開西南夷。置陰平道。屬廣漢郡。北部都尉治焉。後漢安帝改爲廣漢屬國。仍領陰平。甸氐。剛氐。三道。

三國漢屬陰

平郡。

晉志云。秦始中置。今詳見州城形勢。

晉以後因之。

南渡後。分置南北二陰平郡。宋齊時。梁益二州。皆有南北二陰平郡。地居梁益間。往往交屬焉。

梁普通間沒於氐。

志云。普通三年。爲土豪楊傑。李龍遷。

所據。

西魏得之。置江油郡。

治江油縣。

兼置龍州。隋初郡廢。大業初。又改州爲平武郡。義寧初。改曰龍門郡。

尋曰西龍門郡。

唐曰龍門州。

武德初。仍曰西龍門州。貞觀初。始去西字。

天寶初。曰江油郡。至德二載。改應靈郡。乾元初。復爲龍門。宋初因之。

亦曰江油。

政和五年。改曰政州。紹興初。復曰龍州。元因之。屬廣元路。

志云。元升龍州爲元帥府。尋改爲宣慰司。今正史皆不載。

明洪武七年。仍爲

龍州二十三年改龍州軍民千戶所尋復故宣德七年又改爲宣撫司

隸布政司

嘉靖四十五年升爲龍安

府領縣三今仍舊

府控扼氏羌山川重阻峭壁雲棧連屬百里真四塞之地也說者謂松潘介在生番糧爰之道恃龍安以無恐龍安者南重成都之防北壯松潘之勢故改建郡縣不可緩也自魏鄧艾伐蜀而陰平遂爲取蜀之捷徑艾之伐蜀也自陰平行無人之地七百里鑿山通道作橋閣山谷高深至爲險難艾以氍自裹縛而下將士攀木緣崖魚貫而進先登至江油而蜀人膽喪矣後唐長興二年石敬瑭等攻兩川前軍克劍門西川帥孟知祥急遣軍爭劍門而命別將李筠將兵趨龍州守要害蓋劍門拒守又恐奇兵自陰平故道而入也旣而官軍果分道趣文州將襲龍州爲西川兵所敗明洪武四年伐蜀傅友德亦自階文而進克青州朶陽下江油遂趨綿州修造記龍安路通階秦嚴稽出入直與劍閣爲比蓋自蜀入秦之道東則劍閣西則陰平劍閣之防顯而易知陰平之道僻而易忽故出奇制勝者往往托足於

此焉

詳陝西階州陰平道

平武縣

附郭漢廣漢郡剛氏道地蜀漢析置廣武縣屬陰平郡晉太康初改曰平廣縣尋又改爲平武縣仍屬陰平郡宋元嘉二十七年以故氏王楊文德爲輔國將軍使引兵自漢中西入搖動研隴遂取魏陰平平武是也齊梁仍曰平武縣西魏改置江油縣

并置江油郡治焉。尋又爲龍州治。隋以後因之。宋端平三年，兵亂，寶祐六年，徙州治。今縣東之雍村壩，縣亦徙治焉。元以江油縣省入龍州，又徙州治武都鎮。明洪武中，又徙州治樂平鎮。卽今治也。嘉靖四十二年，土司薛兆乾作亂，事平，改爲府。萬曆十九年，始置今縣，爲附郭編戶二里。

龍州城。在今府東。祝穆曰：龍州城，梁李龍遷所築。去江油東北三里。蓋卽隋唐州城也。宋寶祐以後，州益遷而東。其故城皆土築，旋圯。明洪武七年，土官知州薛文勝創設州城於青川所。二十三年，知州薛繼賢奏移今治。周以木柵。宣德五年，知州薛忠義

奏築碑城。嘉靖十三年，宣撫薛俊卿又復營築。四十五年，改爲府城。今城周五里有奇。

平武城。府西三十里。隋志：梁末，李文智自立爲藩王，以平武爲國都。西魏復爲縣，而別置江油縣。龍州治焉。隋亦曰平武縣，仍屬龍州。唐貞觀八年，省入江油。近志：西魏廢帝二年，定蜀置龍安縣，尋改曰平武，似誤。

方維城。府東北百二十里。西魏置秦興縣，爲建興郡治。隋廢郡，改縣曰方維，屬龍州。唐武德四年，改屬沙州。貞觀初，州廢，又省縣爲方維鎮，屬景谷縣。貞元初，南詔吐蕃合兵入寇，分道趨扶文，掠方維，白壩。卽此。白壩見昭化縣。

德陽城。府東二百里。本漢梓潼縣地。後漢改置德陽縣，屬廣漢郡。華陽國志：德陽有劍閣，遺三十里至險。蓋與劍門相近也。建安十九年，先主軍涪，張飛自江州而上，定巴西。德陽，鄧艾由陰平，邪經漢德陽亭，至江油，出劍閣，西百里，皆謂此。晉移德陽而南。

因謂此爲漢德陽。

陰平城。府東北五十里，東南至劍州百六十里。宋白曰：文州爲古陰平。魏晉之陰平郡及陰平縣治也。永嘉末，太守王鑿以郡降李雄，晉人悉流移於蜀漢。其氐羌並屬楊茂搜。於是南陰平郡屬益州。宋永初以後，晉人流寓於蜀者，於益州立南北二陰

平郡。寓於漢中者。亦於梁州立南北二陰平郡。劍州之陰平。卽宋所置北陰平郡也。宋文帝元嘉九年。益州流民許穆之詐稱司馬飛龍。招合蜀人攻殺巴興令。逐陰平太守。刺史劉道濟遣軍擊斬之。或以爲此漢州葭楊之南陰平。梁天監十四年。魏人侵蜀。詔在大洪自陰平入魏。晉壽招誘氏羌。絕魏運路。十五年。將軍王光昭與魏戰於陰平。敗還。卽此陰平也。又大寶末。肅紀將楊乾運攻叛氏。楊法琛拔劍關。進據南陰平。對古陰平而言。因謂此爲南陰平耳。隋志。宋置北陰平郡。治陰平縣。後魏置龍州於此。西魏改郡曰陰平。而徙龍州治江油。後周嘗改郡曰靜龍郡。隋郡廢。縣屬始州。唐屬劍州。宋因之。端平以後。兵亂縣廢。舊志。陰平城南去梓潼縣六十里。似誤。

藥叢山。府南十里。多產藥材。因名。或譌爲落叢山。俗名樂從山。又馬頭山。在府西南五里。以形似名。○火鳳山。在府北十里。山勢峭險。其麓卽箭樓山。擁抱府城。一名旂山。又崆峒山。在府西北十里。山谷深險。直接蕃界。似平涼之崆峒。又化豹山。在府東北

十五里。山勢高峻。林

木豐茂。限隔蕃塞。

九龍山。府東五十里。其地峻險。前拒鐵蛇關。抵蕃地。一山九嶺。疊巒如龍。又羊盤山。在府東北六十里。石徑九曲。如羊腸然。又箐青山。在府東南六十里。重峯疊嶂。樹木森鬱。

馬盤山。府東南百二十里。高三千三百丈。其形似馬。盤旋而上。重巒疊嶂。行者難之。後魏馬盤縣以此名。○牛心山。在府東百五十里。山秀拔。形如牛心。西魏李虎葬此。唐武后時。鑿斷山脈。元宗幸蜀。修復之。回鑿後。升龍州爲都督府。賜名靈應郡。唐志云。

山在江油縣西一里。長慶四年。龍州刺史尉遲銳上言。山有楸

斷處。請加補塞。於是役數萬人於絕險之地。東川爲之疲弊。

馬閣山。在廢陰平縣北六十里。峻峭峻峭。極爲艱險。鄧艾軍行至此。路不得通。乃懸車束馬。造作棧閣。始通江油。山因以名。舊唐書。陰平北有十八隴山。其山有隴十八。或以爲卽馬閣山。又左擔山。志云。在府東百八十里。鄧艾伐蜀。路經江油。因山高江險。

修鑿棧閣以通擔負。今七里閣是也。胡氏曰：自文州青塘嶺至龍州一百五十里，自此而南者，右肩不得易所負，謂之左擔路。鄧艾伐蜀之道也。祝穆云：左擔路上涪水崖壁，有閣道六，曰青崖，曰螻頭，曰石回，曰七里，曰東閣，曰石城，又有二閣，不在左擔之數。曰猿臂，曰黃林，皆閣道之險者。○兩羅山在府東北七十里，山嶺分峙，兩羅路通青川、廣昭等處。

弩牙山

府東南百六十五里，狀如弩牙，相傳鄧艾伐蜀屯軍於此，又東南五里曰石門山，兩崖相對，石門與氏羌分界處。左思蜀都賦：緣以劍閣，阻以石門。梁大寶中，氏酋楊法琛據黎州附魏，益州刺史武陵王紀遣楊乾運討之，拔劍閣，法琛退保石門，與

地紀勝：龍州江油縣東百里有石門戍。唐志：利州景谷縣西有石門關，卽此石門也。

涪江

府西北二百里，源出松潘衛小分水嶺，經小河所而東，至府城西，又歷城南而東，下入江油縣境，盤紆縈帶，爲郡境之險。詳見大川涪水。○青漪江，志云：源出落叢山下，流至綿州彰明縣，合於涪江。

青川溪

府東百二十里，源出西蕃界，經青川所，下流合白水，入嘉陵江。又醞醞水，源出府東清潭嶺，接青川溪，流入嘉陵江。圖經云：清水出啼胡山，闊五丈，東流入利州界，其水清美，亦云啼胡水。志作醞醞，美其名也。○大溪河在府西北二十五里，志云：源

出白馬路西蕃界，流至此，入於涪水。又府境有木瓜官渡、古城、高村、大印等河，皆源出蕃界，下流入於涪江。志云：廢陰平縣西四十里有揚帆水，下流入梓潼縣界，合於潼水，泛漲奔注，勢若揚帆云。

利人渠

在廢陰平縣西北二里，引馬閣山水入縣，溉田。唐龍朔二年，縣令劉鳳儀開，寶應中廢，後復開。景福二年又廢。

胡空關

府西北四十里，永樂中置。又羊昌關在府西北十五里，其地有羊昌山，山崖層疊，通鐵蛇官道。○鐵蛇關在府東十里，爲番彝出入之衝，又有黃楊和平、大魚等關，與胡空諸關共爲六關，俱永樂中置，爲府境之要險。

涪水關

府西北涪水上。唐志：江油縣有涪水關。卽此。又龍門關亦在府西。隆慶中置。○芍藥戍在府南九十里。唐置。本名擇溪戍。永徽中改今名。

興文閣

在府東南二十里海棠鋪。山路盤東下。臨急湍。置閣其上。以通行旅。又南巖閣。在府東六十五里。正德初修。鑿平坦可行。陰平修路記。龍安棧閣在治東者凡八。曰石城。曰佛崖。曰麻園。曰蟻頤。曰黃林。曰三店原。曰七里。曰飛仙。在東南者凡三。曰石

回。曰興文。曰猿臂。在東北者凡二。曰秦隴。曰東閣。在府東者凡九。曰金鼓。曰芭蕉。曰檉株。曰盧崖。曰天井。曰桑坪。曰兜素。曰木蕊。曰飛泉。在西北者凡十五。曰金匱。曰桐油。曰隆奉。曰胡空。曰黃梗。曰劉郟。曰鶴頂。曰禪峯。曰石門。曰仙女。曰馬桑。曰溪壩。曰黑水。

曰羅漢。曰羊腸。志云：鄧艾伐蜀。置秦隴等閣道一十二處。

明洪武十一年開設松潘衛。又置飛仙等閣道二十五處。

溪子驛

在府西。志云：府東百二十里有古城驛。百七十里有武平驛。二百里有小溪驛。又水進驛。在府西北九十里。又府西二百里。有小河驛。會典：縣有明月所巡司。○永濟橋在府西北二十五里。路接小河所。明洪武中。土官薛文勝以篾纜架橋。永樂初。

薛忠義造鐵索六條。長十五丈。架板爲橋。名曰垂虹。俗名鐵索橋。詳見小河所鐵龍堡。

下。又天生橋。在府西北九十里。通羊洞寨。河水奔險。中有三巨石如柱。居民架木爲橋。

白馬寨

府北三百里。番寨也。志云：白馬番北通階文。西抵漳臘。其生番號黑人。延袤數百里。彌房不計。有名色可舉者。凡十八寨。多不過四五百人。少可百人而已。嘉靖元年。白馬跳梁。用兵五千。分五路。一由松潘小河所之鐵龍堡。一由松潘東路之三舍

堡。一由府西北之黃楊關。一由青川所之北雄關。一

會兵陝西。由階文而進。變畏懾聽命。今爲府境屬寨。

白草寨

府西南四百里。亦曰白草壩。番寨也。志云：白草番東抵石泉縣約七十里。西抵南路生番。南抵茂州番。北抵平武界。凡十八寨。部曲素強。恃險阻。往來剽奪爲患。成化十四年。撫臣張贊督兵勦白草壩及西坡。禪宛諸大寨。生番皆順命。尋復叛。嘉靖

十三年，撫臣宋滄遣兵擊平壩底、白草等寨。諸蠻獻侵地二千餘里，未幾復叛。十五年大征，用兵三萬七千，一由龍州，一由壩底，斬獲甚多。事平，增置雙谿、大魚、永平、曾邊諸堡。草撫賞斷鹽茶，萬歷七年壩抵、河西風村等十一寨，永平、河東、白草等十七寨，相率來降，許爲編氓。自走馬嶺一帶分十村，由平一至平十村，又西射溪溝一帶分八村，由一化至八化村，村立一長，以統率之。又有風村嶺等十八寨，尙承舊名，亦同時歸順者。○木瓜番寨在府西北二百里，近小河所境土迫促，種類不繁，雖有五寨，約男女不過二三百人。嘉靖二十三年，導白草番爲亂，事平，止許歲至小河領賞，不得過府西大魚關。

江油縣

府東南百三十里，東北至劍州二百五十里，東南至梓潼縣百里。漢爲剛氏道地，蜀漢置江油戍，鄧艾至陰平，欲與諸葛緒自江油趣成都，是也。晉宋爲平武縣地，屬北陰平郡。西魏爲江油縣地，龍州治焉。宋末屢經遷改，元至元十二年，并入龍州。至正四年復置，屬劍州。嘉靖四十五年，改今治也。明洪武十年，并入梓潼縣。十

江油城

志云：在縣西北，今縣所轄之鄉，曰武都，曰雍邨，皆故龍州治也。一云：今青川所之明月關，卽故縣治，似誤。元末移治於此，防險說。江油雖在腹裏，實龍安糧道之咽喉也。今有石城，明天順六年創築，成化、正德、嘉靖、萬歷以來，相繼增修。

寶圖山

縣北十里，兩峯聳立，山麓紆迴，南接彰明縣界，杜光庭云：山西接長岡，乃通車馬。東臨峭壁，陡絕一隅，自西壁至東峯，石笋如圖，兩崖中斷，相去百餘丈，躋攀絕險，人所不到。○大匡山在縣西三十里，高聳盤紆，亦接彰明縣界，其南二十里有點燈

山，卽彰明之小匡山也。一名讀書臺，以李白得名。

天柱山

縣北五里，山小而峻，形如立柱，一名天池山，以山頂有池也。又名石人山，天寶六年，載敕改爲靈液山。○太華山在縣南十里，三峯奇秀，有似西嶽，亦南接彰明縣界。

涪水。縣北一里。自平武縣界流入。又東入劍州境。○涪溪在縣西十五里。源出縣西二十五里之百漚洞。細流十里。合於雍邨河。又龍潭溪在縣北。源出寶圖山下。流俱合於涪水。

馬啼關。縣西二十里。又縣境舊有鬼門關。兩山險迫。暴風從中出。
○平波驛。舊在縣北五十里。接龍安府界。亦曰西平驛。

石泉縣。府西南二百十五里。南至成都府二百九十里。本漢蜀郡汶江道地。晉屬汶山郡。後周爲汶山縣地。屬汶州。隋初屬會州。唐貞觀八年。分汶山縣地置石泉縣。屬茂州。宋初因之。熙寧九年。改屬綿州。政和七年。於縣置石泉軍。宣和三年。仍屬綿州。七年。復

置軍。元廢軍。以縣屬安州。明初屬成都府。嘉靖四十五年。改今屬。城周二里有奇。編戶三里。

北川城。縣西三十里。本汶山縣地。後周置北川縣。屬北部郡。隋屬會州。唐屬茂州。永徽二年。省入石泉縣。

威蕃城。縣西三十里。唐之威蕃柵也。亦曰威蕃亭。唐書王涯傳。吐蕃有兩道。一由龍安。青川。一由綿州。威蕃柵。抵樓鷄城。皆番之險要。宋神宗時。靜州蠻攻茂州。望隴東道。以孤石泉。成都守孫羲叟。經畫事宜。以石泉爲邑。介綿茂之間。道里闊遠。緩急不相應。非扼其衝要。不足捍外患。於是請改石泉爲軍。德陽人張上行言於羲叟曰。去石泉三十里。威蕃亭地名。柵底。卽唐之威蕃柵也。宜先築堡寨。以禦其來。然後建軍調兵以圖之。於是城其地。樓鷄。隴東道。俱見茂州。

石紐山。縣治南一里。帝王世紀。禹生於石紐。譙周曰。禹生於汶山廣柔之石紐。其地爲剝兒坪。陳壽曰。禹生汶山石紐。至今番人不敢牧其地。宋祁曰。汶川縣有石紐山。志以爲卽此山云。又鳳凰山在縣治北二里。其下有二水合流。形如飛鳳。○三面山在

縣北六十里。
上有龍湫。

瀟水。縣西一里。源亦出玉壘山。分流入縣界。經縣東十里。復東南出。合於新都之瀟水。○安昌水在縣東南。源出三面山。合諸山溪之水。東流入安縣界。又經綿州西而入於涪水。亦曰龍安水。志云。縣南一里有甘泉水。甘冽。縣因以名。

松嶺關。縣西北七十里。杜佑曰。在龍安縣西北七十里。開元二十八年。關廢。今仍爲守禦處。龍安見前安縣。○石板關在縣西六十里。又有上雄關。在縣西北。舊皆爲戍守處。

壩底堡。縣西北四十里。與茂州接界。成化以後。爲戍守要地。其地東抵通寧堡。西連白草番。南拒石泉。北通青片。由壩底而南十五里。卽石板關。東十五里有石泉堡。又東五里爲白印堡。俱壩底將領分兵屯戍。○永平堡在縣東二十里。志云。堡設在山崖。形勢陡拔。控制白草諸番隘口。由永平而西三里。爲奠邊關。關南里許爲火草坪。坪北十五里爲萬安堡。萬安東二十里爲喜定堡。俱屬永平偏將戍守。

大印堡。在縣東北。邊略堡設在山阜。巍然天險。亦白草番出沒要路也。堡西二十里爲茅堆堡。又西五里爲山茅堡。山茅東三十里爲徐塘堡。徐塘北三十里爲伏羌堡。伏羌北六十里爲大方關。俱屬大印將領駐守。志云。大方相近者。有觀子。徐坪。平通。三堡。而諸堡中。徐塘又爲控扼之要。

復土堡。縣西北十里。堡南十里爲青岡堡。二堡之間。有青泗口。路通壩底。爲河東。河西。白草。青片。諸番出入處。○奠酒啞堡。亦在縣西。其相近又有平番。赤土。諸堡。皆控扼白草番之處。嘉靖二十四年。白草等一十八寨。番變聚衆於羊角。白泥一帶。劫掠攻陷平番。奠酒。二關。截占漩平。以阻石泉兵糧之路。撫臣張時徹督偏帥何卿勦平之。志云。舊有馬坪口巡司。今革。

寶珠寨。縣北百二十里。志云。寶珠古寨口。與縣西北百五十里之赤珠古寨口。俱爲番蠻出入要口。昔時立此二寨。以限隔之。今故址猶存。○漩坪橋在縣東二十里。縣之津要也。又有上下索橋。在縣東十五里。

附見

青川守禦千戶所。

府東百二十里。漢剛氏道地。後魏置馬盤縣。兼置馬盤郡。隋初郡廢。縣屬龍州。唐因之。天寶初。改爲青川縣。宋仍隸龍州。端平以後。兵亂縣廢。元初復置。至元二十二年。省入龍州。明洪武四年。置守禦千戶所。隸四川

部司。其地當白草番之後路。東抵白水。陽平關。接陝西寧羌州界。西通白馬路。轉古城驛而抵龍安。南至椒園堡。叢林密菁。多盜賊。北通青塘嶺。直達階文。秦蜀間襟要處也。嘉靖四十五年。改屬龍安府。所城洪武四年築。周二里。

大雄山。

所北十里。山形峻峭。巖出羣山。又飛龍山。在所東三十里。其相近者曰東山。○丁平山在所北一里。志云。元平章丁世珍擊番蠻。嘗屯兵於此。因名。

白水江。

所東三十四里。自陝西文縣流入境。又東過劍州界。至昭化縣入嘉陵江。魏鄧艾伐蜀。作浮橋於江上。明初傅友德伐蜀。渡白水江。卽此。○青川溪在所南。又杲陽河在所西北。亦自汶縣界流入。下流俱入於嘉陵江。

明月關。

所東五里。有巡司戍守。會典。關屬平武縣。又杲陽關在所南。明初傅友德伐蜀。下文州。進拔青川杲陽是也。

北雄關。

在所北。接陝西文縣界。相近又有控彝關。稍南爲瓦舍壩。控彝關。蓋萬歷中增設。一統志。所界自北雄關以下。并杲陽。迪平。白水。三牢。明月。馬轉。清平。胡空。葉棠。三路口。共十一關。

馬湖府。

東至敘州府四百十五里。西至建昌行都司越嶲衛六百十里。南至烏蒙府界百四十五里。北至嘉定州隄爲縣界二百里。自府治至布政司千一百里。至京師九千三百三十里。

禹貢梁州之境。後爲彝獠所居。

或曰。府境卽古夔侯國。漢唐蒙鑿石開道處也。

漢屬犍爲。越嶲。二郡。晉沒於蠻。

華陽國志。越嶲郡有馬湖縣。水通夔道。入江。晉省。水

經若水自三絳又逕馬湖縣謂之馬湖江又左合卑水又東北至朱堤

唐爲羈縻蠻州地屬戎州都督府

志云唐爲馴騁浪瀉四州地總名馬湖部

宋仍爲蠻地元至元十

三年內附尋置馬湖路明洪武四年改爲馬湖府

土官總管安濟歸附因使世守其地五傳至安鰲而叛安治九年討平之改土官爲流官編戶二十五里

領縣一長

官司三今仍舊

府倚山控江屏翼瀘叙唇齒嘉眉隋開皇十七年以南蠻叛命史萬歲南征自越巂進兵經馬湖番山

而進唐乾符二年高駢帥西川修復邛崃關大渡河諸城柵

邛崃關見前重險大渡河見前大川

又築城於戎州馬湖鎮

號平彝軍

及沐源川皆蠻入蜀要路也各置兵數千戍之自是蠻不復入寇宋末蒙古入蜀往往取道馬湖蓋府

爲西南之要地矣

屏山縣

附郭元未置泥溪長官司明初蠻酋王邦彥來歸命世守其地萬歷十七年改置今縣編戶三里

馬湖城

在府西唐乾符初高駢築馬湖鎮城號平彝軍或以爲卽此城也宋時蠻酋皆屯據湖內元初置馬湖路遷於彝部溪口瀕馬湖南岸創府治然其民皆散居山箐無縣邑鄉鎮至正中復置泥溪長官司或曰明玉珍所置也明初改路爲府復移今

治隆慶初始鑿石爲城

有門五城周二里有奇

廢浪川州

在府西南。本蠻地。志云：唐嘗置羈縻長樂浪州。於此。開元十九年。南蠻大會長樂浪州刺史楊盛顯爲邊患。詔內常侍高守信爲南道招慰處置使討之。拔其九城。卽此。後廢。貞元十三年。荆南帥章臯表置浪川州。領郎浪、河渡等五縣。屬

戎州都督府。又府西有廢馴州。領馴祿、天池等五縣。廢驛州。領斛木、羅相等二縣。皆唐所置。羈縻州。領於戎州都督府。宋因之。宋志：浪川、馴祿等州。皆在馬湖江岸。○廢瀘州。在府南。亦唐所置。羈縻州也。領拱平等三縣。又廢柯連州。亦在府南。領柯連等三縣。

皆屬戎州都督府。宋因之。宋志在石門。

路。胡氏曰：卽馬湖南境也。元初俱廢。

寶屏山

府東十里。山如屏障。縣以此名。又赤崖山。在府東北。三里。○鏡山。在府西三十五里。山下有水。澄清如鏡。

雷番山

府西三百八十里。隋史：萬歲征西南彝時。道經此。山中草有毒。經過頭畜必籠其口。行人亦必緘默。若或高聲。雖冬月必有雷霆之應。

馬湖江

在府南。卽金沙江也。自烏蒙府流入府界。經蠻彝長官司南。又東流。逕府城南。至敘州府界。流合於大江。宋慶元二年。地震。馬湖界。山崩八十里。江水不通。寶祐中。蒙古將紐璘侵蜀。自成都入馬湖。旣而復渡馬湖江入蜀。是也。今府西十五里有結

髮灘。江流經此。灘水縈迴。狀如結髮。府西四十五里。又有鐵索灘。夾江兩岸。石壁峭立。每夏秋水漲。舟楫不通。用索懸於江之北岸。舟行至此。數人攀援崖上。拽舟而退。故名。志云：府西四十里。又有鷄肝石灘。峻險。俱在馬湖江中。又有鷄公灘。在府東二里。崖

勢聳立。如鷄公然。

餘詳見大川瀘水。

馬湖

府西百七十里。湖在山頂。長二十里。廣七里餘。中有土山。可居四百餘人。亦謂之龍湖。志云：龍湖四圍皆峻崖。去大江止二里。水與江同消長。日夕作潮。相傳昔曾有龍馬見於此。

泥溪。府西二里。源出叙州府宜賓縣。流入馬湖江。又三公溪。在府西五里。黃龍溪。在府西四十里。金魚溪。在府南三里。又有悔泥溪。在府東十五里。源出寶屏山。皆流注於馬湖江。○鹽井。在府北四里。其水鹹。可以煎鹽。

新鄉鎮

府北二百里。沐川司境內。本名賴。因鄉志云。鎮東去犍爲縣二百里。西至建昌都司千二百里。南接大涼山五百里。萬歷十六年。於此建城垣。設安邊同知駐焉。又於煙草峯。設守備司。以資彈壓。北有水池。爲後營。南有大河壩。爲前營。中有兩河。爲

中營。以成犄角之勢。蓋於諸壘所出沒處。扼其吭而守之也。其水池一帶。則界

老鷹山。大河壩一帶。則界大涼山。雷坡。黃郎等處。則界分水嶺。爲西陲障蔽。

泥溪驛

府東一里。又東六十里有羅東驛。又龍華驛。在府西百里。本名蠻彝驛。萬歷中。改今名。志云。縣有悔泥溪。寧戍二巡司。

平彝長官司

府東南四十五里。元至正間置。明初因之。長官王氏世守其地。編戶一里。

隆馬崖山

司西北二里。山形峻聳。又書樓山。在司東百二十里。以巖石層疊而名。

大紋溪

司治南。又司東十里。有小紋溪。二溪俱出烏蒙府界。流入境。水流洄漩。宛如羅紋。俱流注於馬湖江。向設羅東驛。又檜溪。在司東二里。又大龍渦。在司南二十里。江漚紋溪。入馬湖江。

蠻夷長官司

府西百四十里。元至正間置。明初因之。長官文氏世守其地。編戶二里。

大鹿山

司東南二十里。山谷深邃。多麋鹿。又小悍山。在司西北百里。山崖斗峻。水流急悍。因名。

馬湖江

司治南自烏蒙府流入
境又東入屏山縣界

什葛溪

司西二里源出小悍山又大鹿溪在司東二十里出大鹿山二溪俱流入馬湖江志云司東二十里有水海相傳舊有龍生海中當即馬湖矣

檜溪堡

在司南志云司境有四山龍源青岡黃耶麻坡等處諸蠻與建昌烏蒙沙羅連接萬歷中設檜溪烟溪等堡及龍源巡司以爲守備之禦

沐川長官司

府西五百二十里元至正中置明初因之長官悅氏世守其地編戶二里

神木山

司西二十里舊名黃種溪山永樂四年伐楠木於此一夕自移數里因改今名而祀其山神又南現山在治南半里山高峻爲南境之望永樂五年建神木祠於山上又治北有彝都山亦高聳

青孤山

司東十里山多林木望之鬱然突出羣山之上又龍源山在司西北六十里山頂有潭深不可測

沐川

司北百里源出彝都山曲折流至嘉定州隄爲縣界入於蜀江卽沐源川矣唐咸通十年南詔寇瀘州旣而分兵四出掩至沐源川尋渡江陷隄爲乾符初高駢築沐源川城以扼蠻險皆以此川爲名也志云川旁有峯崖竦立如人新沐故曰沐川

芭蕉溪

司東四十里源出隆馬山又黃種溪在司西二十里源出神木山下流皆入於馬湖江志云舊有蠻彝上官驛

鎮雄軍民府

南至烏撒軍民府二十里西南至烏蒙軍民府二百四十里北至叙州府珙縣界二百二十里自府治至布政司一千五百八十里至京師九千二百三十里

禹貢梁州南裔。代爲蠻彝所居。宋時蠻名芒布部。

志云故名屈流大雄甸。其後烏蠻之裔。熙寧以後。爲羈縻蠻。阿統與其子芒布居此。因名芒布部。

熙寧以後。爲羈縻蠻。

地。尋置西南番部都大巡簡使於此。元至元中。置芒布路。隸烏撒。烏蒙宣慰司。明初改爲芒部府。屬雲

南布政司。洪武十六年。升爲芒部軍民府。改隸四川布政司。

土官龐氏世守其地。廣袤五百六十里。

嘉靖三年。改爲鎮雄軍

民府。

編戶一里。土華考。時土官龐慰嫡子壽繼職。庶子政弒壽竊據。官軍進討。事平。改今名。設流官。七年。蠻酋普奴等叛。尋以事宜。改命壽子勝世襲本土。而流官復罷。

領長官司四。府今省。

府山川險扼。地勢崎嶇。控禦羣番。屏障內地。成化中。程信言。永寧抵江門。

永寧北百里。江門水驛是也。

戎縣。今叙州府川。

貴。雲南。水陸噤喉之會也。普布。芒布。又川貴雲南肘腋腹背之所也。

芒布城。

府西南七里。志云。府舊無城。明洪武中。潁川侯傅友德調指揮鄭祥駐兵芒布。因築土爲城。後班師還。城廢。今名舊土城。又今府治地名納冲。在舊府治西北七里。成化中。舊治燬於火。因遷今治。舊治本洪武中所建也。

烏通山。

府北五里。蠻語首曰烏。立曰通。謂此山巍然獨峙。如人翹首而特立。又綽紐山。在府東二十里。蠻語清氣曰綽紐。謂此山清氣鬱然可愛。○磔砌雄山。在府西百八十里。蠻語石曰磔。鹿曰砌。涼曰雄。謂此山之石類鹿。而又高聳清涼也。又樂安山。在

府北二百二十里。山有數峯。路徑曲折。乃芒布叙州之界山。

白水江

府西北二百八十里。其上游曰八羌河。却佐溪、黃水溪、勿食料溪會流於此。北入叙州府界。合石門等江而注於大江。

納冲河

府東十里。源出烏通山麓。過府治東南流。入苴斗河。又白鳥河。在府東北二十里。源出白鳥地界。南流入烏撒府境之七里關河。○苴斗河。在府南二十四里。其地有六丈山。箐河源出焉。經阿赫關。合納冲河而入七星關河。又八羌河。在府西八十

里。源出烏撒。下流入烏蒙界。又托諾河。在府西南二百五十里。流入烏蒙界。蠻語松曰托。砂石曰諾。以此河畔有松樹及砂石故名。

却佐溪

府西百五十里。下流入白水江。又勿食料溪。在府北百八十里。源出樂安山。西流入白水江。又黃水溪。在府東北二百四十里。下流入勿食料溪。○沱泊溪。在府治西。源出山澗。下流入納冲河。志云。府北百八十里。有鹽泉二。其水俱可以煮鹽。

阿赫關

府南二十五里。乃芒部烏撒地界。洪武二十一年。建有官軍戍守。

懷德長官司

府西百五十里。本却佐砦。嘉靖三年。撫臣王軌討平隴氏之亂。增置四長官司。懷德其一也。

威信長官司

在府南。本毋響寨。嘉靖三年。改置是司。

歸化長官司

在府西南。本彝瓦寨。亦嘉靖三年。改置。

安靜長官司

在府西北。本落角寨。嘉靖三年。改置。

烏蒙軍民府。

東至烏撒軍民府界二十五里。西至建昌衛界四百九十里。南至東川軍民府界百五十里。東北至叙州府界六百三十里。自府治至布政司千三百里。至京師九千八百二里。

禹貢梁州荒裔。歷代爲蠻獠所據。後爲烏蒙部。

志云。故名寶地甸。唐時烏蒙仲牟田之裔。有阿統者始居此。其十一世孫烏蒙時強。因號烏蒙部。宋封阿杓爲烏蒙王。元初歸附。

元至

元間。置烏蒙路。隸烏撒、烏蒙等處宣慰司。明初改爲烏蒙府。

以上曾阿普効順。使世其職。地東西廣五百十五里。南北袤七百六十里。

洪武十六年。

改烏蒙軍民府。

編戶一里。

隸四川布政司。府今省。

府下臨滇黔。俯視巴蜀。地高山險。屹然屏障。亦西南要地也。

烏蒙城。

府東二十里。志云。府舊無城。元初遣兵戍守於此。因築土城。尋廢。洪武中。土官阿普卽元總管府。舊址建立府治。又有小烏蒙。在府治北七十里。四圍皆山。中央平坦。蠻人耕種於此。號爲傑紀。

鐵鑪山。

在府治東。山形如鑪。又我未山。在府東二十五里。有五峯橫列。蠻語五爲我。橫爲未也。○村窩山。在府東南三十里。其山四望平坦。蠻語謂平坦爲村窩云。

博特山。

府東南五十里。有兩峯對峙。蠻語相對爲博特。又撒途山。在府東北八十里。其山懸崖陡峻。蠻語陡峻爲撒途。○涼山。在府西百里。高廣百餘里。絕頂頗平。風氣甚肅。蠻語每夏於此避暑。府西百三十里。又有雪山。其巔冬有積雪。春半方消。又界推

山。在府北六百三十里。與叙州府爲界。

金沙江

府西南二百九十里。其上流自會川衛界會瀘水。流經東川府界。又東北入府境。復東北出。經馬湖府。爲馬湖江。元至正初。雲南諸王禿堅等舉兵。烏蒙土官祿余應之。禿堅敗祿余。據金沙江自固。尋擊平之。今詳見大川瀘水。

撒由河

府西南十里。源出涼山之麓。北流與龍洞河合。○龍洞河在府東北三十里。源出小山石洞中。灌溉田畝。俗謂石洞爲龍洞。志云。府北六百里。有上獠蠻江。卽撒由。龍洞二河下流也。兩山夾水五百餘里。中多巨石。湍流峻急。如萬馬之奔。舟行灘石

中甚險側。經三十餘灘而始

出峽。至叙州府合於大江。

羅佐關

府北二百五十五里。下有羅佐橋。又索橋在府西南北三十里。卽金沙江渡處。

烏撒軍民府

東至貴州畢節衛界二百五十里。西至烏蒙軍民府百九十里。南至雲南霽益州界九十五里。北至鎮雄軍民府二十里。自府治至布政司千八百五十里。至京師九千四百八十里。

禹貢梁州荒裔。代爲蠻獠所居。後爲烏撒部。

志云。故名巴凡兀姑。後爲巴的甸。烏蠻居之。唐時烏蠻之裔烏些者居此。至阿蒙始得巴的甸。其東西又有芒布阿晟二部。皆他曾所居。宋時烏些

之後曰析怒者。始并其地。號烏撒部。元初歸附。

元至元中。置烏撒路招討司。尋改爲軍民總管府。又改軍民宣撫司。後升烏撒烏蒙

等處宣慰司。明洪武十四年。改爲烏撒府。隸雲南布政司。

時大酋那者來歸。置府授之。今土官安氏其裔也。地廣四百四十里。袤二百五十里。

十六年。改

烏撒軍民府。

編戶一里。

隸四川布政司。府今省。

府介諸蠻之中。據高臨險。地形衝要。

土彝考。府有鹽池銀礦之饒。其民習奸利。往往侵掠鄰境。

今自貴州畢節衛而西。凡二百六十里而

至烏撒。由烏撒至雲南霑益州治。不過二百四十里。烏撒驚而滇黔俱不得安矣。天啓初。其酋安效良者。黨於水西。議者謂欲攻水西。先制烏撒。使滇兵出霑益。遏其應援。而分屯天生橋。見雲南尋甸軍民府。等處。以防其飛逸。然後可專意於水西。既而滇兵下烏撒。水西形援益孤。用兵於西南。府豈非必爭之地哉。

烏撒城。

今府治。洪武十四年。傅友德平烏撒。築城。鑿以石。有門四。城周七里。有奇。

大隱山。

府東南三里。林鬱高秀。又東山在府城東。下有龍泉。府南九十里。又有龍山。蜿蜒起伏。官路經其上。志云。府北二里有鳳嶺。一名瞭高山。山勢絕高。可以瞭遠。

翠屏山。

府東北二十里。山巒秀拔。又烏蒙山。在府東北百四十里。兩崖相對如門。○千丈崖。在府西南七十里。下臨可渡河。又石洞在府東南百七十里。有門可入。中容百人。一名華蓋洞。又有赤岡。在府東北五十里。

盤江。

府西百五十里。出亂山中。流逕府南九十五里。謂之可渡河。明初傅友德征雲南。駐師於此。鄭旻曰。今烏撒南八十里。有普德歸驛。門對可渡河。壤河之南。霑益境河之北。烏撒境也。詢之候吏云。河源在衛西百里。注壑而出。盤江實導流於此。今其上有

可渡橋。詳見貴州。

大川及川瀆異同。

七渡河

府西三十里。其水縈曲山谷間。人渡者凡七處。府西南百十里。又有九十九渡水。南八十里。又有桃花溪。皆流合於可渡河。○養馬川在府東百四十里。蠻人牧馬於此。一名野馬川。又北海子在府北二里。源出東山之龍泉。蠻人築二壩以積水。漸成陂澤。恃爲城隍。其環城東南而西者。謂之南海子。廣袤百里。中可耕。又有龍潭灣。在府東南八里。羣山中。其深莫測。元志云。烏撒山崖險阨。襟帶二湖。羊腸小徑。十倍蜀道。二湖卽南北海子也。又烏撒之地。多雨少晴。潦澤常溢。志謂其上植天井之窟。諺云。烏撒天常披氈。三日不雨。是神仙。皆實錄也。

七星關

府東南百七十里。有七星山。置關其上。有七星關。關巡司。與貴州畢節衛接界。今詳見貴州重險。

老鴉關

府東三百里。入畢節衛界。有畢節官軍戍守。又石駝關。在府治東南。石如駝立。關下。因名。志云。府西百里。又有分水嶺關。○趙班鎮在府西百里。有趙班巡司。府東南二百十里。又有可渡河巡司。又黑章遞運所。在府東百九十里。與府治東之烏撒

遞運所俱

明初置

在城驛

府東南十五里。志云。府西一里有烏撒驛。南一里爲烏撒站。又瓦甸站。在府東南六十里。又六十里爲黑章站。又六十里接畢節衛之周泥站。元至順初。川兵擊雲南叛者。因進擊烏蒙。曾祿余分道自永寧。青山並進。陳周泥驛是也。又普德驛。站在

府南九十里。會典作普歸德驛。○饒唐驛。在府南百二十里。又霽

益站。在府南百八十里。南至雲南霽益州六十里。滇蜀通道也。

天生橋

府東北百里。石梁橫截。拱架如橋。而府東八十里。衆山中。亦有橋曰天生橋。俱爲府境控扼之處。

附見

烏撒衛。在府治南。洪武十五年置。屬雲南都司。永樂十二年改隸貴州都司。

守禦七星關後千戶所。在府東南。洪武二十一年置。於七星關。屬烏撒衛。永樂十二年改隸貴州畢節衛。

東川軍民府。東至烏撒軍民府界百二十里。西至建昌行都司會川衛界二百五十里。南至雲南尋甸軍民府界百十里。北至烏蒙軍民府界百五十里。自府治至布政司千四百里。至京師九千七百九十里。

禹貢梁州南裔。代為蠻獠所據。唐時屬於南詔。僞置東川郡。既而蠻復據其地。曰闕畔部。志云。故名東川。甸烏蠻仲牟由之裔。罵彈得之。改曰那札那彝。屬於南詔蒙世。元初置萬戶侯。至元中。改闕畔部軍民總管。尋為東川府。隸烏撒。置東川郡。後烏蠻闕畔強盛。自號闕畔部。

烏蒙等處宣慰司。明洪武十四年。仍為東川府。烏蠻祿設姑歸附。令世守其地。東西廣四百二十里。南北袤二百七十里。隸雲南布政司。十六年。改

為軍民府。編戶一里。隸四川布政司。府今省。府山川環峙。道路險巖。介滇黔之間。分川貴之險。部族富強。甲

於他種。

東川城

即府治。志云：府舊無城。洪武初，建治於馬鞍山。後尋移治於萬額山。南伐木爲柵，以衛府治云。

萬額山

府治北二里。其形上闊而下銳，如豬首然。又府治東有石鼓山，山有大石，如臥牛狀，叩之有聲。蠻人呼爲石鼓。又府治南有白婆山，山頂有泉，四時無盈縮。又有馬鞍山，在府西南十里。舊府治在其北。

絳雲弄山

府西南二百里。接雲南祿勸州界。一名烏蒙山，譌曰烏龍山。亦名雲屏山。高峻百里，有十二峯。北臨金沙江。南詔封爲東嶽者也。今詳見雲南。○七雄山在府東北百二十里。石崖陡峻，又納雄山在府西五十里，亦高廣。

金沙江

府西百五十里。其地有金沙渡。蠻人鑿大木爲槽以濟，卽金沙江津口也。一名納彝江，又名黑水。自會川衛流入界，入濟慮部。又東北歷烏蒙府，至馬湖府境，而爲馬湖江。今詳見大川。瀘水及雲南大川金沙江。

牛欄江

府東南百二十里。源出雲南故尋甸軍民府，至府北境，而合於金沙江。江之下流，江闊水急。彝人用藤索橫江，貫以木筩，過者縛於筩上，用遊索往來相牽，以渡。謂之索橋。今在府北百二十里。○壁谷川在府西南一百三十里。源出尋甸界白澤河。

西流入

金沙江

嚼齒化溪

府東南百里。西流至絳雲弄山，北入金沙江。又府西南有麥則彝溪，源出南山澗中，西北流入託渠溪。又惠沙溪，在府東北百里，流入東川甸中，匯而爲澤，亦流入託渠溪。俱注於金沙江。○海子在府治南，長二十里。又龍泉在府東，出石

鼓山下，有溉田之利。府西南三十里

又有湯池，自石竇中出，熱如沸湯。

永寧宣撫司

東至遵義府界二百五十里，西至瀘州江安縣界百五十里，南至鎮雄府界四百里，北至瀘州合江縣界百六十里，自司治至布政司千八百里，至京師八千七百八十里。

禹貢梁州南境。秦爲蜀郡地。漢爲犍爲郡地。晉以後沒於蠻。唐爲羈縻蘭州。

志云。元和初置。宋乾德二年廢。今唐志不載。

宋爲瀘

州南境。

志云。宋爲江安。合江二縣地。

元置永寧路。

領筠連州及騰川縣。志云。宋置。誤也。

尋改軍民宣撫司。明玉珍時增置永寧鎮邊都元帥府。

而宣撫司如故。明初改爲永寧長官司。

酋長祿照歸附。因置司授之。俾世守其地。廣四百五十里。袤五百六十里。

洪武八年。令升宣撫司。

編戶七里。

隸四

川布政司。領長官司二。今設永寧營。

司山川峻險。水陸交通。唐天寶中。由東路伐南詔。起瀘州。泝永寧。走赤水。達曲靖。此卽今日自川入滇之道矣。元置郵傳。而道益通利。天啓二年。土酋奢崇明作亂。襲據重慶。又陷遵義。瀘州諸處。勢甚張。官軍四集。乃克平之。旣而水西安邦彥作亂。官軍討之。未克。督臣閔夢得言。貴州抵大方路險。賊惟恃畢節一路外通。用兵宜從永寧。始自永寧而普市。而摩泥。而赤水。百五十里。皆坦途。赤水。有城郭可憑。而守宜結營於此。漸進漸逼。四十里爲白巖。六十里爲層臺。又六十里爲畢節。畢節至大方。不及六十里。賊必并力來禦。須以重兵扼之。斷其四走之路。然後遵義。貴陽。克期並進。賊可平也。旣而朱燮元代督五省之兵。五省。川。湖。雲。貴。廣。西也。進討水西。扼各路要害。賊以銳師趨永寧。先犯赤水。燮元使永寧將誘賊深入。而

以他道兵擣其虛。賊遂潰壞。蓋永寧北接叙瀘。南通雲貴。界壤相錯。咽喉所繫也。

廢蘭州。

司東百八十里。志云。唐置州於此。其旁有地名唐朝壩。元置永寧路。在今治西八十里。所謂馬口崖鎮。其北魚漕溪橫其南者。尋又遷界首。在今治西。明洪武四年。築永寧衛城。十五年。土官祿照營司治於蠻彝千戶所故址。舊城有門七。周八里。

奇。有

米利城。

司北八十里。志云。其地有大田。饒米穀。無水旱憂。蓋昔時蠻所置城也。

海漫山。

司城北。志云。山延袤八十餘里。如海水之汗漫。又青龍山。在司南二里。以山形環繞而名。司治西南。又有西珠山。以山形圓潤而名也。又有土保山。在司治南。相傳蠻人土保者昔居於此。○紅崖山。在司東北十里。山高聳。多赤石。爲西面之勝。志云。

司西北五十里有烏降山。秀拔霄漢。林木蒼鬱。又西北六十里爲匹絹山。以山頂飛瀑。下垂如匹絹也。

獅子山。

在司東南。天啓初。永寧遭賊。奢崇明借兵水西。安邦彥遣兵過赤水河。到獅子山。山蓋在赤水河北也。

青山。

在司西南。亦曰青山崖。元至順初。雲南諸王禿堅等作亂。烏蒙曾祿余附之。四川軍進擊。一自永寧。一自青山而進。是也。明天啓初。奢崇明據永寧爲亂。撫臣朱燮元討之。陽列營於納溪。而潛自長寧會兵進討。首攻麻塘坎。觀音菴。青山崖。天蓬洞等處。

乘霧奪險而入。敗崇明之子奢寅於土地坎。追至老君營。涼徽鋪。盡燒賊營。復敗賊於橫山八里。青崗坪等處。直抵城下。一鼓拔之。麻塘坎諸處。蓋皆賊據險立營。備官軍西入處也。箐口嶺。在司東六十里。有箐口關。又馬口崖。在司西南。華崖。在司西百六十

里又西二十里爲梅子坎。

永寧河

在司城西南亦曰水東河亦曰界首河源出落郎連山澗中蓋司東南變境也。有三源北流經司南合爲一復繞流而東北至江門峽入瀘州納溪縣界又北入於川江明洪武二十四年景川侯曹震開通川貴河道謂水之險惡者莫甚於永寧其

灘一百九十有五處至險有名者八十二卽此水也志云司

南十里有甘溪西北五十五里有銅鼓溪皆流入永寧河。

赤水河

司東南百里源出鎮雄府界水腦洞流逕赤水衛又東北合於永寧江明初郭英等出永寧敗賊於赤水河是也天啓初永寧賊借兵水西水西將曾仲英駐兵赤水河謀分兵一自鎮雄而東乘永寧之後一自普市而北攻永寧之前卽此

羅付大河

在司東接遵義府界其下流東南出入於烏江天啓初奢崇明及其子寅作亂官軍克遵義追敗奢寅於羅付大河口是也又有陶公灘在司東南或曰卽羅付大河所經天啓初永寧賊黨符國禎營於司東之三峒官軍自遵義擊之分

軍進陶公灘以牽賊而以精兵夜經三寨抵賊巢爲賊所敗○芝蔴塘在司東南天啓三年水西賊

安邦彥及永寧通賊奢崇明窺遵義及永寧官兵合長納兩路擊之敗賊於芝蔴塘賊從青山遁去

天生池

司西北六十里四面山繞水積於中不假穿鑿故名又靈湫泉在司西五十里有山洞深二丈許泉出其中四時不竭

魚涪關

司東三里洪武四年建有兵戍守又箐口關在司東箐口嶺上○鎮遠關在司西又司西三十里有青岡關又西二十里至貴州普安所之貓兒關又梯口關在司北九十里大關坎口關在司北百里又三塊石關在司西北六十里西北百里又有

江門關卽江門水驛也道出瀘州納谿縣又雪山關在司

南百二十里又界首茶課司在城西北二里洪武二年建

永寧驛

司城北又西北烏降山下有永安水驛又北五十里即江門水驛又三十五里爲峽口水驛所謂江門峽也或謂之石夾口永樂中少監謝安採木於此二十年乃還會典司有永寧土官驛丞又有赤水普市摩泥阿永永安五驛

九姓長官司

宣撫司西南百二十里元初立彝民羅氏黨九人爲總把至元初改爲九姓黨蠻彝長官司明洪武四年改置是司編戶五里

通江溪

司南十五里源出貴州界流入境東北出會於江門峽一名落卜姑溪又魚槽溪在司東五十里馬口崖下西北流會於通江溪

金鵝池

司西南五十里成化三年都掌蠻爲亂議者欲分兵三路南路從金鵝池進攻大壩中路從戎縣進攻箐前北路從高縣進攻都掌是也既而督臣程信分遣別將羅秉忠等由金鵝池進搗都掌云

太平長官司

宣撫司西南二百五十里地名大壩北連都掌南迫芒布西接烏蒙東抵永寧延袤二百餘里元置大壩軍民府授土曾得闡紅等明初廢後諸彝附於都掌屢爲寇亂成化初議於都掌箐前大壩三處設三長官司不果四年討都掌彝

克之改大壩爲太平川設

太平長官司編戶二里

附見

永寧衛

司治西南洪武四年建屬貴州都司又亦水衛在司東南百四十里普市守禦千戶所在九姓長官司東百二十里俱屬貴州都司今見貴州

黎州守禦千戶所

東北至雅州二百四十里南至四川行都司越鴉衛二百六十里西至雜道長官司百五十里北至雅州榮經縣百三十里自司治至布政司六百九十里至京師一萬一千一百四十里

古西南彝筰都地。

史記秦惠文王後十四年蜀相壯殺蜀侯并丹。犂二國來降秦。又武王元年伐丹。犂孔氏曰丹。犂二戎在姚府管內。唐初置丹州。犂州或曰俱在黎州境內。

漢武帝元鼎六年定西

南彝以爲沉黎郡。天漢四年并入蜀郡。

時置兩部都尉。一治旄牛。主外羌。一治青衣。主漢民。並隸蜀郡。

後漢延光初改屬蜀郡屬國都尉。三

國時屬漢嘉郡。晉初因之。永嘉以後李雄據蜀析置沉黎郡。永平中蜀平郡廢尋復置。宋齊因之。

齊志作沉

黎獠郡荒塞無縣邑戶口。

後周置黎州尋廢。隋初屬邛州。仁壽末置登州於此。大業初州廢屬臨邛郡。唐武德初屬雅

州尋復置登州。九年州廢還屬雅州。貞觀二年改屬嶠州。大足二年析嶠雅二州地置黎州。神龍三年

州廢。開元四年復置。

亦爲下部督府。督羈縻二十三州。後增至二十四州。

天寶初曰洪源郡。

時又置洪源軍於城內。志云尋又改洪源郡。今唐史不載。

乾元初復故。宋仍

曰黎州。

亦曰漢源郡。所領羈縻州並如唐舊。

元因之。屬吐蕃等處宣慰司。明洪武八年以州治漢源縣省入。改爲黎州長官

司。十一年升安撫司。

土酋馬氏世守其地。廣二百十里。袤百十里。

屬四川布政司。萬歷二十四年降爲千戶所。

土彝考萬歷十九年黎州世襲安撫副使馬祥

卒。無後。部族作亂。參將吳文傑勦平之。二十四年改爲黎州土千戶所。仍擇馬氏後世其職。

直隸四川都司。今置黎州守禦所。

司南控六詔。西接吐蕃。憑深據險。爲蜀西門。李吉甫曰。黎州之地。關沫若而徼牂牁。居越雋。邛。蜀之中。最爲衝要。樊柔直曰。全蜀五十餘州。恃爲襟喉者。沉黎其最也。

漢源廢縣

今所治故沉黎地。志云。沉黎故城。在所南四十餘里。本笮都國。茂陵書。沉黎郡治笮都。是也。郡旋廢。以其地屬旄牛縣。後漢因之。晉永嘉中。李雄復置沉黎郡。永和中。郡廢。尋復置。宋沉黎郡治城陽縣。蕭齊以後。縣廢。後周置沉黎縣。爲黎

州治。既而州縣俱廢。隋開皇初。復置沉黎縣。仁壽末。爲登州治。大業初。州廢。縣屬臨邛郡。唐初。省沉黎入漢源縣。屬雅州。尋爲登州治。武德九年。還屬雅州。貞觀二年。改屬鶴州。永徽五年。復屬雅州。大足元年。置黎州。治漢源縣。神龍三年。州廢。縣屬雅州。開元三年。復爲黎州治。宋元因之。明初。省元和志。古黎州城。在大渡河外。自唐以來。徒治大渡河內。而水源在城外。章阜始築。今城。東西南三面臨絕澗。惟北面稍平地。多井泉。與諸城鎮。戍烽火相通。爲西南之險要。今所治西北。隔大渡河。千戶所城。卽章阜所築。土城也。明初。因故址修築。甃以磚石。既而土安撫司。馬苟德復營築。司城。今亦謂之沉黎城。周二里有奇。

黎州城

志云。在所東北。聖鐘山下。唐大足初。置黎州於此。貞元中。始移今治。又漢源故城。志云。在所南三十里。隋大業初。置漢源縣。屬臨邛郡。唐徙治於黎州郭內。而以故縣爲漢源鎮。

旄牛城

在所南。漢縣。初屬沉黎郡。後屬蜀郡。范曄曰。天漢四年。省沉黎郡。屬蜀郡。爲西部。立兩都尉。一居旄牛。主徼外彝。是也。後漢因之。延光初。改屬蜀郡。屬國。二年。旄牛彝反。益州刺史張壽討平之。後漸荒廢。三國蜀張嶷傳曰。越嶲郡。舊有道徑旄牛彝

中。至成都。既平且近。自旄牛通絕。已百餘年。延熙中。嶷厚賂其帥。狼路開通。舊道。奏封狼路爲旄牛。牛。王。晉屬漢嘉郡。宋屬沉黎郡。蕭齊後廢。華陽國志曰。旄地名。在邛崃山表。水經注曰。漢沉黎郡。以蜀郡西部置。治旄牛道。名勝志曰。通望郡有古旄牛城。

俗呼爲牛頭城。又旄牛縣有鮮水出徼外。

通望城

所東南九十里。漢旄牛縣地。新唐書云。臺登縣地也。武德元年。析置陽山縣。屬雅州。旋屬登州。州廢。還屬雅州。貞觀二年。改屬瀘州。大足初。割屬黎州。神龍二年。還屬瀘州。開元中。復來屬天寶初。改曰通望縣。宋初。仍屬黎州。慶歷二年。省入漢源縣。

寰宇記。陽山縣。隋大業二年置。唐曰通望。在大渡河北十五里。○飛越廢縣。在所西北七十里。唐儀鳳三年。分漢源縣地。於飛越水置縣。屬雅州。大足初。屬黎州。神龍三年。還屬雅州。開元中。復來屬宋初。因之。尋省。志云。飛越城西。又有飛越山。山下有唐時所築之三彌城。後譌爲三交城。

大渡城

所北百里。唐儀鳳二年。置大渡縣。屬雅州。大足初。改屬黎州。明年。省入飛越縣。乾符二年。高駢帥西川。築大渡城。列險戍守。以拒吐蕃。或以爲卽此城也。宋爲大渡鎮。屬漢源縣。後廢。志云。司北十五里有王建城。地名木瓜園。蜀王建時築。後人因以

城名

瑠璃城

在所南境。大渡河南。唐太和五年。李德裕築。以蠻界瑠璃溪爲名。志云。瑠璃溪在司西南四百里。接蠻羌界。又潘倉城。在司東。亦唐太和中築。五代梁乾化四年。南詔寇黎州。蜀將王宗範等擊之。出邛崃關。敗南詔兵於潘倉嶂。又敗之於山口城。又

破其武侯嶺十二砦。又敗之於大渡河。路振九國志。潘倉在邛崃關南山口城。又在潘倉南。武侯嶺卽武侯城旁之山矣。

武侯城

在所東南。相傳諸葛武侯築。濠塹故壘存焉。唐太和中。李德裕復增築之。爲戍守處。紀勝云。武侯城。在舊黎州城外三里。又有武侯戰場。今爲安靖寨。○銅山城。在所東百八十里。又定番城。在所東南二百二十里。唐章阜所築。貞元四年。吐蕃分兵

寇銅山五年。卓遣將劉彰彩出銅山道。吳鳴鶴出清溪關道。鄧英俊出定蕃柵道。逼臺登城。與蕃部兩林王。其那時大破吐蕃青海。蠟城二節度軍於北谷。進拔於葱柵。北谷即臺登北谷也。見行都司。

伏義城

所南九十里。唐李德裕築此。以制大渡。清溪之險。又有大定城。在大渡河南。唐志。自青溪關南。逕大定城。一百一十里而至。臺登也。○要衝城。舊志云。在所南百里。臨大渡河。唐貞元中。章阜所築。俗呼炒米寨。亦曰炒米城。或曰今在越嶲衛西三十

里。恐誤。新唐書。黎州有定蕃。飛越和孤三鎮兵。又有武侯。廓清。銅山。肅寧。大定。要衝。潘倉三鎮。伏義。琉璃。和孤十一城。皆太和五年。李德裕修築。以奪蠻險之處。

廢葉州

在所西南。黎州所領羈縻州也。唐武后長壽元年。遣張元遇。迎吐蕃降。會曷蘇等於大渡水西。曷蘇事覺。爲吐蕃所擒。其別部。曾骨插。率羌蠻內附。元遇即其部。置葉州授之。仍於大渡西山。勒石紀功。是也。尋改爲米川州。

邛崃山

所北五里。邛人入蜀。必度此山。故名。亦名邛崃山。蓋山接榮經縣界矣。其道至險。有長嶺。弄棟。八渡之難。楊母關路之峻。楊母關者。楊氏婦始造。關其上。也。又登高山。在所西五里。峯巒高聳。俯瞰城中。通衢官舍民居。一一可數。上有一小阜。曰望州

坡。○聖鐘山。在所東北五里。昔嘗掘地得鐘。因名。

舊黎州城在其下。或曰山近武侯城。一名武侯山。

大田山

所西南三十里。下有大井水田。萬歷二十四年。改立黎州土千戶。所於司南大田壩。壩蓋在山之東麓。又寶蓋山。在所東南二十里。山形如蓋。俗名涼徽山。又司南三十里有盤陀山。以山勢盤回而名。○試劍山。在所南八十里。嶄然高聳。上列三峯。

中峯又析爲二。狀如劍削。又避瘴山。在所南九十里。近大渡河。山側有二峒。一空闊高燥。一有水出其中。土人名爲乾濕洞。夏秋之交。境多風瘴。飛鷲羣集其中。至立冬前後。瘴已乃飛去。土人避瘴於此。出入每以鷲爲候。又通望山。在大渡河南三十里。與衆

山相連。入瀾州界。

唐以此山名縣。

冲天山

所東八十里。險絕無路。僅通樵採。古碑云。沉黎界上。山林參天。嵐霧晦日。謂此山也。又和尚山。在所東百里。山峯矗立。盤紆十餘曲。方至其巔。其相接者。曰獅子山。亦高聳。○朝陽山。在所北百里。志云。隋唐時。嘗置朝陽縣於山下。城址猶存。今正史

不載。又飛水山。在所東北二百五十里。與榮經縣接界。險惡不通人跡。

飛越山

所西北百餘里。山高險。兩面與羌戎接界。為沉黎西境之要害。唐飛越縣以此名。又畫崖山。在所西北二百五十里。山勢險峻。不通人跡。山外即牛蕃界。○笋箕山。在所西北五十餘里。曰前箕。又行數十里。曰後箕。山多笋。又多林木。樵蘇者以為衣

食之源。號曰錢箕。宋紹興間。嘗立箕租。以贍學。歲收緡錢八十千。又白崖山。在所西北二十里。山險峻。有風穴。亦名風穴山。山北有仙人洞。稱幽勝。又雅山。舉郡國志云。在漢源縣。即離山。舉也。秦時蜀守李冰所鑿。離古雅字。雅州之名。蓋取於此。

大渡河

所南九十里。源出徼外。經雅州蘆山縣北。而入州境。自州西折而東南。入建昌行都司界。寰宇記。大渡河自吐蕃經雅州諸部落。至黎州東。而入通望縣界。為黎州南邊要害。九國志。黎州三面阻大渡河。南至大渡河百里。東南百二十里。西南二百

里。是也。詳見前大川。

漢水

所南二十里。一名流沙河。源出飛越山。寰宇記。漢水在漢源縣西北二十里。從和孤鎮山谷中。逕飛越縣界。至通望縣。合大渡河。不通舟舡。每至春冬。有瘴氣。中人為瘡。又羅目溪。在通望縣北。其水流逕山谷中。入嘉定州峨眉縣界。

兩澗水

在所西。志云。所東西各有澗。致登高山下。合為一。漢源之田。仰此以灌溉。○渥注池。在蠻部中。產良馬。其前後之田。皆膏腴也。

清溪關

在所南大渡河外。唐時為控禦南蠻之重地。或云。即清溪鎮也。唐末僑置寧州。於此。去黔州二十九日。行洪源志。關去雋州七百二十里。似誤。詳見前重險。

黑崖關

所西二十里。洪武十六年置。志云：司西一路爲黑崖關所轄。有黎州上七枝等蠻。又一路自椒子岡冷磧寨直抵長河，則爲大西天烏思藏進貢路。諸關堡皆大渡河官軍戍守。其間東西峻嶺中流一河，有大壩筒車等五姓蠻結茅以居，貿販茶利。

資爲捷徑賦稅

未嘗敢後也。

松平寨

司東南百八十里。安撫土舍馬氏所居也。九州志：黎州石樓之地，多長松，不生雜木。卽松坪寨矣。自炒米城抵松平寨，連接峨眉縣，凡三百六十里，皆高山峻坂，密樹深箐，熟莽下七枝，名曰落凶，曰咩哄，曰沙直，曰俺立，曰母姑，曰阿輝，曰他他，皆隸

松坪

馬氏

安靖寨

在所西，相傳卽諸葛武侯戰場也。亦曰安靜砦。相傳又有白水寨及大小壩等寨，俱宋置。乾道九年，青羌吐蕃奴兒結等侵掠安靖寨，至大小壩。淳熙二年，白水寨將王文才復誘之盜邊。州守陸柬之誅文才而禍熄是也。○砂坪砦在所東南，接峨

眉，隸爲之界。苗寨也。宋乾道中，砂坪番高志良爲亂，犯雅州，闕

門。明嘉靖末，木瓜番作亂，出砂坪，嘉定峨眉，隸爲皆震擾。卽此。

彌金堡

在司西。唐書：黎邛二州西百里有三王蠻，謂之淺蠻。蓋俗都彝白馬氏之遺種。有楊、劉、郝三姓爲雄長。稱王，部落疊疊而居。號曰彌金。後又有趙王二族，共爲五部，皆去黎州百餘里，限以飛越嶺。其居疊石爲彌，積糗糧器甲於其上。朱梁乾化五年，

蜀王建以楊、劉、郝三王潛通南詔爲詞，導斬之，毀彌金堡。自是南詔不敢犯邊。史炤曰：彌，大也。多也。音丁么反。胡氏曰：黎雅西南皆大山長谷，所在深遠，蠻居其中。劉、郝、楊三王部落居，皆近漢界，謂之淺蠻。○消瘴堡在司南，與避瘴山相近。志云：司南抵大渡

河，舊有文武消瘴香樹，黑石、流沙等堡，爲戍守處。

沉黎驛。所治北二里。明初置。志云。所南百四十里。舊有河南驛。又南百二十里。有鎮西驛。入建昌越瀾衛界。又大渡河巡司在所南九十里。

鬻馬場。在司南。亦名買馬務。舊又有茶馬務。唐時劍南則市馬於文黎。珍。敘。等州。號川馬。王建亦於汶黎。雅。茂。等州市湖馬。宋韓億知益州。移永康鬻馬場於黎州。以灌茂地接西川番部。歲來互市。覘我虛實也。今市馬者多由成都中江縣轉販入黎雅云。

又宋志有博易務。在廢飛越縣。

大渡河守禦千戶所。在黎州所治西北隅。洪武十五年。建。今亦置大渡河守禦所。

天全六番招討使司。東至雅州界百里。南至雅州榮經縣界六十里。西至西番長河西宣慰司界一百四十里。北至董卜韓胡宣慰司界五十里。自司治至布政司五百五十里。至京師一萬一千二百九十里。

古西南彝地。漢屬蜀郡西部。梁陳時爲蠻獠所據。唐宋時皆爲羈縻之域。隸於雅州。元置礪門。魚通。黎

雅。長河。西寧。等處宣撫司。屬吐蕃等處宣慰司。後改六番招討司。一云初名六安。後改六番。又分置天全招討司。明初

合爲天全六番招討使司。土酋高國英來歸。世守其地。廣一百九十里。袤二百十里。所轄部落曰馬村。蘇村。金村。楊村。隴東村。西礪村。是爲六番也。隸四川都司。

司襟帶黎雅。控扼蠻獠。爲西蜀之屏蔽。通南詔之噤喉。雅州向以三路爲要害。此所云始陽路也。勝覽云司

爲魏始
陽縣地

天全城

今司治漢徙縣西魏始陽縣地元分六番置天全招討司明洪武初并二司爲一尋鑿石爲城有四門周四里

禁山

司西二里兩崖對峙高峻險絕中有飛流四時不竭古謂之禁門關又龍頭山在司北二里又北二里爲雲頂山皆峭巖○泥山在司東三里四時積雨山多泥濘一名梅嶺以梅賞生其上也有金鳳山在司東北二里山形聳峙因名

多功山

司東五十里昔禹鑿此山以通峽水用功甚多故名又女城山在司東百四十里相傳宋元間樞招討家女將守此壘石爲城遺址尙存又東七十里有鎮西山志云三國漢時姜維曾駐師於此也又臥龍山在司東二十里相傳孔明南征嘗屯軍

於此○旂囊山在司東南二十里狀若旌旂又

東南六十里有元空山卓立天半清雅絕倫

玉堡山

司南五里亦曰玉壘山以積雪如玉也其相近者又有白崖山矗立如雪亦名雪山圖經自長河西至董卜砦二百餘里皆遶雪山而行雪山垂盡有山曰大鐵圍山蓋西境高寒山常積雪故多以雪山爲名

和水

司南四十里勝覽云源出巒界繩摩羅岩州是也東流經司境又東入雅州界合於平羌江○硫黃溪在司東三十里溪水作硫黃氣浸灌瘠田禾苗特盛

禁門關

司治西禁山下又紫石關在司西百里仙人關在司西六十里俱雅州千戶所官兵戍守

礮門砦

在司東與雅州接界有守禦千戶所洪武中百戶盛茂壘石爲城險固可守屬雅州千戶又西有柘木場亦要口也明初重築市洪武五年命左都督徐增壽曰礮門拒河西口道路狹隘跋涉艱難市馬數少聞自礮門出柘木場徑抵長河西口通

雜道長官司。道路平垣。爾宜檄所司開拓。以便往來。是也。餘詳見雅州榮經縣。

○冷磧岩在司西南。志云。有冷磧等十八寨。爲三十三種番人出入之路。

劍山屯。

在司西南。唐貞元中。章臯分兵侵擾吐蕃。攻下羊溪等三城。取劍山屯。既而吐蕃大發兵。欲出西山。劍山收嶺州以絕南詔。是也。○安橋在司西三十五里。以竹索爲之。路通番界。亦曰龍安橋。又太平驛左司。治西明。永樂八年設。

松潘衛。

東南至龍安府三百三十里。南至疊溪所一百八十里。北至陝西洮州衛界八百六十里。西至吐蕃草地界四百八十里。自司治至布政司七百六十里。至京師一萬一千四百七十里。

古氏羌地。秦漢時亦爲羌戎地。

劉昫曰。松州歷代生羌之地。漢時招慰之。置護羌校尉。別無州縣。後魏時。白水羌僉舒活據此地。

後周置龍涸郡。兼置扶州。

治嘉城縣。後周

本紀。天和元年。吐谷渾龍涸王莫昌率部落內附。以其地爲扶州。是也。

隋郡廢州存。

隋志。後周置扶州總管府。開皇初府廢。三年郡廢。七年改鄆州曰扶州。而嘉誠之扶州廢。鄆州見陝西文縣。

大業初。屬同昌。汶

山。二郡。唐武德初。置松州。

貞觀二年。置都督府。督羈縻二十五州。其後多至百有四州。皆生羌部落。或臣或否。無縣邑戶口。

天寶初。曰交川郡。乾元初。復爲松州。

廣德初。陷於吐蕃。宋仍爲吐蕃地。元時內附。屬吐蕃等處宣慰司。明洪武十一年。置松州。潘州。二衛。尋

并爲松潘衛。二十年。改松潘等處軍民指揮使司。

有左右中前四千戶所。俱在治內。編戶二十五里。

隸四川都司。嘉靖四十二年。改

松潘衛。領千戶所一。長官司十七。安撫司四。今因之。衛控制番戎。山川險峻。川蜀之襟帶。而亦關隴之

藩籬也。形勝志：衛東連龍安，南接威茂，西盡吐蕃，西北門與洮岷連壤，直接鹵界，蓋四面皆險也。說者謂松潘爲西陲重地，深入番境，東南兩路僅通一線，故

置關設堡，綢繆聯絡，爲慮切焉。然自宣德以後，患多在蠻族，萬歷二十四年以來，患又在北部矣。說者又謂松潘，蜀西之門戶也。漳臘，又松潘之咽喉也。高屯堡居漳松之間，爲適中要地，宜添設戍守，以犄角漳臘，屏衛松潘，然勢且日蹙矣。夫松潘舊界廣六百七十里，袤千六十里，今乃亟亟於三十里之漳臘乎，噫，無具甚矣。

邊略云：松茂之俗，大抵相似。自松達茂，不三百里，路循江岸，莽瀾碁布，山岩如蜂房，然明初以戎俗尙異端，故於松潘復立番僧二人爲國師，曰商巴，曰綽領，二人爲禪師，曰黎巴，曰完卜，商巴事道，黎巴事佛，皆受銀印分建寺，視於諸寨落，化導番族。宣德二年，漸倡誘其屬攻圍城堡，遣兵攻勦，不克。三年，復征之，猶弗靖。八年，益調兵進討。十三年，撫臣寇深議伐之，景泰二年，復議討之，患稍息。天順五年，復熾，入龍州石泉等處，成化十一年，勢益張。十三年，撫臣張贊督官兵攻滅，毀坪，擄弱白羊，鷄，飲溪，大白，飲馬，地，通林等二十一砦，又攻破木瓜，竹頭坪等砦。於是商巴等二十六族降。十四年，僉事林璧進攻黃頭，復水諸砦，別將復攻西坡，禪宛等寨，又分兵爲五哨，一從靖彝崗，一從播鼓坪，合攻西坡，一從回子嘴，一從壽壩，合攻列四柯，一直攻雙橋兒寨，又分精兵，一從牛尾巴山口，一從雙橋兒山嶺，進攻樹底砦，一從麻峇山口，一從山嶺，進攻麻峇砦，一從永鎮堡山崗，一從禪定山口，進攻禪定砦，一攻空撒寨，前後殺獲甚衆，會裨將謝琳等窮追牛尾巴山賊，被殺我軍奮氣，蠻亦困憊，乃輸款。宏治中，蠻復繼官軍失陷，南路梗阻。正德二年，官兵又殺其綽領等國師，雪耶三出，諸番怨恨，嗣後本寺小宛卜等屢屢圍殺官軍，松城之外，不敢晝牧。十一年，別將張傑等整兵擊賊，賊稍斂，嘉靖初，烏都鴉，鴉兒，雞公，刁農，五砦，番蠻糾合黑虎等寨八百餘番，攻圍長安等堡，阻絕南路，勢甚猖獗。十二年，撫臣朱廷立等調官兵協勦，烏都等十一砦，次第皆平，又屠遮花砦，於是黑虎等寨亦送款，自是寇患稍息。萬歷初，河東羌爲亂，十四年，討降之，時河西恃長江之阻，頗逆我文告，至是亦震懼，請命。王廷相曰：松茂諸山，居止皆依山險，巖石爲室。

高者十餘丈。謂之圃房。天氣多寒。土地尚鹵。不生穀粟麻菽。番性勇慧嗜利。往往侵奪內地。使民失業。滋茲土者。非以德懷之。以計困之。患未易弭也。

嘉誠廢縣。

今衛治。三國漢時爲平康縣地。屬汶山郡。晉因之。後沒於羌。尋爲吐谷渾所據。後周天和初。得其地。置嘉誠縣。龍涸郡。及扶州治焉。隋仍曰嘉誠縣。屬扶州。大業初。屬汶山郡。唐武德初。改置松州治焉。廣德以後。廢於吐蕃。劉昫曰。嘉誠本

生荒地。後魏時。白水羌舒彭遣使朝貢。乃拜龍驤將軍甘松縣子。始置甘松縣。魏亂而絕。後周復招慰之。於此置龍涸防。天和六年。改置扶州。隋改甘松爲嘉誠縣。或曰劉昫誤也。甘松蓋在陝西岷州境。城邑考。今衛城。明洪武十七年築。卽隋唐嘉誠縣地也。

盤石爲城。有濠環之。門五。城周七里。有奇。

龍鵠城。

在衛東。志云。龍涸本名龍鵠。後魏太和九年。宕昌王梁彌博爲吐谷渾所逼。奔仇池。仇池鎮將穆亮帥騎三萬軍於龍鵠。擊走吐谷渾。改立梁彌承。而還。後周龍涸防蓋置於此。杜佑曰。龍涸城爲吐谷渾之南界。去成都千餘里。是也。宕昌見陝西岷

州衛。仇池見陝西成縣。

平康廢縣。

在衛西南。蜀漢時置平康縣。屬汶山郡。延熙九年。汶山平康犇反。姜維討平之。是也。晉仍爲平康縣。亦屬汶山郡。後廢。後周復置隋因之。屬會川。尋屬汶山郡。唐初廢。垂拱元年。復置平康縣。屬當州。天寶初。改屬松州。後廢。○交川廢縣在

衛南。本嘉誠縣地。隋開皇初。析置交川縣。屬會州。尋屬汶山郡。隋志。縣有關。官是也。唐仍爲交川縣。屬松州。後廢。寰宇記云。交川縣亦後周天和。中置。誤。

廢潘州。

志云。故潘州在衛北七百五十里。漢武遂諸羌渡河。湟屠塞外。築此城。置護羌校尉。禦之。唐廣德初。松州以北。皆陷於吐蕃。宋崇寧三年。秦鳳招納司言。階州生番納土。得邦。潘疊三州。潘州蓋屬吐蕃。首領潘羅支。故名。又分潘州爲上下中三州。元

屬吐蕃宣慰司。明初本設松州。潘州二衛。後并爲松潘衛。今阿失寨。蓋上潘州也。班班。即下潘州地也。中潘州界其間。其地愈北。山愈平。舊漳臘之設。在下潘州。邊略中潘州去衛二百五十里而遠。

廢岵州

在衛西北。唐貞觀中。黨項部細封拓跋等氏相繼來降。以其地置岵。奉岩。遠等州。又軌州亦在衛西境。貞觀三年置。唐史黨項漢西羌別種。魏晉後微甚。周滅宕昌。鄯至。而黨項始強。其地古析支也。東距松州。西距葉護。南春桑。迷桑。等羌。北吐谷潭。

山谷崎嶇。亘三千里。姓別爲部。太宗置松州都督府。督羈縻岵。懿。麟。雅等二十五州。是也。○廢麟州。在衛西。唐貞觀五年置。以處生羌。又廢劍州。唐永徽五年。羌酋凍就內附。以其地置劍州。俱屬松州都督府。

廢霸州

衛西南二百五十里。唐貞觀中置。十二年。霸州山獠反。殺其刺史向邵。隋州廢。儀鳳初復置。屬松州都督府。尋復廢。天寶初。招附生羌。置靜戎郡。治信安縣。乾元初。改爲霸州。貞元中。劍南節度使章阜招納降蠻。處之於維。保霸等州。是也。又廢柘州。

亦在衛西南。通典。柘州東至靜州三十里。南至維州三百里。本生羌地。顯慶元年置。天寶初。改爲蓬山郡。領拓縣及喬。珠二縣。又有廢拱州。顯慶中。以生羌鉢南伏湏恐部置。與柘州俱屬松州都督府。靜州。見疊溪所。○廢關州。在衛西境。相近者又有廢諾州。俱唐貞觀五年置。以處黨項及降羌。屬松州都督府。十二年。吐蕃破黨項。白蘭。諸羌。屯松州西境。尋進攻西州。敗州兵。關州。諾州二部遂叛。歸吐蕃。尋復內屬。

雪欄山

衛東三十里。山勢蟠懸。四時積雪。其色如銀。俗呼寶頂山。亦名雪嶺。峻崖路險。有雲欄關。又風洞山。在衛東五十里。山高險。行數里。始至其巔。上有風洞。深不可測。志云。洞多惡風。每午輒大作。則灰沙蔽天。人馬俱辟。易寒氣。人觸之多死。否則噉。

息旬日始止。蓋山。

嵐霧結之氣所發。

紅花山

衛南十五里。有屯田。名紅花屯。岷江所經也。又牛心山。在衛東南十五里。峯巒圓秀。若牛心然。又東四十里。爲火燄山。山無草木。色如赭。○金蓬山。在衛東南五里。志云。羌人金蓬者。昔居此山。

甘松嶺。衛西北三百里。亦曰甘松山。一名松桑嶺。土人謂之松子嶺。後魏有甘松縣。唐置松州。皆以此山名。新唐書。開元十九年。吐蕃請互市於甘松嶺。宰相裴光庭曰。甘松嶺。中國之阻。不如許赤嶺。是也。今大江經其下。杜佑曰。甘松嶺。乃江水發源處。似

誤。赤嶺見陝

西。西寧衛。

大分水嶺。衛北二三百里。其山高峻。水分二流。或以爲大江導源處也。又小分水嶺。在衛北九十里。其山平坦。有龍潭。其水亦分二流。○羊峒在衛北。接陝西洮州界。志云。松潘東通任昌。蠟梅。北接羊峒。洮州任昌。蠟梅。蓋番族也。

野狐峽。在衛西境。唐貞觀八年。別將李道彥分道擊突厥。至闕水。黨項酋長拓拔赤辭等屯野狐峽。拒之道彥不得進。爲其所敗。退保松州。

岷江。在衛西。江源記。岷江發源於臨洮木塔山。山頂分東西流。由甘松嶺八百里。至漳臘西。其水漸大。復逕鎌刀灣。達松潘。於下水關入紅花屯。達疊溪界。一統志。河西北六十里有潘州河。卽岷江矣。河東。河西。諸蠻。蓋以江爲界。云。餘見大川及川瀆異同。

涪江。在衛東。發源小分水嶺。東南流入小河所界。又東南入龍安府。漢志注。涪水出剛氏道。徼外。南至墊江入漢。是也。詳見大川。

闕水。在衛西北。唐貞觀八年。李道彥分道伐吐谷渾。經黨項中。至闕水。出不意襲敗之。黨項忿怒。拒道彥於野狐峽。道彥敗。還松州。十二年。命侯君集等分道伐吐蕃。將軍牛進達出闕水道。卽此。胡氏曰。闕水在故黨項中。羈縻闕州。以此名。今亦見陝西西寧

衛。○響水泉在衛北六十里。泉

流湍急。有聲。居民資以灌溉。

望山關。衛東十里。又東二十里曰雪欄關。在雪欄山上。又二十里曰風洞關。在風洞山上。皆峻險。志云。風洞關北有鹽井墩。卽古鹽川廢縣。似誤。○黑松林關在司東七十里。地多黑松。因名。一名松林堡。又東十里曰伏羌堡。其相近者曰紅岩堡。亦曰紅崖

關皆東路
設險處也。

三舍關

衛東九十里。東至小河所。此爲適中之地。關東十里爲鎮遠堡。又東二十里爲小關子堡。又東十里爲松堽堡。又東十里爲三路堡。又東八里爲師家堡。又東十里爲四望堡。堡東二里卽小河所也。志曰：三合關有偏將駐守。所轄上至望山。下至四望。其十三關堡四岩絕壑一線。僅通羊腸鳥徑。峭磴危湍。險巖萬狀。附近有水牛、毛公、羊洞諸番。不時窺伺。嘉靖中。何卿鎮松潘。節制東南。大修長安馬路。師家永平等堡於善地。增修禦寇靖虜諸墩。以扼險要。長安堡見茂州境內。卽長寧堡。馬路堡見疊溪所。

西寧關

衛南三十里。其北八里曰熊楨屯堡。亦曰熊溪屯。南路關堡之首也。有鐵爐溝諸壘在界內。萬歷中。河西商巴導土韃伏於屯。雄溪左十三里卽東勝堡。○安化關在衛南四十五里。其北七里爲雲屯堡。南十里曰鎮革堡。又南七里曰新塘關。又七里曰艾蒿堡。志云：衛南七十里有新鎮關。其北十五里曰百勝堡。其南十餘里曰龍縉堡。皆南境之襟要也。

歸化關

衛南百里。志云：唐嘗置羈糜歸化縣。屬霸州。關蓋因以名。地形險要。有龍溪等砦。大小橫梁爲諸番出沒處。自衛城南至疊溪之永鎮堡。此爲適中之路。關南二十里爲北定關。嘉靖七年。守將邊輪與橫梁。暨兒等番戰敗。沒於此。邊略松潘至茂州。三百里。山嶺險惡。一變擲石。百人不能過。其路隨河曲折。巖下山搶掠爲易。富有以削平而制禦之。

浦江關

衛南百五十里。有別招、大小耳別等寨在界內。寰宇記：歸化縣有大驪山、小驪山。在霸州西北十里。號符堅城。又於小龍山上村置牙利縣。或卽大小驪故迹矣。關南四里曰平番堡。宏治中科臣張文言：松潘南路浦江關。地勢稍平。介松疊之間。極

爲要害。若聚兵屯糧。築城固守。三面聯絡。什伍相保。卒然有警。松疊聲援。可立應也。

平彝關

衛南百七十里。卽平彝堡也。其地寬平。可容千騎。爲四十八寨。飲盟歃血之地。卽黃沙壩矣。又南六里爲金瓶堡。又南七里爲鎮平關。又南七里爲鎮番堡。又南十里爲靖彝堡。又南十里爲平定堡。自平定堡至疊溪所之永鎮堡。止八里。亦松茂接界處也。志曰。萬歷十四年。於平彝堡建城堡。增將領。所轄上至西寧。下至平定。共十七關堡。其附近諸番有河東大姓。屬牛毛土官管轄。河西小姓。屬羊毛土官管轄。所謂牛腦羊腦也。蠻砦以數十計。其最強者爲烏都等砦。亦屬茂州。北境與松潘相出入云。

流沙關

衛西北十四里。敵騎經由地也。萬歷二十八年以後。遇秋防。嘗以重兵駐此。四裔考。松潘西至流沙關。相連天竺。西南連紅土坡。生番多係北部出沒。地勢遼絕。非可限越云。

虹橋關

衛北三十一里。又北去漳臘堡七里。爲衛境之北隘。有落虹橋。長二十丈。餉道必經之地也。關南七里曰譚廓屯堡。又南七里爲斯舍屯堡。又南六里爲羊裕屯堡。堡南六里卽衛城也。志云。虹橋西北十五里爲絕塞墩。北界黃山尖。殺鹿塘。黃勝草場等處。路通洮岷。宣德三年。蠻族作亂。陳懷泰詔趣救。由此道入解松圍。今爲番部間阻。下潘州白利等番。或由阿玉嶺。或由鐵門墩。出抵寒盼。祈命諸寨。貿易茶斤。稍失防範。豐端輒起。且阻絕長溝。救援難及。議者欲於墩前石砌聯城一座。直抵河下。以通水道。又依山掘壕。絕其乘高來犯云。

漳臘堡

衛北三十八里。舊治於下潘州。在司北七百餘里。景泰中。撫臣羅綺記曰。漳臘。潘州城故址也。下有岩穴。空洞幽邃。廣可容列騎。旁有玻璃泉。冬夏淵然不竭。其土地膏腴。山川秀麗。自唐盛時所開拓。而旋入於吐蕃。洪武十一年。始建置屯堡。且耕且守。邊人安堵。宣德二年。爲氏羌竊據。景泰六年。復收其地。蓋自是以後。益徙而南。今且撫松州之背矣。邊略。漳臘有隘口。可通北部。嘉靖十一年。寇賊深入爲害。撫臣宋滄議於漳臘後山。創建靖鹵墩。西小高嶺。建禦寇墩。設兵戍守。二十年。復展修城堡。增

置官軍并築邊牆一萬三千五百三十丈。又於大壩建立一堡。修築城垣於西山平壩。更修一墩以防敵騎侵擾。萬歷六年。備兵使者楊一桂以漳臘所屬鎮。兩絕塞。譚廓等十七屯堡。去松遼遠。支糧不便。議於漳臘。舊某修建新倉。改運關支。卒伍稀便。二十八年。敵騎突自寒盼。黃勝草場。分道馳入圍漳臘。守將張良賢破之。又追破之於思答弄。寇遁去。志云。漳臘一鎮。五隘。九屯。一十八墩堡。延袤二百餘里。襟帶山河。雜居番族。其最切者。有寒盼口。上中潘州。上下羊洞等隘口。自漳臘北去。遼廓幽遠。一望無際。萬騎可從容矣。思答弄地在堡西北。

高屯堡

衛西北二十里。北去虹橋關八里。又南八里。爲穀粟屯堡。志曰。高屯堡在虹橋之內。禦寇之下。譚廓之西。乃適中要地。松城之藩屏也。萬歷三十七年。嘗議城此。與漳臘爲犄角云。

鎮南堡

在漳臘北十五里。其後爲天險墩。前爲觀化墩。東於襄臺。西制兩臺。聲勢相望。直北則爲敵貫壩。舊掘品字壕坑數百。以防敵人侵擾。北去三里。爲城牆岩。東臨河畔。西抵山麓。掘壕寬深丈許。長六百餘丈。河西爲川。盼溝。壕塹之制亦如之。越溝二

十里。登阿玉嶺之巔。可矚黃勝草場。場之東有阿玉口。凡二十里。透嶺出川。盼則東西南北。惟所馳驅。議者欲於天險。觀化。二墩。充廣寬拓。石砌牆垣。一周外掘壕塹。以防衝突。庶幾扼其吭。萬歷二十八年。番騎圍漳臘。攻鎮南。守將杜世仁禦之。又攻制兩臺。復敗却。志曰。鎮南堡北二十里之柏木橋。卽塞外矣。

水草坪

在衛東。又衛東境有豬兒嘴諸險。正德初。撫臣劉洪言。松潘天寒地瘠。物產不多。貢販者以險遠難致。東路自江油縣入山口。七百餘里。如豬兒嘴。野豬山等處。甚險。然俱可開通。偏橋如七里閣。黑旋窩。泥兒灣等處。甚危。然有可改河移之彼岸者。

有可用石層爲堤者。有新開一路。至水草坪與舊路接。當

立一墩。宜相度修改。非惟糧運便益。而物價亦稍減矣。

赤磨鎮。在衛東北。唐武德七年，扶州刺史蔣善合擊吐谷渾於松州赤磨鎮，敗之。卽此。○古松驛在衛治南，又歸化驛在衛南百里，鎮平驛在衛南百七十里。三合驛在衛東百四十里。志云：衛東九十里，有松林堡站，又東八十里，有三路堡站。

人荒寨。

在衛東南。番砦也。萬歷六年，備兵使者楊一桂言：松潘諸番最桀驁者，無如丟骨人荒沒舌三寨。屢爲邊患，議先勦之。旣而三砦變謀劫軍餉，糾衆伏於安化關之凝水溝，突傷官軍。別將曹希彬等擊却之，復追敗之於安貫頂。未幾，變衆復熾，官軍

禦之於安貫頂及董草嶺諸處，皆敗之。乘夜進攻，焚其丟骨人荒小砦。七年，丟骨砦變突犯，裨將李承芳等奮擊，羣番潰走。官軍進擊其斂坎，焚河西大小碉房五十餘座，追至河東。番皆震懾，叩竹林洞等四十八寺砦首領俱率其衆降。三砦始戢。

小河守禦千戶所。

衛東百九十里。古曰涪陽。宣德四年，調成都前衛後所於此，爲小河千戶所，增置城堡，又添調官兵，更番戍守。編戶一里，今設小河營。

師家山。

所北二十里。一名文山。宋時有師文二大姓居此山麓，有文山關，又有師家舖，與龍安府接界。

涪水。

所北二里，自衛境流入，又東流入龍安府界，其水淺隘，故有小河之稱。

葉堂堡。

所東南十六里。志曰：小河以東凡七堡，惟葉堂爲要隘，有官軍屯戍。東通白馬，毛公，西逼竹頭，野豬，白草，諸寨。其西北六里曰峰岩堡，○馬營堡，在葉堂東四里，又東七里爲水進堡，又東八里爲鎮彝堡，又東十里爲乾坤堡，皆有兵戍守。

鐵龍堡。

所東七十六里，有兩山對峙，峭壁萬仞，二水會流，深不可測，上爲鐵索橋，索凡六條，各長一十五丈，引於河之西岸，繫以鐵柱，中道板蕩，行者戒心焉。嘉靖間，龍州宣撫薛兆乾作亂，斬鐵橋以拒官兵。旬日，松州米貴如金矣。志曰：鐵龍堡主龍安府

不過二十五里。○小河驛在所治北，所

東十里有水浸驛，又東十里有溪子站。

占藏先結簇長官司。

蠟匝簇長官司。

白馬路簇長官司。

山洞簇長官司。

阿昔洞簇長官司。

北定簇長官司。

麥匝簇長官司。

者多簇長官司。

牟力結簇長官司。

班班簇長官司。

祈命簇長官司。

勒都簇長官司。

包藏簇長官司。

阿昔簇長官司。以上俱洪武十四年置。

思曩兒簇長官司。洪武二十六年置。

阿用簇長官司。宣德十年置。

潘幹砦長官司。正統初置。

八郎安撫司。永樂十年置。

麻兒札安撫司。永樂十年置。

阿角寨安撫司。

芒兒者安撫司。俱正統初置。

疊溪守禦軍民千戶所。東至龍安府石泉縣八十里。南至成都府茂州百二十里。北至松潘衛一百八十里。西至黑水蕃界六十里。自所治至布政司五百八十里。至京師一萬一千二百七十里。

古氏羌地。漢屬蜀郡。後漢因之。晉屬汶山郡。宋齊亦爲汶山郡地。後周置翼針郡。隋開皇初郡廢。屬翼

州。大業初州廢。改屬汶山郡。唐武德初復置翼州。

咸亨三年置都督府。上元二年府罷。

天寶初曰臨翼郡。乾元初仍曰翼州。

後沒於羌戎。明洪武十一年平定西羌。以古翼州置疊溪右千戶所。隸茂州衛。二十五年改疊溪守禦

軍民千戶所。

編戶十里。

隸四川都指揮使司。領長官司二。今設疊溪營。

所北瞰松潘。西控維州。制禦生番。良爲要地。唐之中葉。吐蕃據此。屢爲西川之禍。韋臯鎮蜀。於西山南北分道出師。翼州其必爭之地也。明初雖收其地。而迫及諸番。東西不過六十五里。南北不過九十五里。蓋視漢唐之舊封。地利有未盡廓者矣。使赫然芟除。建爲雄鎮。北接洮岷。南連威茂。西北之藩衛。不且益壯歟。

邊略云。松茂所以隔絕吐蕃。疊則松茂脈絡也。大抵吐蕃入寇。必道松茂。由松茂而東。必經灌口。灌口失守。則長驅入蜀矣。疊州與松茂。蓋灌口之障蔽也。

蠶陵廢縣。

所西百三十里。漢縣。屬蜀郡。後漢因之。元初元年。蜀郡彝寇蠶陵。延熹二年。復來寇。晉亦爲蠶陵縣。屬汶山郡。其後荒蕪。後周改置翼針縣。爲郡治。隋郡廢。縣屬翼州。大業初屬汶山郡。唐武德初屬翼州。六年移州治焉。咸亨三年州僞治。

悉州之悉唐縣。上元二年。還治翼針。天寶初。改曰衛山縣。劉昫曰。漢蠶陵城。在蠶陵山下。隋時翼針縣治七項城。唐貞觀十七年。移治七里溪。唐末縣廢。志云。今所西五里。卽唐廢衛山縣治。

翼水廢縣

所西南九十里。本蓋陵縣地。後周置龍水縣。并置清江郡治焉。隋開皇初郡廢。改縣曰清江。十八年。又改縣曰翼水。屬會州。唐屬翼州。後廢。太子賢曰翼水縣。西有漢蓋陵故城。○雞川廢縣。在所西南百里。有栖雞川。唐先天二年。置縣屬

翼州。又昭德廢縣。亦在所西。劉昫曰。顯慶中。置讖白縣。屬悉州。天寶元年。改屬翼州。更名昭德。五

載分雞川。昭德二縣置眞符縣。并置昭德郡治焉。乾元初。改爲眞州。以州治眞符縣爲名。尋廢。

義和廢縣

所西北六十里。本蓋陵地。唐武德初。析置義和縣。屬翼州。貞元十年。韋臯敗吐蕃。克義和城。既又遣將出義和。薄松州。是也。○左封廢縣。在所西百九十里。後周置廣年縣。并置廣年。左封二郡。又置翼州治焉。隋開皇初。郡俱廢。縣屬翼州。

仁壽初。改縣曰左封。大業初。屬汝山郡。唐武德初。隸翼州。三年。貞觀四年。復置。二十一年。改隸當州。劉昫曰。縣在當州東南四十里。顯慶初。改屬悉州。咸亨初。移州治焉。儀鳳二年。羌叛。悉州寄治當州城內。尋還舊治。載初元年。移治匪平川。在舊治東南五十里。天寶初。改州爲歸誠郡。乾元初。復爲悉州。唐末州縣俱廢。又歸誠廢

縣。在廢左封縣西南。唐垂拱二年。析左封縣置屬悉州。今皆爲生番地。

廢靜州

所西二百六十里。南至成都府威州界百里。劉昫曰。左封縣也。有悉唐川。顯慶初。置悉唐縣。併置悉州治焉。咸亨初。移州治左封。於故悉唐縣置南和州。天壽二年。改爲靜州。仍治悉唐縣。天寶初。曰靜川郡。乾元初。復故。又南有靜居廢縣。天授初。以

悉唐縣之靜川地置。其相近。又有清道廢縣。俱屬靜州。後皆廢。○廢當州。在所西北二百七十里。本羌地。後周置通軌縣。并置羣州及羣川。榮鄉二郡治焉。隋開皇初。郡俱廢。四年。州廢。縣屬翼州。大業初。屬汝川郡。唐初屬松州。貞觀二十一年。置當州治焉。劉昫曰。以地出當歸也。初治利川鎮。儀鳳二年。移治蓬白橋。天寶初。曰江源郡。乾元初。復曰當州。杜佑曰。故通軌縣在州西北二百里。隋志。縣有甘松山。是也。蓋後移今治。會要大歷五年。當悉拓。靜恭五州。並徙置山陵要害地。以備吐蕃而舊封不可問矣。

白岸城

在所西。唐貞元中。韋臯破吐蕃。論莽熱兵。進屯白岸。西山諸羌皆降。新唐書。翼州有錢。和白岸。都護。祚鼎。四城。合江。穀。塢。三谷。三守。捉城。隴東。益登。清溪。禦藩。吉超。五鎮兵。

鷺陵山

在所西北。漢因以名縣。又犂牛山。在所東五里。志云。所之東界止此。正統中。番賊窺境。官軍追之。遇伏於犂牛山。敗績。又雲峯山。在所東六里。高華凌雲。○排柵山。在所南五里。洪武十一年。大軍至此屯駐。立柵爲營。山因以名。

汶江

在所西三里。自松潘衛流經此。又南。黑水流合焉。江源記。岷州自松潘達疊溪。至穆肅堡。黑水從南合之。入深澤。逕茂州界是也。詳大川岷江及川瀆異同。

翼水

所南五十里。一爲汶江。自松潘界流至此。一爲黑水。自生番界流至此。合流如張兩翼。故州以爲名。或謂之合水。亦謂之合江。唐因置合江守捉云。○七里溪。在所東七里。源出松坪寨。又城東有飲馬溝。自雲峯山頂懸崖而下。俱流入於汶江。

玉津泉

在城南。導流直抵城下。居民取汲甚利。又天湧池。在所治南。正統間開鑿。引飲馬溝水。儲其中。以便民居之汲。

南橋關

所南五里。又有小關在所東五里。疊溪橋關在所西五里。志云。所南十五里有中橋關。又南十五里有徹底關。所北四十三里有永鎮橋關。九十七里有鎮平關。俱洪武十二年置。共爲七關。

穆肅堡

所南五十里。江水經此。黑水流合焉。志所云穆肅爲兩河之會也。堡南與茂州接界。爲控扼之所。今亦見茂州。

新橋堡

所北十里。稍南爲漢關墩堡。萬歷十八年。鬱卽長官瞰保者。與黑水。松坪。攻我新橋。明年伏罪。先是漢關墩附近勒骨諸小姓。屬於鬱卽。至是改屬疊溪。志云。新橋堡北爲普安堡。正統十二年。撫臣寇深議討松潘叛蠻。於疊溪。迤北添設普安。靜寨。

鎮番三堡是也。又普安堡旁有葫蘆嶮。宏治中。

番賊攻副普安守將胡澄拒戰。追賊至此死之。

太平堡

所北三十里。其附近爲楊柳。河西強種也。萬歷十八年。糾合松坪。白泥。黑水。三千餘番。同陷新橋。十九年討降之。又永鎮堡。在所北四十餘里。有永鎮橋關。其相近者。又有白石坎。正統中。番賊來犯。官軍拒之於此。志云。永鎮堡附近爲牛尾寨。萬

歷八年及十二年麻搭內犯十四年討降之又北抵松潘衛界

馬路堡

在所南又南爲小關堡接茂州界之實大關志云新堡附近爲巴豬大營衆逾千數性喜黠盜嘉靖二十三年以來屢渡河入犯議者欲於舊關腦搭橋進兵及馬路堡後長寧沙壩潛師繞其後上下夾攻可大創也四裔考疊路生番最惡而五巴豬爲尤甚牛尾麻搭楊柳麥兒次之凡四十八寨其地南連黑苦西通黑水北接松潘加兵征之即逃入黑水黑水蓋廣饒之地莫知紀極云又疊溪長官郁氏所轄有河東熟番大姓八寨及馬路水關七族河面小如六寨云

麻答嘴寨

所北五十餘里本番寨也路入松潘正統中撫臣寇深議討松潘叛蠻欲於麻答崖青崗嘴畫佛崖凝螺洞萬江崖沿山鑿石架木懸棧是也志云堡南爲牛尾巴又南爲楊柳溝宏治十二年撫臣張文言松潘南路明初以來增置墩堡開設倉廠屹爲天險自牛尾巴失利之後蠻人乘險殺掠饑夫戍卒號南路爲死亡城是南路必不可不復也此路一復其間麻答嘴險要之處據高設堡添濳防軍以遏賊衝亦規恢全蜀之策矣○雙馬寨在所西百二十里志云亦番寨也

疊溪長官司

所北一里永樂四年置領渴卓等五寨

鬱卽長官司

所西十五里永樂四年置領松坪等五峒又有來遠驛在司治西

酉陽宣撫司

東至湖廣保靖宣慰司界三百里南至平茶洞長官司界五十里西至重慶府彭水縣界三百里東北至湖廣大田千戶所界四百里自司治至重慶府九百五十里至布政司二千里

古巴國地秦屬巴郡兩漢因之

諸志皆以爲漢武陵郡之酉陽縣誤

三國漢屬涪陵郡晉因之永嘉以後沒於蠻獠後周時

為羈縻黔州地。隋屬庸州。

志云。隋屬清江郡地。

唐屬思州。五代時仍沒於蠻。

寰宇記。黃巢之亂。西陽蠻叛。駙馬冉人才征之。功留守其地。五代時中國無主。冉氏遂據有之。

宋政和六年仍屬思州。尋置西陽州於此。元因之。

冉氏仍有其地。

屬懷德府。明玉珍改為沿邊溪洞軍民宣慰

司。明洪武五年仍為西陽州。

冉如彪納土歸附。仍令世守其地。廣六百里。袤七百里。

七年升為西陽宣撫司。

編戶十三里。

隸四川布政司。永業

十六年改隸重慶府。

司當西南之要衝。接黔楚之邊境。山川阻深。蠻獠錯雜。撫循未可無策也。

四裔考。西陽所屬有九溪。十八蠻。而九江後溪西南一帶。近為鎮筓叛苗

殘破境土日蹙。

酉陽廢縣。

在司東。胡氏曰。三國漢時分置酉陽縣於此。屬涪陵郡。晉省。或以為漢武陵郡之酉陽。誤也。隋為務川縣地。屬庸州。大業初屬巴東郡。唐仍為務川縣地。屬思州。後廢。宋政和中亦為務川縣地。或云宋嘗置酉陽縣。屬務州。今宋志不載也。

元始置酉陽州。明因之。尋為宣撫司治。司無城。其民曰犵獠。曰丹家。曰南客。分三種云。

遷陵城。

在司東南。接湖廣辰州府界。漢縣。屬武陵郡。三國時為吳界。魏已亡蜀。遣漢葭長郭純試守武陵大守。率涪陵民人遷陵界。屯於赤沙。誘動諸戎。進攻酉陽。吳遣鍾離牧討平之。志曰。遷陵。酉陽兩縣相去水道可四百許里。赤沙在其間。此漢之酉陽。

也。

酉陽山

司西北百八十里。接黔江縣界。又龍山在司東一里。旁有龍家砦。司東三十里。又有火山。其山高聳。日射返照。其色如火。又司東百二十里有唐店山。司南百里有何家山。山皆高聳。以山旁居民多唐姓。何姓者而名。○胡子崖在司北百里。崖下路

通。司治行者過此。有水。

自崖懸流。可以濟渴。

三江

司東北九十里。源出酉陽山。亦曰酉水。有三小溪流合焉。又合平茶水及楠溪。東注辰州大江。○楠溪在司西二百里。其溪清淺。旁多楠木。下流合於酉水。

通達砦

司東南二百五十里。志云。元置通達等處五路蠻彝洞長官司於此。明初廢。爲通達砦。又云。司有後寧江土人巡司。

石耶洞長官司

司南七十里。本酉陽地。宋宣和間。有楊昌安者。據守其地。元置石耶軍民府。洪武初。其酋楊金隆歸附。改立長官司。附庸酉陽志云。司東至石凱子界。西至平茶司界。南至邑梅沙子。凹北至酉陽石開。與鎮筵苗密邇。地勢稱孤懸。今

編戶

二里

巴慣山

司治南一里。山崖多板石。土人呼板石爲巴慣也。又南一里有石崖。土人呼爲密那崖。崖石陡峻。中間空洞。嘗有泉流。

漫溪

在司治南。源出邑梅洞。漫流。東注入辰州大江。

平茶洞長官司

東至石耶長官司界十里，西至貴州烏羅長官司界十里，南至貴州銅仁府界百里，北至西陽宣撫司界五十里，自司治至重慶府一千一百二十里，至布政司二千一百七十里。

漢晉以來，爲蠻彝地。唐屬思州。宋政和中，爲羈縻平茶洞。仍隸思州。元改溶江、芝子、平茶等處長官司。

隸思州安撫司

楊氏世守其地。元時楊大雷有之。

明初爲平茶洞長官司

洪武七年，楊抵剛歸附，置司授之。廣三十里，袤百五十里，編戶三里。

初隸西陽宣撫司，洪

武十七年，改隸四川布政司。

岑仰山

在司治西，巍然秀拔，仰望可愛。又團山，在司治南，山勢圍聳，特出衆山之上。又高秀山，在治北，高立千丈，丹崖翠壁，秀色如畫。

白歲山

在司西三十里，高聳插天，土人以山積雪則有年，故名。○諸葛洞，在司治南，石崖屹立，旁有石洞數丈，相傳武侯征九溪蠻時，留宿於此。

哨溪

在司治東南，發源白歲山，山水激石，有聲如哨。又有滿溪，在司西南十里，亦出白歲山，以水常溢不竭也。合流而東北，曰平茶水。至西陽東南，會於酉水。

龍潭

在司治西，兩旁山崖陡峻，潭中水深莫測。又治北石洞中有龍泉，四時不涸。○濟渴井，在司治北，水清甘，夏月行者汲飲之，以濟渴，因名。

小平茶峒

在司南，嘉靖二十七年，大征叛苗，分兵屯平茶地架，二營，剿境內小平茶。地崩岑沙苗，地龍庭，地龍箐，五峒是也。地架堡，見貴州平頭著可長官司。

通蜀橋

司治南跨峭溪上以路通蜀境而名。又司治東北有迎恩橋亦跨峭溪上。

邑梅洞長官司

東至湖廣鎮溪千戶所界七十里西至貴州烏羅長官司界二十里南至貴州平頭著可長官司界百里北至西陽宣撫司界百三十里自司治至重慶府一千五十里至布政司二千一百三十里。

唐思州地元爲佛鄉洞長官司明玉珍時改爲邑梅沿邊溪洞軍民府明洪武五年改爲邑梅洞八年

改置長官司

宋末楊光甫據其地元置司授之明初楊金泰歸附仍令世守其地廣九十里袤二百三十里編戶五里隸西陽宣撫司永樂初改隸重慶衛。

壽山

司西南六里屹立層漢四時林木鬱然又黃牛口在司東三里山旁土地膏腴宜於耕稼相傳昔時土官楊四舟高殿始自貴州烏羅遷此喜而拋牛相慶因名又韭山在司南八里昔有人遺韭種於此山頂長丈餘四時茂盛民皆取以供食○鼎柱山

在司西北五里三山齊聳屹山鼎峙又擊

團山在司西北四里四圍峭壁擊摩雲漢

凱過河

司西北二十里源自烏羅三洋溪流出會貫秦河東入辰州大江旁有凱子砦行者於此過渡又地磴溪在司西南十五里溪水清澈可鑿毛髮又司西十五里有邏岫溪溪水屈曲緣山西流

石柱宣撫司

東至重慶府黔江縣二百里西至忠州鄭都縣百七十里南至涪州武隆縣百七十里北至忠州百二十里自司治至夔州府九百四十里至布政司二千三百五十里

古蠻彝地宋景定中置石柱安撫司

蠻酋馬什用敗蒙古兵繼又平九溪洞彝因置司授之

元改石柱軍民府尋升軍民安撫使司明

玉珍竊據亦授其酋石砭安撫司明洪武七年得其地八年仍為石砭宣府司

土酋馬克用歸降使世守其地廣三百七十里袤二百九

十里編戶三里隸重慶府嘉靖四十三年改隸夔州

大峯門山

司南百五十里兩崖壁立中通人行有故壘在焉又鼓樓山在司東南二百里山高聳其巔舊有鼓樓又斑布山在司西南二百二十里色斑如布

石涼繖山

司東北百四十里形如張蓋或謂之石幢山又萬聚山在司北百里衆山環聚回合因名又司西北二百四十里有馬黃山又十里為鳳凰山皆高聳

三江溪

司東北二十里有三水合流北注大江志云司西北二十里有清水潭四時澄澈又司西四百里有龍潭深沓無際

支羅砦

在司西南嘉靖中石砭宣撫司人黃俊據支羅砦假龍潭土舍名色霸占民田尋以叛誅子中復據寨叛四十四年詔川湖會兵夾攻川兵進攻牛欄坪湖兵自施州衛進中由思南遁去為楚軍所獲川軍搆其巢穴支羅平

讀史方輿紀要

卷七十四

四川九

四川行都指揮使司。東至烏蒙府四百九十里。西至常耶蠻生吐蕃界五十里。南至雲南武定府七百八十里。北至黎州所界五百里。自司治至布政司一千四百八十里。至京師一萬一千五百里。

禹貢梁州之域。後為西南彝所據。漢初邛都國地。元鼎六年。置越嶲郡。嶲音髓。治邛都縣。後漢因之。晉仍曰越嶲

郡。治會無縣。宋仍舊。仍治邛都。齊為越嶲獠郡。獠一作獠。後周置西寧州。天和五年。鄭洛平。越嶲置。尋曰嚴州。隋開皇六年。復為西寧州。

十八年。又改為嶲州。大業初。曰越嶲郡。唐武德初。復曰嶲州。治越嶲縣。三年。置總管府。尋改為中部督府。督羈縻二十六州。天寶初。亦曰越

嶲郡。乾元初。復為嶲州。唐紀。至德初。沒於南詔。尋入於吐蕃。貞元四年。收復。太和六年。潮州徙治壘登縣。咸通三年。為蒙詔所據。改為建昌府。以烏白。二蠻實之。

宋時羈屬於大理。元史。南詔衰。建昌諸蠻爭強。不相下。分地為四。推段興為長。其裔浸強。遂併諸酋。自為府主。大理不能制。元憲宗時降附。元得其地。置建昌路。又立羅羅斯宣

慰司以統之。

至元十二年置。

隸四川行省。尋隸雲南。明洪武中。罷宣慰司。置建昌衛。隸四川都司。又改建昌路。

爲府。隸四川布政司。府尋廢。而改建昌衛爲軍民指揮使司。二十七年。置行都司。

是年。克元將月魯帖木兒賈哈刺。因設行都司於建

昌。領衛六。今亦置都司。各衛所隸焉。

司連接滇蜀。隔閩番戎。爲邊陲形勝之地。漢武開西南彝。欲通身毒道。北方開氏箝。南方開雋昆明。蓋自雋以西南道阻險。羣蠻糾結於抵拒也。北方開氏箝。其後諸葛武侯定南中。道出越雋。蠻皆順命。宋元嘉二十七年。吐谷渾王慕利延爲魏所逼。上表求入保越雋。

胡氏曰。此卽唐時吐蕃與雲南窺蜀之路。蓋自漢武開昆明之後。後人遂通此路。

許之。

不至。梁史大同三年。武陵王紀都督益州。先是蜀亂。建寧。越雋之地。累朝不能有。及紀開越雋。通建寧。於是貢獻踵至。唐武德七年。以韋仁壽爲簡較南寧州都督。寄治越雋。

時仁壽兼領嶺州。

貞觀二十二年。雋州

都督劉伯英請討松外諸蠻。以通西洱。天竺之道。勅將軍梁建方發巴蜀諸州兵擊敗之。諸蠻部皆來歸附。遂通西洱河。招降其部帥。此卽漢所欲通道也。

新唐書。西洱河。巒道。由郎州。走三千里。由嶺州千五百里。

韋臯嘗言。雋州爲西南往

來通道捍蔽數州。貞元四年收復嵩州。屢破吐蕃。太和中李德裕復經營於此。以扼南詔。志云。司山川清秀。土田膏腴。蓋西南之雄鎮也。

建昌衛軍民指揮使司

附郭。漢越嶲郡邛都縣地。晉以後因之。後周置越嶲縣。西寧州治焉。劉陶曰。隋分邛都所置也。大業初。爲越嶲郡治。唐亦爲嶲州治。太和五年。州徙治臺登。縣屬焉。咸通以後沒於蠻。明洪武二十五年置衛。領千戶所四。長官司三。尋置行都司治焉。編戶四里。今亦置建昌衛。有中前所。

建昌前衛指揮使司

附郭。洪武二十七年增置。編戶五里。新志云。萬歷三年并入建昌衛。

越嶲廢縣

即司治。後周置縣。以漢郡爲名。自隋以後皆因之。唐未沒於南詔。南詔改置建昌郡。領建安、永寧二州。元至元十六年分建昌爲二州。在城曰建安。東郭曰永寧。俱屬建昌路。明初因之。尋廢。城邑考。今司城洪武中築。鑿石爲固。有四門。周四里。

有奇。

瀘沽廢縣

司北百二十里。漢臺登縣屬越嶲郡。晉因之。大寧初。李雄將李驥等寇臺登。將軍司馬臯戰死。越嶲遂降於成。成和三年。朱提太守楊術與成將羅恆戰於臺登。術敗死。永和以後復屬於晉。宋仍曰臺登縣。後周置白沙郡治焉。隋郡廢。縣屬嶺。

州。唐武德初屬登州。貞觀初改屬嶺州。貞元四年。章臯大破吐蕃於臺登北谷。克嶺州。五年。章臯復遣將曹有道等出臺登谷。大破吐蕃青海。蠟城。二節度。十三年。吐蕃寇嶺州。刺史曹高任大破之於臺登城下。太和六年。李德裕徙嶺州治臺登。以奪蠻險。其

後陷於蒙詔。以烏蠻會守此。後漸強。自號落蘭部。或稱羅落。以其先爲羅落蠻也。元至元初。內附。尋叛。九年平之。設千戶。十三年。升萬戶。十五年。改爲瀘沽縣。屬禮州。明初因之。縣尋廢。志云。洪武二十四年。景川侯曹震開河道。謂路之險者。莫甚於瀘沽縣。於是架閣鑿崖。更闢新道。卽此也。今有瀘沽巡司。

廢中縣。司東四百里。元志。縣治在住頭回甸。越嶲之東境也。所居烏蠻。自別爲沙麻部。以酋長所立處爲中州。至元十年。內附。仍爲所增置也。明初改爲碧舍縣。旋廢。

遂久廢縣。在司西南。漢縣。屬越嶲郡。後漢因之。元初五年。越嶲以卷犛大牛種。封離等反。殺遂久令。蓋境內屬犛也。晉改屬雲南郡。後廢。章懷太子賢曰。廢縣在今靡州界。靡州。唐西徼羈縻州也。武德七年。置西豫州。貞觀三年。改靡州。後廢。○可泉廢縣。在司西北。漢邛都縣地。後周置可泉縣。併置宣化郡治焉。隋初郡廢。以縣屬嶲州。唐初因之。天寶元年。更名西瀘縣。劉昫曰。縣蓋蕭梁時置。隋移治姜臘戍。唐武德初。移於今治。後廢於南詔。

寶安廢州。在司東。本越嶲縣地。元至元十五年。置寶安州。屬建昌路。二十六年。省入建安州。○廢里州。在司東三百里。元志云。蒙詔時。落蘭部小酋阿都之裔居此。因名阿都部。後附於元。至元十年。隸烏蒙路。十八年。設千戶。二十三年。升爲軍民總管府。二十六年。降爲州。隸建昌路。明初因之。後廢。又廢瀾州。在司東南四百里。蠻名密納甸。烏蒙所居。其裔有名科者。因爲部號。後譌爲瀾。元至元初。降附。九年。設千戶。二十六年。升爲州。隸建昌路。明初因之。後廢。

廢瀘州。司西南二十五里。唐爲瀘州沙野城之地。蠻名沙城。相傳卽諸葛武侯擒孟獲處。誤也。北近瀘水。亦名熱水甸。蠻會於甸。增築一城。謂之洩籠。屬建昌府。元至元十五年。改爲瀘州。明初因之。後廢。今日瀘州堡。○武侯城。在司南三十里。瀘水東。相

傳諸葛武侯所築。所謂五月渡瀘處也。又有孟獲城。在司東二里。俗傳孟獲所築。又司東南二十里有善住城。志亦以爲武侯征南時築。皆傳譌也。

廢隆州

在司南。與會川衛接界。蒙氏改會川爲會同。邈立五嶮。此爲邊府嶮。後嶮主楊人闡者。於嶮北壇上立城。名曰大隆城。元至元十四年。改設千戶。十七年。升爲隆州。屬建昌路。明初廢。志云。廢隆州在會川衛北二十里。誤也。又廢姜州。在司東南亦近

會川境。本名龍納城。羅落蠻世居此。其後烏蠻之裔阿羅者。攻奪其城。名曰絳部。以其祖名阿壇絳也。元時內附。隸閩畔部。至元九年。隸會川路。尋屬建昌路。十五年。改置姜州。姜蠻名也。二十七年。復屬閩畔部。後又屬建昌。明初因之。尋廢。志云。廢姜州在會

川衛東百

八十里。

新安城

在司南界。唐開元中所置城也。後廢。咸通五年。南詔寇瀾州。戍將顏慶請築新安。遏戎。二城從之。旋爲南詔所陷。唐會要。咸通六年。西川節度牛勣於蠻界築新安城。以遏戎寇。又有保塞城。在司西南。亦唐所置。咸通五年。西川奏保塞城使杜守連

不從。南詔帥衆詣黎州降。卽此。新唐書。瀾州有寧遠軍。有新安。

三阜。沙野。蘇祈。保寨。羅山。西瀘。蛇勇。遏戎。九城。皆戍守要地。

瀘山

司南十五里。以山之西近瀘水而名。又南十里。有馬鞍山。兩峯並聳。狀如馬鞍。志云。司西四里有呂金坂山。以昔有土酋呂金。居此山之坂也。又四十里有天王山。○青山在司北三十里。上有松林。四時蒼翠。又北有鸚鵡山。近臺登縣界。九州要記。臺登

縣有鸚鵡

山。奴諾水。

螺髻山

司東南四十里。山高聳。狀如螺髻。又鹿角山。在司東百十里。山峯尖削。狀如鹿角。元至順初。羅羅斯會撒加伯等合諸蠻軍。攻建昌。守將羅里帖木兒等追戰於木托山下。敗之。或以爲卽鹿角山之譌也。又涼山。在司東百三十里。羣峯嵯峨。四時多

寒。○落腰山。在司治南二百六十里。東西高而中凹。蠻人因呼爲落腰也。

瀘水。司南十里。源出番界流入境。又南流入金沙江。至廢黎溪州而接馬湖江。或謂之若水。史記黃帝子昌意降居若水。蓋在此。通鑑注自嶺州西南行八百餘里。渡瀘水。元史云瀘水深廣而多瘴。鮮有行者。冬夏常熱。其源可燬雞豚。今司西四十里有瀘川橋。

亦曰瀘水橋。唐貞元五年。章阜招東蠻內屬。絕吐蕃盟。東蠻斷瀘水橋。攻吐蕃。阜亦遣精卒與蠻共破吐蕃於囊登。東北谷是也。詳見前大川。

孫水。在司北。一名長河。源出西番界。南流逕寧番衛。東流入境。會於瀘水。漢志注。囊登縣有孫水。南經會無入。若行七百五十里。若水即瀘水也。

懷遠河。司城南大通門外。源出東北山麓。經城南。合於瀘水。今城南三里。有懷遠橋。又寧遠河。在城北寧遠門外。源出青山。西南合於瀘水。

海子。司東十五里。其水澄澈。浩濶如海。多產嘉魚。又熱水池。在司北七十里。四時常熱。流入溪河。合瀘水。接金沙江。○深市井。在司南三十里。自山頂流下。如白練然。

瀘沽關。司東北百里有瀘沽峽。爲險阨之道。又有瀘沽巡司。或曰卽故臺登縣治也。又老君關。在瀘沽關南。有棧道。至爲險峻。又司東北百二十里有太平關。○甸沙關。在司東南三百七十五里。建昌會川分界處。北接威龍州。南近米丹所。東連普雄。法果。

諸彝志云。關在會川衛北六十里。

礮山堡。司南十里。瀘水上。又理經堡。在司北十里。志云。自禮州行四十里。歷安寧。北哨。青山。理經。四堡。又十里而至建昌衛。○金川堡。在司東南二百十五里。志云。自司北祿馬驛東南行。歷巴西。鹿角。凹腦。者者。黃泥。什結。諸舖。至阿用驛。自阿用至白水驛。

百里金川堡當適中之地。由白水三十里。至可郎鋪。係威龍州地。莽襟出入之鄉。又二十里有公母石。以兩石相隨而名。又五里卽甸沙關矣。

紙房堡

司西四十里。輿程記。鹽井衛之沙平驛。在瀘河西。東十五里。爲紙房堡。又東十里。爲瀘州堡。是也。志云。建昌衛所屬有紙房。瀘州等堡。又高山。沙平。德力。黃泥。諸堡。皆接鹽井衛界。其前衛所屬。則有青山。松林。平壩。鎮彝等堡。皆分撥衛軍戍守。

龍溪鎮

司東四十里。有龍溪巡司。又司東南三百里有白水巡司。司南三百八十里有麻刺巡司。北廢瀘沽州。又有瀘沽巡司。志云。司南四十里。舊有打沖河巡司。又瀘川遞運所在。司南。○瀘川驛在司西五里。馬驛也。又溪龍馬驛在司北八十里。其前

有溪

龍橋

瀘沽驛

司北百八十里。馬驛也。元至順初。雲南諸王禿堅等作亂。羅羅斯土官撒加伯合烏蒙變兵。攻建昌。蜀軍敗。撒加伯於瀘沽驛。卽此。又北八十里。曰祿馬驛。東去馬湖府七百里。北至邛部長官司二十里。往來通道也。又阿用馬驛在司南二百里。又

南百里。爲白水馬驛。白水巡司亦置於此。志

云。司東四百里。有龍溪索橋。東出烏蒙之道。

守禦禮州後千戶所

都司北六十里。漢置蘇示縣。屬越嶲郡。後漢因之。晉廢。宋曰蘇祁縣。仍屬越嶲郡。後廢。後周復置蘇祗縣。并置亮善郡。治焉。隋開皇初。郡廢。縣屬嶲州。唐曰蘇祁。仍屬嶲州。後爲吐蕃。烏白蠻所竊。據號曰籠摩城。元至元九

年。設千戶。十五年。改爲禮州。屬建昌路。明初。改爲守禦禮

州。後千戶所。屬建昌衛。編戶一里。今亦置禮州守禦所。

守禦禮州中中千戶所

都司北六十里。亦漢蘇示縣地。與後千戶所同置。編戶一里。今亦置禮州中所。

蘇祁廢縣

今所治即漢蘇示縣也。示讀曰祇。劉昫曰：後周開越窳，於漢故城復置蘇祇縣。唐因之。新唐書：自臺登城南九十里至蘇祁縣，又南八十里至窳州，又經沙野二百六十里至羌浪驛，又經楊蓬嶺百餘里，至俄準添嶺，楊蓬嶺北窳州境，其南南

詔境也。又經箐口，會川四百三十里至河子鎮城，又三十里渡瀘水，又五百四十里至姚州，又南九十里至外珍蕩館，又百里至佉龍驛，與戎州往羊宜畔城路合。貞元十四年，內侍劉希昂使南詔，出清谿關，由臺登、蘇祁南行之道也。

瀘河

在所西南流，入建昌衛界。

安寧堡

所南四十里，南至建昌衛二十里，舊爲戍守處。

守禦打沖河中前千戶所

都司四百四十里，唐爲窳州沙野城地，後沒於蠻，元爲瀘州地，明初撥官軍守禦，後置所，屬建昌衛編戶二里。

邛都廢縣

在所西北，漢縣爲越窳郡治，後漢因之。建武十九年，越窳太守邛殺王佐貴謀叛漢，劉尚分兵先據邛都，掩貴誅之，是也。晉亦爲邛都縣，屬越窳郡，宋仍爲郡治，齊時越窳降爲獠郡，縣廢。後周復置邛都縣，屬西寧州，隋屬窳州，唐初因之。上元

二年，移治於會川鎮。志云：隋分邛都置越窳縣爲郡治，唐又改邛都爲越窳縣，而以隋所置越窳縣并入焉，亦似誤。

打沖河

在司治西，蠻名黑惠江，又名納彝江，源出吐蕃，流逕鹽井衛界，又南流逕此，水勢奔急，洪濤洶湧，因名打沖河。沖下流至會川衛，合金沙江，亦曰大沖河。明初討建昌叛帥月魯帖木兒破之，打沖河賊兵潰溺者甚衆。

水岩關

在所東北，明初月魯帖木兒叛，詔藍玉等討之。四川都指揮使瞿能率兵破雙狼岩，進破托落等岩，又破水岩關及上圖寨，進至大沖河三里所，叛兵潰溺者半。○天星岩在所南，瞿能破賊衆於大沖河，還克天星，臥漂，諸岩是也。又有截路岩，在所

西南時官軍入德昌。又分兵入普濟州。別將李華追托落砦餘孽進至水西。破其截路等砦。今皆廢。

守禦德昌千戶所

都司南百四十里。漢邛都縣地。唐爲越嶲地。後沒於南詔。名吾越甸。宜龍蠻居此。曰賴縵部。元至元十二年立千戶。十三年改爲德州。屬德平路。二十三年改隸德昌路。明初因之。洪武二十五年改置今所。屬建昌衛。編戶一里。

今亦置德

昌守禦所

廢德州

志云。在瀘水四十里。蓋在所西境。

昌州長官司

都司南二百里。漢邛都縣地。唐越嶲縣地。後沒於南詔。烏蠻阿屈之裔居此。號曰屈部。元至元九年降附。十二年改屈部爲昌州。屬定昌路。二十三年以定昌路并入德昌路。治昌州之葛魯城。明洪武十八年蠻酋盧尼姑歸附。改路爲德昌府。

二十五年府廢。改昌州爲長官司。仍以

盧氏世守其地。隸建昌衛。編戶二里。

威龍長官司

都司東南四十里。蠻名巴畢部。舊領小部三。曰沙渴普宗。曰烏鷄泥祖。曰媯諾龍菴蒲。皆獠魯蠻種也。元至元十五年合三部置威龍州。屬德昌路。明洪武十八年其酋吉撒如歸附。仍爲威龍州。二十五年改爲長官司。命吉氏世守其地。屬

建昌衛。編

戶一里。

普濟長官司

都司西南二百四十里。蠻名玕甸。獠魯蠻居之。後屬屈部。元至元十五年置普濟州。定昌路治焉。二十三年廢定昌路。改屬德昌路。明洪武十五年蠻酋白氏歸附。仍爲普濟州。二十五年改爲長官司。以白氏世守其地。屬建昌衛。編戶一里。

寧番衛軍民指揮使司。

都司城北百九十里，東至烏蒙府界四百六十里，西至鹽井衛界百三十里，北至越嶲衛九十里。

漢越嶲郡地，首宋因之。隋唐時皆爲嶲州地。南詔隸建昌府。元末置蘇州。

志云：取漢蘇示縣爲名。隸建昌路，今元志不載。

明初因之。

洪武二十二年，改置蘇州衛。二十七年，改寧番衛。

編戶三

屬行都司，領千戶所一。今亦置寧番衛。

衛迫臨邊隘，控扼吐蕃。

志云：今環衛而居，皆西番種也，故曰寧番。

唇齒建昌，藩屏川蜀，亦西南之襟要也。

寧番城。

今衛治。洪武中置蘇州衛於此，編柵爲城。二十五年，改築土城，永樂初復甃以石，環城爲濠，有門四，城周八里有奇。

南山。

衛西五里，山勢屹然，南向，舊產白銅。漢志：邛都南山出銅，卽此山矣。又衛南四十里有白土山。

長河。

在衛東，卽孫水也。自西番界流入境，南合於瀘水。史記：司馬相如定西南彝，橋孫水以通邛都。漢志注：孫水入若，若水入繩，繩水出徼外，東至犍道入江。蓋謂瀘水爲若水。金沙江爲繩水也。志云：長河一名白沙江。

溫泉。

衛東百四十里，或謂之溫水，其水四時常溫，可以療疾，居民引流以資灌溉。

沙陀關。

衛東百七十里，其並列者曰羅羅關，又九盤關。在衛東百八十里，南接白石，瀘沽峽，老君等關，皆稱險絕。一夫荷鍤，千騎辟易。旁有桐槽，鐵廠，諸蠻習奸盜，尤爲行旅之患。一云九盤關在衛西南五十里，○烏角關在衛南五十里，又衛北二十里有

北山關皆
爲戍守處。

瀘沽關。在衛南。與建昌衛接界。志云。寧番衛所屬有瀘沽關。鐵廠堡。北山堡。太平關。冕山堡。巡哨堡。李子坪堡。雙橋堡。白石堡。三橋關。皆分撥衛軍戍守。

定番堡。在衛西。萬歷十五年置。土彝考。寧番東南東北諸蠻頗馴擾。惟西去月落三渡水。妙竹等一十九寨。恃其險隘。常引水外生番入寇。自堡設而稍斂迹云。

蘇州驛。衛治東。衛北又有龍溪馬驛。接越窩衛界。又太平橋。在衛東百二十里。或云橋在孫水上。往來通道也。

守禦冕山橋千戶所。衛東一百二十五里。明初爲寧番衛之冕山堡。正統七年。改置千戶所。仍屬寧番衛編戶一里。今亦設冕山營。

冕山。所東三里。山高聳。而方正如冠。冕然。

瀘沽河。在所西。源出越窩衛小相公嶺。引流而南。經所境。又東南流。至會川衛南。合金沙江。或曰瀘沽河。卽孫水也。冕山橋舊在其上。卽漢孫水道橋之址云。○東河在所東二里。亦出小相公嶺。南流會於瀘沽河。

冕山關。所北五里。瀘沽河濱。卽孫水之滸也。志云。冕山所諸關堡。與建昌衛境內諸關堡。皆犬牙相錯。建昌之瀘沽驛。去冕山所止六里。與桐槽站同處。驛屬建昌。而供帳騎乘。則寧番職也。去桐槽八里。爲太平關。關在孫水上。有渡軍守之。十里爲鹽井哨。

路通東山鐵廠。軍民雜聚冶鑄之所。又云。建昌之瀘沽關。卽瀘沽峽。兩山壁立。峽深百餘丈。闊不盈尋。孫水流其中。淙淙有聲。人行東山嶺上。俯視魂搖。南北長五里。中有觀音岩。老君關。棧道危峻。設瀘沽巡簡司於瀘河東。去巡司五里。爲鎮彝堡。過此歷五

十里爲平蠻、松林、深溝、龍溪、平哨、諸處。又十里則建昌衛之禮州城矣。

越雋衛軍民指揮使司。

郡司城東北二百八十里。東至馬湖府界三百里。西至鹽井衛百九十里。北至黎州所二百六十里。

漢越雋郡地。晉宋因之。後周置邛部郡。隋廢郡屬雋州。唐因之。南詔爲邛部州。屬建昌府。元中統五年立邛部州安撫招討司。隸成都元帥府。至元十年改屬羅羅斯宣慰司。至元二十一年改爲邛部州。隸建昌路。明初因之。洪武二十

二年改爲邛部軍民州。二十七年廢州置衛。

編戶三里有半。

隸行都司。領長官司一。千戶所一。今亦置越雋衛。

衛東望岷峩。西連吐蕃。控黎雅之咽喉。當南蠻之衝要。邛夔有事。衛其必爭之所也。

廢闌縣。

在衛治東。漢縣。屬越雋郡。闌同闌。或作闌。誤也。後漢仍屬越雋郡。晉省。宋復置闌縣。屬沉黎郡。蕭齊以後廢。後周置邛部縣。并置邛部郡治焉。隋開皇初郡廢。縣屬雋州。唐因之。後沒於南詔。謂之邛部川。元志。邛部川在宋時。歲貢名馬土物。封其酋

爲邛部王。治烏弄城。初。麼些蠻居之。後烏蠻仲由蒙之裔奪其地。元時內附。尋置邛部州。是也。今衛城。明洪武中築。永樂初。磬石爲固。有四門。周四里有奇。

卑水廢城。

在衛東南。近馬湖江。漢置縣。屬越雋郡。孟康曰。卑讀曰斑。晉以後因之。蕭齊時廢。志云。衛東有平樂城。晉永嘉以後。寧州刺史王遜表置平樂郡。及平樂縣治於此。建興三年。平樂太守董霸以遜爲治嚴猛。譚之。叛降於成。卽此。郡旋廢。後周於

邛部縣兼置平樂郡。隋開皇初廢。○奴諾城。在衛北十七里。寰宇記。諸葛武侯征蠻所築。鷓軍之所。以奴諾川爲名。志云。今衛北二十五里有舊城堡。亦武侯所築。

孤山。衛西五里。又衛南二十里。亦有孤山。高出衆山之表。志云。衛南十五里有金馬山。○阿露山在衛西五十里。即大雪山。東南與小相公嶺相接。

小相公嶺。衛南五十里。山勢高聳。石磴崎嶇。自麓至頂十五里。武侯所開也。志云。嶺四時有雪。往來騎者徒步下山。易履再穿。險峻不可名狀。又石巖洞在衛北三十里。中可容數十人。

大渡河。在衛北。與黎州所接境。東流入嘉定州界。水勢浩大。烟瘴極盛。與金沙江相似。詳見大川。

魚洞河。衛北二十里。源出吐蕃。合羅羅河入大渡河。中產大魚。因名。○羅羅河在衛南二十三里。有三源。皆出吐蕃。界合爲一。東流入境。又東北合魚洞河而入大渡河。又溫泉在衛東二十里。亦曰溫水。引流可以溉田。

清溪關。在衛北大渡河之南。唐太和。李德裕徒關於中城。或曰城在衛東北也。新唐書。自清溪關南經大定城。百十里至達仕城。西南經菁口。百二十里至永安城。城常瀆。窰要衝。又南經水口。西南達木瓜嶺。二百二十里至臺登城是也。今詳見前重險。

曠經關。衛東北三百里。有曠經山。山嶺高峻。置關其上。關旁有廣石。相傳唐僧三藏晒經處也。又東北七里有李子坪。又東五里爲火燒營。又五里爲鎮蠻堡。亦名大樹堡。在兩山峽口。北臨大渡河。與河北羊腦山相望。爲大小沖番往來之所。又東十里曰

臨河堡。在大渡河南岸。河北有羊肆崖。漢水口與此相對。堡之上通大小沖山及海腦壩。雙桑村。堡之下通鬼皮羅。黑麻溪。片馬。敝。諸蠻山徑險絕。通望山在其處。寰宇記。黎州通望軍在大渡河南三十里。唐至德元年。置在通望山下。山自河南與衆山相連。

入瀋州界。一云晒經關在衛北八十里。

海棠關。衛北百四十五里。志云。南去關十里爲鎮西驛。又十五里爲清水堡。東通載羅。白石。乾溝。西抵竹麻。洗馬姑。等番。有兵戍守。又二十里爲筭葉堡。在峽內平地。於此飾廚傳。以禮使臣。又十五里至梅子堡。路通蠟梅。得那補。蝦蟇窩。等蠻。焚劫無虛日。

又二十里爲利濟驛。
又十五里至青岡關。

青岡關。衛東北四十里。志云。關北通獬兒姑。南通廣洪。魚洞。諸峯。或瀉之門戶也。又南十五里爲通濟堡。在瀉水西岸。又南卽越嶺。衛衛在瀉水西廣平之地。羣山環繞。西通羊圈托烏。雪山。東通普雄。大小赤口。馬湖。諸壘。又刺伯關在衛西北二十五里。亦

昔時戍

守處。

小相公嶺關。

衛南五十里。志云。相嶺關在小相嶺絕頂。又南十里爲靖邊堡。在小相嶺南。通寧番衛界。三渡水外。生番。東通桐槽。那噴。沈墮。等壘。過此有新添。九盤。白石。登相。四堡。共四十五里。又十里爲雙橋堡。又十里。獬獬窟穴也。過關五里

爲灣村。又八里有巡哨堡。地稍寬。

平。又十里則寧番衛之冕山關矣。

鎮雄堡。

在衛西南。路通普雄。兩河口等處。又十五里爲通相堡。一名小哨。又十五里爲長老坪。在小相嶺北。西通羊圈托烏。東通普雄。黑骨頭諸壘。又十里卽相嶺關矣。

白馬堡。

衛東北二百九十里。又東十里卽晒經關也。堡爲獬獬鐵口。諸番市易處。十里至河南驛。又八里至八里堡。路通八拍橋。普馬。等寨。又四十里卽平彝堡也。在高山峽內。路通笋坑。紅水。黑麻。等寨。又十二里至古隘堡。路通那歷。洗馬姑。乃易集。戶水。

八拍。等寨。其南隘廣不盈丈。兩岸壁立千仞。峽內水流淙淙。或云此卽章阜所置清溪關也。李德裕所置琉璃。仗義。二城。俱在此處。又西二十里至平彝堡。輜軒於此設食焉。有古隘口。路通泥水。二十戶。等寨。與煖歹諸壘相隣。又十里至鎮遠堡。東連煖歹。椒

圓。燕子窩。諸壘。西通洗馬姑。赤利。草必落。等寨。又十里爲鎮彝堡。在高山稍平處。又十五里卽鎮西所。志云。越嶺衛所屬爲青岡堡。葉葉堡。木瓜堡。鎮遠堡。平壩堡。苦菜堡。平彝堡。八里堡。河南堡。晒經關堡。白馬堡。鎮彝堡。李子坪堡。臨河堡。炒米關堡。小哨堡。

長老坪堡、溜水堡、新添堡、黃泥堡、九盤堡，皆分撥衛兵戍守。

龍泉驛

衛南十五里，其地有龍泉山下，爲龍泉驛。又十五里有炒米關，在高山峽內，志以爲關，卽章阜所築要衝城。城下有龍泉水，又五里卽鎮雄堡。輿程記：邛州龍泉驛東北六十五里，爲利濟驛。又北八十里爲鎮西驛。又東北百二十里爲河南驛。白

河南驛至黎州百四十里，由龍泉驛而南，凡百二十里而抵建昌。

之瀘沽驛。○梅子嶺橋，在衛南五十里，路出寧番往來通道也。

邛部長官司

在衛治東，隋唐時皆爲邛部縣地。元爲邛部州地，明爲越嶲衛地。先是有土酋嶺眞伯者，以地來歸，永樂初因分設長官司，以嶺氏世守其職，屬越嶲衛編戶一里。

平彝堡

在司東，接嘉定州峩眉縣界，邛部屬彝也。萬歷十五年，時嶺氏微弱，部族黑骨、普雄等酋爲亂，郵傳不通，大兵誅討，斬馘千數。其東近峩眉者數百家，相率歸附，因置平彝歸化二堡，其犍榔、鐵口、普雄三村於邛部屬彝中，尤爲桀驁云。

鎮西千戶所

衛北百五十里，本越嶲衛地。嘉靖中析置，志云：寧越守備駐此，其城背高阜，南臨深坎，西通竹麻哨、阿迷羅等砦，東通煖歹、瓜羅、米頗柯、羅回，諸彝屹然一要害，屬越嶲衛編戶一里。

新驛

在所東，近嘉定州峩眉縣界。隆慶中，越嶲指揮程昱議將鎮西千戶所起，至羅雅地方舊路，開闢直抵峩眉縣，至四川城，避出大渡河與相公嶺之險，蓋自所至省城中間，水則大渡河，每年春秋二季瘴發，行人斷絕，雖有緊急，聲息莫通。行者又有風濤之害，山則大相公嶺，高五六十里，四時多雪，晝日晦冥，非遇晴期，有百數十人，則不敢過。晴期一月三次，行者未免遲滯，其頂盤百折層疊之險，多不可名，亦有湍流，人常病涉。過此則南站兩旁，皆西番巢穴，中通一線之路，雖有關堡防備，番夷出沒無常，未免遭其劫掠。洪武十七年，景川侯曹震言：四川至建昌驛道，有大渡河之險，問諸父老，自眉州峩眉至建昌，古有驛道，平易可行，歲久蔽塞，今已開通。以溫江至建昌各驛馬，移置峩眉新驛爲便。今開新驛，卽震所請也。且較舊路近二三百里，日日可行，原有

舊跡修葺
以易云

鹽井衛軍民指揮使司。都司城西北三百里。東至寧番衛界百三十里。西至雲南麗江府界五百里。西北至雲南永寧府界三百里。

漢越巂郡地。晉宋因之。蕭齊以後沒於蠻獠。後周屬嚴州。隋屬巂州。南詔置香城郡。宋時蠻名賀頭甸。屬大理國。元初為落蘭部。至元十四年立鹽井管民千戶。十七年改為閩鹽州。二十七年立柏興府。隸羅

羅斯宣慰司。明初因之。尋改為柏興州。洪武二十五年改為柏興千戶所。二十七年改置鹽井衛。編戶二十四里。屬行

都司。領千戶所一。長官司一。今亦置鹽井衛。

衛迫臨邊陲。通道滇蜀。地饒給多。鹽利西陲之屏翰。而建昌之根底也。

定筰廢縣。在衛治南。漢縣。屬越嶲郡。郡都尉治焉。文穎曰。古筰彝所居也。華陽國志云。摩沙彝所居。後漢仍屬越嶲郡。晉因之。劉宋亦為定筰縣。蕭齊以後廢。後周置定筰鎮。隋因之。唐武德二年改置昆明縣。仍屬鴻州。天寶末沒於吐蕃。貞元中收復後。

又沒於南詔。置香城郡。大理時曰賀頭甸。後附於元。尋置閩鹽州。以州西獮鹿蠻部為普樂州。俱隸德平路。至元二十七年并普樂。閩鹽二州為閩鹽縣。以境內有鹽井也。置柏興府治焉。明洪武中藍玉討建昌叛帥月魯帖木兒。遁入柏興府。玉破平之。城邑

考。今衛城洪武中築。二十九年。鑿以石。有門四。周四里。

昆明城。

在衛西南。本漢定筭縣地。以南接昆明彝而名。顏師古曰。昆明在瀾州西南。漢武求身毒道。南方閉瀾昆明。元封六年。復欲通大夏。遣使十餘輩。皆閉昆明。乃命將郭昌擊之。斬首數十萬。後復遣使。竟不得通。後周爲定筭鎮地。唐置昆明縣。蓋以漢

昆明地而名。天寶中。置昆明軍。後吐蕃亦置城於此。貞元十一年。南詔攻吐蕃昆明城。取之。尋復沒於吐蕃。十五年。吐蕃謀襲南詔。屯於昆明。又遣兵屯西貢川。十七年。章阜遣軍攻昆明城。不下。胡氏曰。昆明在西鑿西北。有驪地之利。似誤。又鹽城亦在衛西南。志云。昆明縣有鹽。築城以衛之。因名。唐開元十七年。瀾州都督張審素破西南蠻。拔昆明及鹽城。其相近者。又有諾濟城。亦唐所置戍守處也。天寶末。沒於吐蕃。貞元十五年。吐蕃分兵自諾濟城攻瀾州。十七年。章阜使瀾州將陳孝陽等及麼些蠻。東

蠻三部落主宜那時等。攻吐蕃

昆明。諾濟城是也。後沒於南詔。

廢金縣。

在衛北。漢定筭縣地。唐爲昆明縣地。後沒於南詔。蠻名利寶揭勒。元至元十五年。置金州。後降爲縣。屬柏興府。以縣境斛契和山出金而名。明初因之。尋廢。○寧遠城。杜佑曰。在越瀾郡西。昆明縣南。唐開元中。置寧遠軍。屬劍南節度。

柏林山。

衛南十里。多松柏。翠色參天。柏興府之名以此。○斛契和山。在衛西三十里。產金。又衛西北七十里。有鐵石山。山有礮石。燒之成鐵。爲劍戟甚剛利。又白耳山。在衛西二百里。山下有白耳村。

打沖河。

衛東北百八十里。自吐蕃界流經打沖河。中左所。南流經此。下流至會川衛境。合金沙江。志云。打沖河兩山壁立。水勢洶湧。狼牙相拒。舟楫不通。有索橋橫亘四十二丈。邊陲之天險也。自舊瀘州一帶。駝運入衛。必由索橋之險。往往患纒運難通。又

有土蠻。時相仇殺。衛境軍

民。轉徙離散。不能免矣。

雙橋河。

衛西五里。源出衛東三十里之涼山。遶流逕此。又東北流入打沖河。又越谿河。在衛東百里。亦出涼山。會打沖河而入金沙江。又衛北五里有龍潭水。從地湧出。方圓四丈。極清潔。四時不竭。

琵琶川

在衛南。唐貞元七年，章阜遣兵至琵琶川，討勿鄧酋長苴夢衝，大破之。遂通雲南之路。時勿鄧潛通吐蕃，扇誘羣蠻，隔絕雲南也。繼又以東蠻風習，鬼主貳於吐蕃，召斬之於琵琶川。東蠻懾服。一云川在越嶲衛北。誤。

鹽井

在衛治東。有黑白二井。漢志定筮出鹽。元因以閩鹽名縣。今黑鹽井鹽課司置於此。又有鹽井遞運所。在衛東百里。

雙橋關

衛東八十里。亦曰雙橋堡。又東十里爲杭州堡。又五里爲平川驛。又五里爲紹興堡。又十里爲祿馬堡。又十里爲梅子堡。通祿馬、祿曹諸寨。又東二十里。即打沖河也。○土功堡在雙橋西十里。又西十里爲馬蝗堡。又十里爲新添堡。又十里爲鴛鴦

堡。又十里爲涼山堡。又十里爲高山堡。又十里爲箐口堡。又十里則衛治也。志云：衛西二百八十里。舊有古得關。爲戍守處。

德力堡

衛東二百十里。與建昌衛接壤。西去打沖河十餘里。通祿馬、祿曹諸堡。又東十里曰沙耳堡。通麻科七村牙礦諸堡。又二十里。亦曰高山堡。通馬者馬羅諸堡。志云：鹽井衛所屬。有箐口、雙橋、涼山、鴛鴦、新添、馬蝗、土功、杭州、紹興、六馬、鎮南、定遠、鎮西、

新化、明遠、濟平、康寧等

堡。皆分撥衛軍戍守。

鹽井驛

在衛治東。又東百里爲平川驛。平川遞運所亦置於此。又東六十里爲河口驛。有河口遞運所。志云：驛西去打沖河三里。以在打沖河口而名。又東六十里爲沙河驛。又有沙平遞運所。在衛東三百二十二里。輿程記自沙平驛至建昌衛不過五十

里。是也。

打沖河守禦中左千戶所

衛東北百六十里。元建昌路瀘州地也。洪武中置一所。今分爲五。俱屬建昌衛。土彙考：左所土千戶刺氏世其職。洪武二十五年。征月魯帖木兒。賈哈刺土人刺他効順。其子刺馬非復入貢。授中左副千戶。

永樂十一年。升爲正。以別於四所。地與麗江。永寧。二府接。麗江土官木氏每來侵之。土地人民。幾失其半。又有右所土千戶八氏。中所土千戶刺氏。前所土千戶阿氏。後所土千戶卜氏。皆以明初土人歸附授官。今悉爲麗江所蠶食云。

打沖河。

所治東。自番境流入。又南入鹽井衛界。志云。中左所在河西。中前所在河東。蓋濱河爲守禦也。

馬刺長官司。

衛南五百里。本定祿縣地。元屬柏興府。永樂初。分鹽井衛置。今司仍屬鹽井衛。土彝考。馬刺一名。瓦刺。土官阿氏以明初歸附。世其職。其地接壤雲南。北勝州。稱寬饒。庶富人亦馴擾。今編戶一里。

會川衛軍民指揮使司。

都司東南五百里。東至東川府界二百五十里。南至雲南。武定府界四百五十里。西南至雲南姚安府界四百里。

漢越巂郡地。晉宋因之。蕭齊以後廢。隋屬巂州。唐因之。南詔置會川都督府。又號清寧郡。大理時。仍曰

會川府。元至元十四年。置會川路。

治武安州。隸羅羅斯宣慰司。

明洪武中。復曰會川府。隸四川布政司。尋降爲守禦千

戶所。隸建昌衛。二十七年。改置會川衛。

編戶十八里。

屬行都司。領千戶所一。今因之。

衛西控瀘水。南環金沙。據兩川之間。爲衝要之地。雲南擾動。北窺川蜀。衛其必爭之所也。

會無廢縣。

衛治西。漢置縣。屬越嶲郡。後漢因之。晉爲越嶲郡治。宋仍屬越嶲郡。後廢。唐置會川鎮。以川原並會而名。上元二年。移平都縣於會川鎮城內。自是改名曰會川縣。天寶中。沒於南詔。貞元四年。吐蕃發雲南兵寇西川。屯於瀘北。旣而疑雲南附

唐遣兵屯會川。以塞雲南趨蜀之路。雲南怒引還。其後沒於南詔。置會川府。

治焉。城邑考。今衛城明洪武末築土城。永樂初。瑩以石。有四門。城周八里。

三絳廢縣

在衛東南。漢縣。屬越雋郡。後漢因之。一作三緹。誤也。華陽國志。三緹縣一名小會。無讀曰三播。通道寧州。渡瀘得青蛉縣。有長谷路出其中。是也。晉時縣廢。青蛉見雲南姚安府。○姑復廢縣在衛南。亦漢縣。屬越雋郡。王莽時。越雋姑復縣人。大卒叛。殺掠吏人。莽遣平蠻將軍馬茂擊之。不克。後漢永平初。姑復桑復叛。益州兵討平之。晉亦曰姑復縣。改屬雲南郡。沈約志。雲南有東西二古復縣。即漢姑復縣地。蕭齊因之。梁末廢。水經注。若水自會無經三絳縣西。又逕姑復縣北。是也。

和集廢縣

在衛西。新唐書。貞觀八年置。屬雋州。又西有昌明廢縣。本松外蠻地。唐貞觀二十二年。開置牢州及松外。尋聲林開三縣。永徽三年州廢。三縣皆省入昌明。天寶中沒於蠻。

會同城

在衛北。唐所置會同軍也。天寶九載。鮮于仲通討南詔。大軍自南溪入。別軍自會同入。至德初。闍羅風陷越雋會同軍。據清溪關。胡氏曰。軍在會川縣。當瀘津關之要路。南溪見叙州府。○黃土城。一統志云。在衛城西。建置未詳。

永昌廢州

衛西五里。元志云。故歸依城。即唐會川縣治也。南詔初置會川都督府。尋曰會同府。又分置五嶮。以掌其地。元至元十四年。改置管民千戶。十七年。升爲永昌州。屬會川路。明初因之。尋廢。○武安廢州。在衛南十里。蠻名龍泥滅。即南詔清寧郡。

治也。宋時爲大理高凌所據。元至元十四年。立管民千戶。十七年。置武安州。會川路治焉。明初因之。尋廢。

會理廢州

衛東南二百里。漢三絳縣地。蠻名昔陀。烏蠻阿壇絳之裔。羅於則居此。亦曰絳部。其後強盛。改號蒙歪。元初。隸闍畔萬戶。至元四年。屬落蘭部。十三年。改隸會川路。十五年。置會理州。二十七年。還屬闍畔部。尋復故。明初廢。○黎溪廢州。在衛西

南百五十里。蠻名黎彌。譌曰黎溪。南詔時。闍羅風徙白蠻守此。大理時。羅羅蠻據其地。元至元九年。改置黎溪州。屬會川路。明初因之。後廢。正統初。黎溪蠻矢的等。嘯聚金沙江。雲南帥沐節擊平之。又麻龍廢州。在衛南。地名棹羅能。烏蠻之裔居此。曰麻龍城。元至元十二年。併其地入會川。十四年。立管民千戶。隸會川路。十七年。升爲麻龍州。二十七年。割屬闍畔部。尋復故。明初廢。志云。衛東南百里有通安廢州。亦元置。今元志不載。

葛砧山。衛東南八里。上產石青。有四色。又土日山。在衛東南三十里。上產石礫。有三色。又密勒山。在衛東二百里。產銀礦。宣德五年。置銀場。遣官開採。以雲南官兵充礦夫。尋罷。

玉虛沙山。衛西北四十里。山高竦。多白沙。又斜山。在衛西境。唐永徽六年。薊州道行軍總管曹繼叔。破胡蕞。顯養。車魯。等。鑿於斜山。拔十餘城。胡氏曰。胡蕞。劍山。招討所領五部落之一也。

金沙江。衛西南二百五十里。源出吐蕃。逕雲南麗江。鶴慶。姚安。武定之境。至衛界。又東合瀘水。至廢黎溪州。爲馬湖江。其江昔有嵐瘴。隆冬人過。雖租穢皆流汗。惟雨中。及夜渡無害。夾岸皆石。江中沙土黃色。因名。詳見雲南大川。

瀘水。衛四百五十里。自建昌南流。而入金沙江。舊多瘴氣。四五月間尤甚。又水流峻急。多巉石。土人以牛皮爲舡。方涉津澗。杜佑曰。武侯南征。五月渡瀘。蓋在此處。新唐書云。由會川渡瀘水。經哀州。維州。三百五十里。至姚州。姚州今雲南姚安府也。詳見前大川。

瀘沽河。衛南八十里。自冕山所逕。建昌衛東境。下流至此。入金沙江。水經注。會無縣有駿馬河水。出縣東高山。山有天馬徑。厥迹存焉。民家馬牧山下。或產駿駒。漢安帝永初六年。詔越嶲郡置長利高望。始昌。三苑。皆馬苑矣。

西貢川。在衛西微外。唐貞元十五年。吐蕃謀襲南詔。遣兵屯西貢川。卽此。志云。西貢川爲吐蕃要地。嘗置西貢川節度於此。

元泉。在衛城東。泉色稍黑。灌漑山田。民獲其利。又勝功井。在衛西北五里。白石竇中。出四時不涸。

瀘津關。衛東南三十里。唐時爲南蠻要路。今廢。又永昌關。在衛西三十里。又西三十里。有大龍關。志云。衛南六十里。有迷郎關。一名迷水鎮。舊有瀘池。今堙。

甸沙關

衛北百六十里。與建昌衛分界處也。一作河沙關。關之東南二十里爲麼些塘。舊麼些寨之壘也。又南十里爲虎頭關。又十里爲虎頭舖。俱威龍寨之區。又十里爲周官嘴。又十里爲大龍驛。又十里爲寒婆營。此二十餘里間。有路通麻龍。仲村。捲卜。

法果諸寨。

不時爲患。

松坪關

衛南二百八十里。近雲南境。北去金沙江可三十里。土寨考。衛西南三十里爲箐山口。又八十里爲火燒腰驛。去驛五里爲五里坡。又十五里爲密即關。路通紅小苴寨。五十里爲七墩堡。路通黎溪州寨。黎溪驛北有荷花池。盛夏香來。可以避

瘴。驛東去七墩堡十五里。又八十里爲塔甲渡巡司。又四十里爲松坪關。○石漢堡在衛

東南十里。又四十里爲虎街堡。又四十里爲姜州堡。即元所置姜州也。會鹽守備駐於此。

會川驛

在衛治北。又北六十里爲大龍驛。又北八十里爲把松驛。又北七十里。至建昌衛之白水驛。○腰驛在衛南七十里。又南七十里爲黎溪驛。志云。衛東南二百里。有塔甲渡巡司。

守禦迷易千戶所

衛西北八十里。元會川路地。明洪武十五年置。今所隸建昌衛。二十七年改。今屬土寨考。初雲南景東府雙壘頭。目阿駭徒其屬。往種於此。洪武十六年歸附。授以世襲副千戶。今土官賢氏居城外。專理巡捕管束八百戶。雙壘

而已。

附考

董卜韓胡宣慰司

在成都府境西北。直威州保縣之西。志云。西北生蕃有孟董二姓。十八寨。名董卜韓胡。唐時哥隣君董臥庭求內附處。其衆於維霸等州居小鐵圍山。去保縣可七八日程。東抵雜谷。八稜。模坡。河在東。如卜河在北。或謂

即古之孫水也。南經雅州。以牛皮爲船。既渡。則曝於岸上。候乾復用。永樂八年。歸附。授宣慰使司。貢道有三。一由雜谷。八稜。闌出保縣。一由清溪口。出崇慶州。一由靈關。出雅州。近與雜谷不睦。故直由雅安。歷代朝貢不絕。

雜谷安撫司

在威州保縣西二百里。志曰。出保縣南岸行一日。又北渡沱江。至雜谷安撫司。可八十里。又十里有故城。相傳卽縣。憂城也。其地有上關下關。前臨沱水。後倚高山。東接三姐。西接孟董。南抵達思。北抵東布。又東至八稜。闌與蒙古密邇。歲終發番兵萬餘。備糧械入關防守。至次年除夕更班。保邊寧謐。以雜谷爲保障也。永樂中建安撫司。使世其職。又有達思蠻長官司。在雜谷西五十里。亦永樂初置。其附近有金川寺。禪師及草坪。大市。龍山。以西諸峒。又有威州南路打喇兒峒及只壘諸番寨。皆屬雜谷安撫司。○雜道長官司。在黎州所西百五十里。領附近屬彝。以時貢獻。

西番烏斯藏都指揮使司

在天全六番司西七百里。本吐蕃重。蒙古主蒙哥取其地。於陝西河州置吐蕃宣慰司都元帥府。又於四川徼外置關門。魚通。黎雅。長河。西寧。等處宣撫司。元主忽必烈時。復郡縣其地。設官分職。以吐蕃僧八思巴爲大寶法王。帝師領之。嗣者數世。弟子號司空。司徒。國公。佩金玉印章者。前後相望。以其地連天竺。有大西天。小西天之名。其貢道由董卜。韓胡。長河西。朵甘思之境。自雅州入於中華。明洪武六年。詔吐蕃各族酋長舉故有官職者。至京授職。遂置五衛門。建官賜印。俾因俗爲治。以攝弟師喃加巴藏卜爲熾盛佛寶國師。元國公。南哥思丹亦監藏等爲都指揮。同知宣慰。元帥。招討等官。自是番僧有封頂國師及贊善王。闡教王。護教王。闡化王。正覺。大乘法王。如來。大寶法王者。俱賜印章。誥命。比歲或間歲赴京朝貢。今計爲都指揮使司者二。曰烏斯藏。曰朵甘衛。爲指揮使司者一。曰隴答衛。爲宣慰使司者三。曰朵甘。曰董卜。韓胡。曰長河西。魚通。寧遠。爲招討司者六。曰朵甘思。曰朵甘隴答。曰朵甘丹。曰朵甘倉。曰朵甘川。曰磨兒。爲萬戶府者四。曰沙兒可。曰乃竹。曰羅思端。曰列思麻。爲千戶所者十七。曰朵甘思。曰刺宗。曰李里加。曰長河西。曰多八參孫。曰加八。曰兆。曰納竹。曰倫答。曰果由。曰沙里可。哈思的。曰李里加。思東。曰撒里士兒干。曰參卜郎。曰刺錯牙。曰泄里壩。曰瀾側魯孫。是爲三十三

附國

在威州西北。舊志云：在蜀郡西北二千餘里。其東部曰嘉良彝。隋大業五年，附國王遣其弟子宜林率嘉良彝朝貢。嘉良有水，濶六七十丈。附國水濶一百丈，並南流，以皮爲舡而濟。南有薄綠彝，風俗亦同。又西卽東女國也。又白蘭羌與附國相近，亦西羌別名也。吐蕃謂之丁零。有勝兵萬人。唐武德六年，遣使入朝。新唐書云：武德七年，以白蘭羌地爲維、二州，似誤。今見陝西徵外西番境內白蘭山，又狗冉川，亦在威州徵外，舊爲西羌別種。唐開元二十九年，與白狗國共來朝貢。○鑿木國在茂州西境，後漢永平中，益州刺史朱輔威懷遠彝，自汶山以西，歷代未奉正朔者。白狼、鑿木等百餘國皆舉種稱臣奉貢，後諸國皆爲西羌所并。

旄牛彝

在黎州所西北。蜀紀：周赧王三十年，秦滅蜀，置守，蜀守張若因取筰及其江南地。史記：自越嶲以東北，君長，筰都最大。秦時嘗爲郡縣，漢興而罷。武帝平西南彝，置沉黎郡。天漢四年，更置兩部都尉，一居旄牛，主徵外彝。後漢永平中，益州刺史朱輔，宣示漢德，自汶山以西，白狼、鑿木及樓薄等百餘國皆朝貢，悉旄牛徵外彝也。永初元年，蜀郡三襄種彝與徵外汗衍種反，叛攻靈陵。延光二年，旄牛彝叛，攻零關。延熹二年，三襄種復寇靈陵，蓋自諸葛武侯南征之後，而旄牛諸彝亦寢息云。靈、今疊溪所也。

木瓜彝

在嘉定州峽眉縣西南五百五十里。木瓜有二：有小木瓜，旁通西赤口，去煖歹只二日，過木瓜橋頭，稍前十里，爲大木瓜。卽今三枝降彝處所。一枝凶瓜，一枝匪瓜，一枝卜特瓜。過大木瓜五十里，爲利濟山，極高峻，與大涼山相接，又五十里至大赤口，口外則馬湖之地矣。卜特之先，分自大赤口，凡十二枝，賦乃卜特其最著者。世居西河，屬馬湖土官安氏鈐轄。自安氏滅，諸瓜叛入邛部歸嶺氏，其地自西河、大小赤口、涼山、雪山等處，周圍盤據，西連建越，北接嘉義，南通馬湖，蹊徑四藏，而八達焉。嘉靖末，諸瓜畜牧蕃盛，心懷內擾。邛部長官詣柏不能馭，及死，賦乃虐柏等叛，出涼山，會同西河匪瓜白祿，出砂坪，於是嘉嶽、犍爲一帶隣邊居民不能安枕。建昌及上下川南三道督邛部發兵至，栖雞坪截殺之。王師未集，賊潛從冷溪而渡，直搗栖雞，官軍大勦，賊鋒益熾，乃議大征，分建越、馬湖、中鎮三路卽進，直搗巢穴。瓜惶駭請降，於是歲入貢於峽眉，恢復堡占田地，自七盤子至米麻嶺，共四千八百六十四畝云。砂坪見黎州所，餘見前峽眉縣。

白羅羅彝

在叙州府珙縣南境。與鎮雄府接界。相傳廣西流犛也。有峒數十。衆數千。其屬又有弄子部。彝所居皆崖壁峻險。林箐叢密。景泰至成化中。屢犯戎珙。長寧諸縣。又時與都掌大壩彝相讎殺云。

烏蠻

在建昌行都司境。唐南蠻傳。烏蠻分七部。有邛部六姓。而勿鄧。豐琶。兩林三部。謂之東蠻。各有大鬼主爲之長。天寶中歸附。後屬吐蕃。貞元三年。復歸款。章阜帥西川。使兩林王苴那時。詞雲南。又屢結東蠻共攻吐蕃。苴那時等皆以功授王爵。唐紀。貞

元四年。雲南王異牟尋欲內附。先遣東蠻鬼主驃旁。苴夢衝。苴烏星。入見。唐封驃旁爲和義王。苴夢衝爲懷化王。苴烏星爲順政王。未幾。吐蕃復發。雲南兵寇西川。雲南尋引去。吐蕃怒。乃分兵攻兩林驃旁及東蠻。追寇清溪關。志云。兩林在勿鄧南七十里。地雖狹。而諸部推爲長。號大鬼主。勿鄧在邛部之旁。豐琶在建昌城山上。亦謂之風琶。上南。志云。今會川衛卽風琶蠻地也。咸通五年。西川奏兩林鬼主逆。南詔蠻敗之。蓋自章阜鎮西川時。招懷東蠻三部。三部嘗助阜破吐蕃。及唐將吏遇之無狀。東蠻遂附南詔。咸通十一年。南詔入寇。三部皆爲之盡力。自是遂絕於唐。胡氏曰。東蠻跨地二千里。苴那時。勿鄧鬼主也。又六姓蠻者。曰蒙。曰彝。曰詭。曰狼。曰勿鄧。曰白也。皆在新安城旁。其別部曰浪稽部。卑籠部。董春烏部。咸通五年。東蠻浪稽助南詔屠瀘州。卑籠部怒。南詔殺其父兄。導忠武戍兵滅浪稽。時六姓皆懷兩端。惟卑籠盡心事唐。與諸蠻爲仇。七年。西川節度劉潼遣將兵助卑籠討六姓蠻。焚其部落。時董春烏部亦附唐。十年。南詔入寇。擊董春烏部破之。遂寇瀘州。五代以降。烏蠻族類分析。大抵附屬於大理。元至元中。伐兩林。破會川。卽其地也。今境內諸土酋。皆其苗裔。新安城見上建昌衛。

松外蠻

在建昌行都司西南。唐南蠻傳云。在瀘州昆明縣徼外。貞觀二十二年。平松外蠻。先是瀘州都督劉伯英請討都外蠻。以通西洱。天竺之道。於是遣將梁建方發巴蜀諸州兵討破之。遂遣使詣西洱河。招降其酋帥。胡氏曰。松外諸蠻。依山山谷。亦屬

古南中地。蓋以在松州之外而得名。或曰。今東川府界有絳雲。弄山。與雲南祿勸州接界。一名松外龍山。卽故松外蠻之地。

